

CIPIDÌ CYÀ MUNTU

MUPWÀNGÀNE



Twasakidila, Mwaneetu Neville. Mukalenge akubeneshe.

Mbîmpè be bwa kwikala baalukile mu tabernacle cyakabidi mu dinda emu. Nyewu nnwela bônso mwoyi wa ngâsà mu dinda emu wa “beetwabu.” Ne ndi ngitabuuja ne neciikale dituku dinene bwetu bônso, mu bwi—Bwikadi bwa Mukalenge wetu. Nenku mpindyewu ndi ne dileesona mu dinda emu. Ndi muswe nkafike buludi ku dileesona dinene edi, bwalu didi. . . Ngela meeji ne ndya mushinga wâbûngî. Ne didi. . . Nenku bwa kulama musumba wa bantu ku dibenga kutamba kwikala batacishiibwe, nudi bamanye, benzejiibwe bwa kushaalabo mukûngûlù mule, bàâbûngî biikale kacya anu biimanyina kuulu. Nêmbwelè buludi mu dileesona.

² Nenku mpindyewu, diloolo edi, ndi muswe kwakula pa cyena bwalu cya *Mulombodi Wa Mwoyi Wányi*. Nenku ndi ntekemena ne bàâbûngî bàdi mwa kwikala ne mushindu, bûngî bwônso budibo mwa kwikala abu, nebiikalepu pa dîbà adi, bwa diloolo edi. Kadi, pawikala ne ekeleeziya webe útù, tudi. . . mu bushuwa bwa bwalu, tudi baswe wikale ku—ku ekeleeziya webe. Aci wêwè udi mwenzajiibwe bwa kwikala kwôkò aku, kudi kusanganyiibwa kaaba keebe kaa mudimu, bwa wêwè kukenkesha bukênkè bwebe.

³ Mpindyewu, tudi tutungunuka ne kutekemena ne, musangu wônso uwikala mwa kwalukila awu, netwikale ne ndambu mukwabo wa mwaba ku luseke eku apa. Kadi tudi ne lutatu ne cyoci aci, kaa, myaba yônso. Kasumbu kaa balombodi aku nkakebulule mu byônso. Nenku badi bacituma mu mwaba kampanda, abu nebâcîtâbè; pashiishe bacituma mwaba kampanda mukwabo, nebacikandameene. Nenku bacipingaja, bôbô baciitaba *apa*, ne bacipingaja. Kaa, ncikondo kaayi citudi bapicile’s we! Kadi, nudi bamanye, Sataana utu anu mulwishi wa cintu cidì cîmpè. Vulukaayi anu ne, nwênù nutu anu babinge bwa. . .

⁴ Mwua ndikonka ne wêwè udi penyi, Anthony. Ndi mmona ne nwâpecyàngànyì ne tatwèbè. Nenku ngâtumu mèsù lwa kwaka, mu bateeleji. Yèyè wâmbì ne wêwè uvwa musòmbe mwaba awu. Tudi ne disanka dya kwikala neenu wêwè ne tatwèbè mwab’ewu, wêwè Mwaneetu Milano wa ku New York. Ndi ntekemena ne, pângàâyà dyamwamwa dya mbù musamgu ewu, nêngèlè cidya cikwabo, nya pambelu paa New York, lwa kwine aku mu mwaba kampanda, Mukalenge mwanyishe.

⁵ Ne pa nanku tudi ne disanka dyàbùngì bwa muntu ne muntu wa kunudi. Bidi anu—anu bîmpè bu munudi mwab'ewu.

⁶ Nenku tudi bapicishe cikondo cya dicyonkomoka diloolo dya makeelela awu, anyi twàmbèku ne mmèmè. Mvwa ne. . . [Disangisha didi dyamba ne: “Amen.”—Muf.] “Ne Yeshaayi mu ntempelu.” Ne pa nanku nwènù. . .

⁷ Nenku mu dinda emu, tudi baswe kwakula pa cyena bwalu, anyi kulongesha's we, twètù ne mushindu, cya ne: “Kwibaka kwa Tabernacle udi ne mwoyi; kwibaka—kwibaka kwa Tabernacle udi ne mwoyi wa cisòmbedi cya Nzambi udi ne mwoyi, Muntu mupwangane; Tabernacle udi ne mwoyi wa Nzambi udi ne mwoyi, mudiYe musòmbèle.” Nenku bu. . .

⁸ Ndi muumvwe ne badi ne imwe ya ku misambu mîmpè mwab'ewu. Mèmè nçitu mpetaku mushindu wa kuyiteeleja to. Nenku diloolo edi, nënditacishè bwa kupweka kuneeku. Mukajaanyi mmundondele bwa Mwaneetu kampanda dyende Ungren, ngela meeji ne ke dîna dyende, wa ku—ku Tennessee. Mpindyewu, yèyè uvwa mwab'ewu diloolo dya makeelela adi. Ncyèna mumumone mu dinda emu to, kadi ndi ncinka ne udi usanganyiibwa kaaba kampanda mwab'ewu. Nenku ndi njinga kuumvwa mudiye wimba diloolo edi, mèmè ne mushindu, wimba ne, anyi *Mutùùlùke Ûfùmîna Mu Butùmî Bwèndè*, anyi *Wèwè Udi Munène's Wè*. Ndi njinga kuumvwa cyòci aci. Mbanganyi badi bajinga kuumvwa Mwaneetu Ungren? [Disangisha didi dyamba ne: “Amen.”—Muf.] Kaa, mèmè—mèmè ntu muswe misambu ya milenga ayi. Nenku Meda uvwa wamba ne uvwa ne dîyì bu dya baryton. Nenku cidì cimvulwija Mwaneetu Baxter; utu kangimba, yèyè pende, bu mutudi bònsò bamanye. Nenku *Mutùùlùke Ûfùmîna Mu Butùmî Bwèndè*, anyi *Wèwè Udi Munène's Wè*. Ngela meeji ne ngàmònu mwaba udiye mpindyewu, lwa mu. . . Bidi mwa kwikala bîmpè, Mwaneetu Ungren, diloolo edi, bu wèwè mwa kuswa, bu wèwè mwa kushaala too ne pa dîbà adi? Neushaale, anyi neuditacishe bwa kushaala too ne pa dîbà adi bwa disangisha dya diloolo? Ee, ndi—ndi. . . Ee, kwikadi. . . Nyawu nñwambila, kadi citwamba ncinganyi bwa eci, bu twètù. . . Ncyèna muswe kupa muntu lutatu to. Kadi mbwa cinyi kubenga kulwa, piine apu, twètù mwa kwikala ne mushindu, mu cikondo cya *Bitampì Mwandamutekete*, patwabiyiisha, bu nwènù mwa kulwa. Ndi njinga kubikwata pa mikaba ya mèyì, nwamonu's, bwa kupeta eci: *Wèwè Udi Munène's Wè*, kabidi, ne: *Mutùùlùke Ûfùmîna Mu Butùmî Bwèndè*, mu ciine cikondo aci.

⁹ Kaa, kí mbilengele bwa kukwacila Mukalenge mudimu anyi? [Disangisha didi dyamba ne: “Amen.”—Muf.] Ncyèna mumanye cîmvwà mwa kwenza to bu nçiyi mwena Kilisto! . . . ? . . . Mbîmpè be bwa kwikala mwena Kilisto. Ndi ndyumvwa mwa kwikala anu ntupika nya muulu ngela mbila, mbila ya ipandangana maci

ayi. Kwikala mwena Kilisto, anji elaayi meeji, mwele lwongo mu Kilisto ne mwanyi mwònsò!

¹⁰ Ndi mumanye ne ntu anu nteela dînà dya muntu ewu bibi misangu yònsò. Didi anyi S.T. anyi T.S., anyi cintu bu nanku awu. Sumners, Mwaneetu Sumner. Yèyè... Ndi njinga kumwela twasakidila yèyè ne mukajende wa mushinga mukole. Ngela meeji ne mmwenze ngondo bu, muvwabi bimweke, bu isambombo, bwa kutuuta ku mashinyi mukanda ewu wa *Bikondo Mwandamutekètè Byà Èkèleeziyà*. Nenku mpindyewu tukaadi babipete batupingajilebi, bituuta byònsò ku mashinyi, bifike mu mushindu wa dibikontonona, bwa kubyenza mu mushindu wa mukanda, *Bikondo Mwandamutekètè Byà Èkèleeziyà*. Mwaneetu wa bakaji Sumner, kwònsò kùdì usanganyibwa, wanyisheku bushuwa tukufute bwa cyòcì aci. Bwalu, ncyangate mudimu wàbúngì be. Mona's, cidi *mona* bunene. Ncifwanyine kungangata ngondo mitwe ku isambombo bwa kubibala kuumukila anu kuntwadijilu too ne kundekeelu, katuyi twamba bwa dibyumusha pa mikaba ya mèyì, ne pasiishe kubikudimuna ne kuumushamu mèyì a dyambadyambulula, ne kubyenza mukanda. Netubilongolole bwa kubituma dyakamwe ku byamu bya difunda mikanda, bwalu tudi twela meeji ne ncintu cidi bantu ne cya kupetela ku byanza mpindyewu, nenku nudi mwa kuwulonga. Nenku Billy mmufume ku dindeeya, pângälükidì mbwelela paanyima paapa, kwäpici tusunsa ndambu, ne—ne—ne bikaavwa—bikaavwa bimana kulongolola mpindyewu bwa kuyabi kudi mwenji wa mikanda ku byamu. Pa nanku, wèwè mwaneetu wa bakaji, tabernacle neakufute bwa cyòcì aci. Ncyèna ntekemena ne wikale mubyènzè anu cyanaana to. Nenku—nenku anyi tudi... Twètù bapete mukanda ne biikale ne cya kuwutwila mushinga, anyi cintu kampanda, netutwe mushinga udi mwa kukupeteshi cintu kampanda dibà dyònsò diikalabo ne cya kuwupaana, cyònsò ciikalaku aci. Wèwè yikilangana anu ne kasumbu, kasumbu kaa balubuludi, anyi ne bamwe baa kudibo kuntwaku, nenku bòbò nebatangile bwalu bwebe. Mukalenge atambe kukubenesha.

¹¹ Mwaneetu Mukulumpe wa balume Kidd ne Mwaneetu wa bakaji badi basòmbe mwab'ewu aba, badi ne bidimu mwinshi mwa lukama kakese, kakese menemene. Nenku nyewu ngaatuutakeenyi ne mukajende kwènji katanci, ke yèyè ne: "Ee, pàmwäpa ewu musangu ngwikala wa ndekeelu ûndì mupete mushindu wa kukumona, Mwaneetu Billy." Yèyè ne: "Nkaadi nkulakaja be."

¹² Mèmè ne: "Kaa, ekelekele! Ncyènà muswe kuumvwa wamba aci to. Nudi anu bu maamu ne taatu bakulumpe kakese." Twètù tudi banange Mwaneetu wa balume ne Mwaneetu wa bakaji Kidd. Twètù, muntu ne muntu, tudi babanange. Nenku bidi anu...

¹³ Bidi bingenza cintu kampanda pândi mbamona babwela mu ekeleeziya, biine abu babaka babidi bakulakaji mushindu wawa. Kadi anji elaayi meeji, bôbò aba bakaavwa bayiisha Evanjeeliyo kumpala kwa mêmè ewu kulediibwa. Kadi nyewu nkaadi muntu mukulumpe. Eyo, anji elaayibi meeji, bôbò bakaavwa bayiisha kumpala kwa mêmè ewu kulediibwa. Nenku ke mêmè ewu mpindyewu, nkaadi mufike too ne ku didyambidila ne nkaadi mubange kukulakaja. Nkaavwa anu pawîpi ne kwela meeji bwa kumba kubilekela. Mmona Mwaneetu wa balume ne Mwaneetu wa bakaji Kidd babwela: “Butumbi kudi Nzambi’s we! Aleluuyah!” Mêmè ne: “To, mêmè’s ndi ndyumvwa bîmpè.” Eyowa’s, mukalenge. Pa kubamona, mushindu udibo, mushindu mwine udibo cya bushuwa bakusonsola’s!

¹⁴ Dîbà adi ufika ku dyumvwa ne, pawîpi ne bidimu bîndi naabi ebi, misangu ibidi, cibî batungunuke anu ne kuya mu budimi bwa bwambi. Mbalwe mu dinda emu bwa kulomba mikanda, bwa ne kwôkò mushindu wa kwangatabo mikanda bwa kuya kayipaana. Bakeba mikaba ya mêyi, bwa bôbò kumona mwa kupatuka, kuya kapeta misuuka ku dyela dya mikaba ya mêyi ayi, bôbò ne bidimu bitwe ku lukama. Mpindyewu “mapwapwa abidi” enu atuvwa twamba makeelela diloolo awu adi penyi? Eyo. Mêmè nkaavwa mubange kudyambidila ne: “Aanyi mêmè adi penyi?” pãmbiye cyôci aci—cyôci aci makeelela awu. Ukaadi ne bidimu binga, Mwaneetu wa bakaji Kidd? [Mwaneetu wa bakaji Kidd udi wamba ne: “Ndi ne bidimu makumi mwandamukulu ne cimwe.”—Muf.] Makumi mwandamukulu ne cimwe. Ukaadi wêwè ne binga, Mwaneetu Tom? [Mwaneetu Kidd udi wamba ne: “Makumi mwandamukulu ne bibidi.”] Bidimu makumi mwandamukulu ne cimwe ne makumi mwandamukulu ne bibidi, cibî biikale anu benza mudimu ne mapwapwa abo awu, miikale anu mu mudimu, benda baya anu kuya.

¹⁵ Bwalu kabuyi bwenda bîmpè mu Ohio, budi Mwaneetu wa bakaji Kidd mumanye, telefone udi udila kwanyi kumbelu. Dituku dikwabo, yêyè kwela telefone, nenku mwânà mukese wa mu diboko, mwânà mukese wa bakaji, ngela meeji mmuvwabi nanku, uvwa mulediibwe, mwikale ne mala pambelu. [Mwaneetu wa bakaji Kidd udi wamba ne: “Kalondo kaa mênyi.”—Muf.] Kalondo kaa mênyi, pambelu paa mubidi wa mwânà wa mu diboko awu. Ke ngangabuka kupangaye cya kwenza pa bwalu abu, kupetaye bwôwà bwa kubanga mene dimupanda. Twêtù kusambila. [“Kumupandaye, Mwaneetu Branham, ne kubyalujaye, bwalu, bavwa bamba ne: ‘Kî mmufwanyine kushaala ne mwoyi to.’ Ke bôbò kwaluja mala ende awu munda.”] Bôbò kwaluja mala munda, ku dimupanda adi, biikale badyambidila ne kavwa mwa kushaala ne mwoyi to. Kadi’s wakashaala ne mwoyi bulelela. [“Kakuyi njila to.”] Kakuyi njila mwaba awu bwa—bwa bi-. . . kubangila ku ntwadijilu wa

njila wa bunyawu, bwa byakudya kupicilamu. Ke Mwaneetu wa bakaji Kidd kubiikilaye cyakabidi. Twètù kwela cyakabidi disambla, nenku mpindyewu ukaadi ne njila wa byakudya anu pa yêyè. Ke yêyè ewu, bu bujaadiki; ne ngangabuka awu, yêyè pende. Nwamonu anyi? Mbujaadiki bwa ne Mukalenge Yesu, ke Mufùki munene awu! Nudi numona civwa Sataana uteeta kwenza anyi? Kukosoloja mwoyi wa mwànà awu. Nenku pashiishe, nudi numona, pa mwaba awu ndi ngela meeji ne ke inàbànzà awu kulwaye kudi Mukalenge. [“Mmwalukile kudi Mukalenge, anu kwanyi kumbelu aku.”] Mwalukile kudi Mukalenge. Mwaneetu wa bakaji Kidd ke wâkamulombola bwa kwalukaye kudi Kilisto, paanyima paa cishima cinene eci cyenzeke bwa mwanende wa mu diboko awu.

¹⁶ Mvwa mupete dibiikila ku telefone ku Californie, makeelela awu, mwaneetu mutekete mwambi kwòkò aku, wa bwena úmvwà nende pângààkayà musangu wa kumpala ku Californie, kukaadi bidimu. Mwikulwende wa balume uvwa mulediibwe ne—ne. . . mijilu ya nshibashiba inaayi anyi isatu ya mu mwoyi wende mijibakane. Ke mêmè kumulondela bwine bwalu abu. Mêmè ne: “Nzambi mwine uvwa ne bukole bwa kufùka cikwabo eci ne kucilongolola awu, udi bulelela mwa kwondopa mwikulwebe wa balume awu.” Ke mêmè kwambila anu mwabilaayi awu bwa kukoleshayè mwoyi.

¹⁷ Nenku yêyè mwabilaayi ewu uvwa mu disangisha dya pângààkayà musangu wa kumpala ku Californie, kukaadi bidimu dikumi ne mwandamukulu mpindyewu, kukaadi bidimu dikumi ne bisambombo, kwakenzekadi. Nenku mvwa nsanganyiibwa mu Californie. Nenku yêyè uvw- . . . Ke disangisha adi kwikaladi ne bwenzeji pa mulumyana awu mu mushindu wa ne. . . Paakapetabo mwànà awu, paakamulelabo, ne paakalwabo kumona ne cintu kampanda kacivwa bîmpè to, mwànà mwenze bleu, ke kuteetabo kumuteeka ku bòmbonè, ne bikwabo. Nenku kavwa anu umweka bu ne uvwa mwa kupànda to, ke bangangabuka kumwenzabo mateeta, ke kupetabo ne mijilu ya nshibashiba isatu ivwa mijibakane mu mwoyi wende. Kayiyi mitubulukeku nansha kakese, nudi numona’s, anu—anu mujilu wa lushibashiba umwepele nguvwa utama lupeepele. Ke yêyè kubiikila tatwëndè, wamba ne: “Papa, biikila Mwaneetu Branham, anu patudi twakulangana apa. Umwambile ne byònsò . . . ‘Lomba anu Kilisto cyanaana. Yêyè neenzè.’” Ke bwalu abu’s. Kaa, ekelekele! Bwenzeji abu, cidibo bamona, nwamonu’s, bitudi balonde, makeelela diloolo. Cintu cidi cikengediibwa pa dîbà didi dikengediibwa.

¹⁸ Ee, tukaadi anu batungunuke ne kwakula, bafwanyine katuciyiku mwa kubwela mu dileesona to, kî mmwômò anyi? Cyenze anu bu musabusabu wa nsukaadi mu dinda dya mashika makole, udi ukwatakana ne mwawu mwònsò, nudi bamanye, mwikale ulamakanangana wònsò. Tudi ne disanka dyàbúngi

dya kwikala ne bwobumwe bwa mushindu awu. Eyowa's, mukalenge.

¹⁹ Nenu mpindyewu twänjààyi kutuuyiishaku cilunji tũng, mpindyewu, nenu tuyaayi ku dileesona mpindyewu. Pàmwápa netuye . . . Ncyêna mumanye ne nudi mwa kumona cyôci aci anyi to, ku cibasa eku. Pàmwápa mêmè mucikudimune mushindu ewu, bwa katanci kakese, mona's, netwikale ne mushindu, mpindyewu, bamwe baa kunudi, wa . . . [Mwaneetu Edgar "Doc" Branham udi wamba ne: "Udi muswe tutwepu mwëndù wa bukênkè bukole anyi?"—Muf.] Wamba ne? ["Udi muswe bwa tutwepu mwëndù wa bukênkè bukole anyi?"] To, ncyêna ngela meeji nanku to, bwa mpindyewu ewu, Doc. Pàmwápa paapitaku katanci. ["Anu lwa panshi papa, ndi mwa kupatwa mwëndù wa bukênkè bukole."] Ee, ne—netwänzè cyôci aci pângààpetà ndambu wa . . . Udi mene ne mwëndù wa bukênkè bukole mwaba ewu anyi? Mbîmpè. Enzaaku tutwepu mwëndù awu. Nudi mwa kumona lwa mundekeelu mwamwa anyi? Nudi mwa kumona anyi? Panwikala mwa kumona, elaayi byanza muulu, panwikala mwa kumona cibasa cyacya naka, kubala bidipu byabya. To. Mbîmpè. Angàtaku mwëndù awu. Mpindyewu, pacidibo badilongolola bwa cyôci aci . . .

²⁰ Nyewu mbanga dîbà dipite mu dinda emu; anyi, to, to, tusunsa tutwe ku dikumi ne tutaanu kumpala kwa dîbà. Pa nanku, nenu, netwangate anu dîbà dyetu mpindyewu, bwalu katwena baswe kulwijakaja to. Paudi ulwijakaja, ke paudi unyangakaja anu menemene bintu biine byûvwà ujinga kwamba. Mpindyewu, mvwa nteeleja mukaba wa mēyi, dituku adi, anu bu mûngânwâmbidi, kadi mêmè kudyumvwa anu mêmè mwine bundu be; kabiya bwa bîmvwà ngamba abi to, kadi mushindu mwine ûmvwà mbyamba lubilu lubilu's, nenu ciikale anu dîyì dya muntu mubinduluke. Ndi ndyumvwa bu ne bidi bikengela kwikala kwindilaku. Cyôci aci . . .

²¹ Mvwa—mvwa mumone dituku dikwabo mwaba uvwabo bakeba kwenzela lupangu lwa kulaminamu nyama ya mwitu, munkaci mwa Louisville emu. Nenu Mukalenge Brown, ngela meeji uvwa nyêyè, kwine aku, kufilaye mùlîyô mujima wa ndola bwa lupangu lwine lwa nyama alu. Ee, bu mêmè ewu naayi yôyi ayi, nunku ndi mubapingajileyi bwa kulekelelabo nyama ayi. Mêmè—mêmè ncyêna ngitabuuya dyela dya cintu mu nsanji mushindu awu to. Ndi anu . . . Ndi nya ku lupangu alu mmona nyama ayi mikwate ne bya luse, ours, ne ntambwe, ne bikwabo, yendakana itwa eku itwa eku, myela mu buloko bwa kashidi, nwamonu's. Bikwenza ne bibi. Twamb'eku twamb'eku, mbayikwate kudi meeji a muntu udi ne meeji matwe mayipite yôyi. Nwamonu anyi? Nenu badi bayikwata kadi kuyiteeka mu bupika.

²² Nenu ndi ngela meeji awu: ke citu dyabulu wenza. Utu wangata bantu baa mushinga mukole bavwa ne cya kwikala

bendakana mu myaba minene ya Nzambi, ne mu madimi, ne—ne bintu bu byôbi abi, kadi kumwela mu nzubu wa lukanu lwa dingumba kampanda, anyi twitabaayi kampanda, anyi cintu kampanda, nenku umuswikilamu. Aci's ncintu cya cikwacisha bwôwâ's.

²³ Mêmè mwine ncitu munange mpangu ya dilamina nyama ayi to. Kadi ndi ngumvwa cintu kampanda bu umwe wa nyama ayi, panudi bônso beela mu nsanji ne biikale nuteeta bwa kubâfûkamù, nudi bamanye, bwa—bwa kupatuka kuya kenza cintu kampanda.

²⁴ Mpindyewu, kumpala kwa twêtù kuseemena pamwe ne Dîyî, twânjàâyî tuseemenaayi pamwe ne Mwena Dîyî mwine, patudi twinyika mitu yetu mpindyewu mu disambila apa.

²⁵ Taatu wetu wa mu Dyulu wa ngâsà, tudi badisangishe cyakabidi mu dinda emu mu Dînà dya Mukalenge Yesu, Mwânâ Webe wa mushinga mukole. Nzambi, mwandamuke mubidi, wâkalwa pa buloba, bwa difuta dya cibawu cya mpekaatu yetu, ne wâkafwâ, Mwakane awu; bwa twêtù, ku bwakane Bwende, twêtù babi aba twamona mwa kuvwijiibwa bapwangane mu Yêyè. Tudi tulwa biikale tutonda ne katwena bakumbanyine to, Mukalenge. Kakwena cintu cîmpè kutudi eku nansha cimwe to. Ne twêtù biine tudi bônso mu nzubu munene wa lukanu umwepele. Nansha twêtù biimanyine mu ditumba kaayi, tudi bônso anu mu buloko. Kakuyiku udi mwa kwambulwisha mukwende to. Kadi, Nzambi, mu luse Lwende ludi kaluyi mikalu alu, wakatuuluka e kukangula biibi bya buloko, bwa kutulekelela. Bwa mpindyewu katucyena kabidi beela mu nsanji to. Katwena mu lupangu lwa nyama lwa maalu a pa buloba to, kadi mpindyewu tudi badishikamine. Tudi pambelu.

²⁶ Kaa, mushindu mwine utudi baMunange ne biikale tuMukuukwila's we! Mushindu mwine utudi mwa kwenda twâta eku twâtwa eku mu madimi manene a mulayi Wende, biikale tuyimona mimweneshiibwe patooke kumpala kwetu! Nenku biikale tudimwena ne etu abidi, tumona Nzambi wa Cyendelele awu udibuulula Yêyè mwine kumpala kwetu, mwikale udivwija Yêyè mwine mulelela, bu mwakenzaYe kudi baprofeta baa kale. Biikale bamanye ne, bôbò abo mbashaale biikishe ne ditwishiibwa ne, dîngà dituku netwalujuludiibwe, piikala mwoyi ewu mujike, ku dibiishiibwa dya ku lufu, ku Mwoyi wa Cyendelele wikala kawuyi mwa kwimanaku to. Mibidi yetu kayaakukulakaja to. Ne katwakufwaku to. Ne katwakuumvwaku nzala to. Ne katwakukengelaku cintu to. Kadi netwikale twendakana Nende. Tudi baswe kuMuumvwa wamba ne: "Bwelaayi mu masanka a Mukalenge, akanulongolwelabo kacya ku difûka dya dyulu ne buloba." Kale wawa pavwa mpekaatu kayi mwanji kubwela to, mushindu wakalongololaYe, bu bivwa bitangila Adama ne Eva, bwa ne kabavwaku ne cya kusaama anyi kupeta lutatu nansha.

Nenku mpindyewu Yèyè kutulongolwela cyôci aci, ne Yèyè ukaavwa mudyanjile kumanya ne twètù aba netulwe. Mpekaatu ke wâkenza cipumbishi cinene, kadi mpindyewu mpekaatu ukaadi mumane kuumushiibwa, kudi Mashi a Yesu. Mpindyewu, tukaadi mu njila batangile ku Buloba bulaya, ku mulayi wa Nzambi, udi wa Cyendelele.

²⁷ Tùbènèshàku mpindyewu, Taatu, patudi tulonga Dìyì Dyebe apa. Tudi baswe kumanya ne tudi ne cya kwikala bantu baa mushindu kaayi, bwa kwikala Kwôkò aku. Tukwacisheku leelu ewu mu kalaasa aka, bwa twamona mwa kwikala ne Mulongeshi wa Cikunda awu pamwe neetu, Nyuma Mwîmpè, udi mufwanyine kutuuluka bwa kuDibuulula kutudi, ku Dìyì Dyende. Bwalu tudi tulomba nunku mu Dînà Dyende ne bwa butumbi Bwende. Amen.

²⁸ Mpindyewu, dyambedi, ndi njinga nubuulule pamwe naanyi mu Peetelo Mwibîdì, mu nshapita 1. Ndi muswe kubala citupa cya Mufundu ewu, Peetelo Mwibîdì, nshapita 1. Nenku mpindyewu nwênù badi ne crayons yenu ne mabeji. . .

²⁹ Nenku ngela meeji mbangabile mu dinda emu ne—ne kudi misangu mikwabo, pândi ntuma mutu ku luseke ngumusha kwôkò aku, bidi bipwekesha dîyì pa mukaba wa mèyì. Mu bushuwa bwa bwalu ncyèna ncyenza ku bukole to. Nenku ndi ngela meeji ne, musangu kumpala, bu twètù mwa kwelaku meeji a kupeta ci—cikolokolo cidì cyumvwa nseke yônsò, kucilebeleja lwa muulu mu plafond kaaba aka. Dîbà adi nansha wèwè usanganyiibwa mwaba kaayi, udi mufwanyine kwikala anu bîmpè. Mbifwanyine kwikala bipwangane, anu ku nyungulukilu kwônsò, anu cikolokolo cyanaana cilebeleja lwa muulu mu plafond.

³⁰ Nenku mpindyewu, bu pândi ngakula apa; nenku nwênù, paanyima paa disangisha, anyi panwikala baswe, nudi mwa kuzola lukasa lukasa cidì apa edi. Pashiishe ndi kabidi mudituucishe ku cyamu mwaba ewu. Nêngàngatè kaamusonso bwa kudilamika lwa kumpala eku, panwikala bajinge kucyenza musangu kumpala. Nulwayi kumpala kwa dîbà ndambu mu mapingaja emu, bwa twètù kupeta mushindu wa kuumvwa.

³¹ Mpindyewu tukaadi tuseemena pabwîpì ne *Bitampì Mwandamutekètè*. Nyewu twafumu ku dijikija dya *Bikondo Mwandamutekètè Byà Èkèleeziyà*. Nenku eci n'Diyiisha pa dilongesha, didi diswikila muntu munda, muntu wîkala mwa kupikudiibwa ku Mashi a Mukalenge Yesu, ne wîkala mu ciine cikondo cya Ekeleeziya aci, cikondo cya Cyendelele cya Ekeleeziya aci kundekeelu kwa Bitampì. Mpindyewu tudi bamanye ne tudi ne Mpungi Mwandamutekete, Makenga Mwandamutekete, Mpanza, ne bikwabo, mutudi tubwela, patudi twenda tuya kumpala apu. Kadi tudi bindile bwa kupeta myaba yâbûngì bwa bantu baamona mwa kusomba.

³² Mpindyewu, nenku mvwa ngela meeji ne eci ncifwanyine kuswikakana anu mu mwaba menemene ùmvwà mutekemene. Ncivwa mutekemene ne nêngènzè dizola edi to, kadi dituku adi mvwa ne balunda baanyi bakwabo baa mushinga mukole, ba-Cox, lwa mu Kentucky mwamwa. Mvwa mumùpwekè, ngela meeji pàmwāpa ne mvwa mwa kupetaku dituku dikwabo dya kuya katwa buluwà bwa nshindi kumpala kwa movù kujikawu. Nenku mvwa nsanganyiibwa mwitu amu ne mulunda wanyi, Charlie, udi mwimane paapa wawa, ne Rodney, mwanaabo wa balume. Ncyakamana nanshà nshindi mwine to. Ngela meeji ne mvwa muyikwacishe bwôwà minyeeme miye, dîbà dîmvwà mubange kwela mbila mikole mwine mwitu amu. Cyôci eci ke civwa cimvwile, balumyana, ne—ne Mwaneetu wa bakaji Nellie ne Margie, ne pâmvwà munwāmbile ne nēnnūlondèlè mu dyalumingu pângààfikà ku cyôci aci. Ke civwa cimvwile, pa diyiisha dîmvwà ne cya kuyiisha. Ne mushindu uvwa bikwabo byônsò biswikakane menemene ne cyôci aci! Nenku, kaa, ndi muswe aci. Mēmè kupeta nyuma wa—wa dikema—wa dikema wa dyela dya mbila, mwine mwitu amu.

³³ Pa nanku mpindyewu, tubalaayi mpindyewu, Peetelo wa Kumpala, anyi. . . Peetelo Mwibîdî, yêyè awu's we, nshapita 1, citupa Cyende.

Simona Peetelo, musadidi ne mupostolo wa Yesu Kilisto, kudi aba badi bapete diitabuuja dya mushinga mukole dya bwena dyetu twêtù ku bwakane bwa Nzambi ne Musungidi wetu Yesu Kilisto.

³⁴ Ndi munange mushindu udi bwalu abu bwambiibwe mwaba awu, bwalu cyena bwalu cyanyi cyônsò nkòong mu dinda emu ncishindameene pa diitabuuja. Nwamonu anyi? Anyishaayi mbalulule cyôci aci. Teelejaayi ne ntema.

Simona Peetelo, musadidi ne mupostolo wa Yesu Kilisto, kudi aba batu bapeta—badi bapete diitabuuja dya mushinga mukole. . . ku bwakane bwa Nzambi. . . Musungidi wetu ne Yesu Kilisto:

³⁵ Monaayi, yêyè udi wamba, ne: “Ndi mupete diitabuuja edi, ne ndi ngambila aba badi bapete diitabuuja dya mushinga mukole dya bwena dyôdi adi.” Ndi muswe. . . Kî nkudi baa pa buloba baa pambelu to. Eci nkudi Ekeleeziya, nudi numona's, aba badi mu Kilisto.

Ngàsà ne ditalala binuvudijiibwe ku dimanya dya Nzambi, ne (ku) dya Yesu Kilisto Mukalenge wetu,

Bu mudi bukole bwende bwa bunzambi bwikale butupe bintu byônsò. . . bukole bwende bwa bunzambi mpindyewu bwikale butupe bintu byônsò bidi bitangila mwoyi. . . difwana dya Nzambi, ku dimanya dya ewu udi mutubiikile ku butumbi ne bukole:

Ku byôbì ebi nkutudi twêtù bapeebwe... bapeebwe milayi minenaanaale ne ya mushinga mukole: bwa ku yôyi eyi (milayi eyi) twêtù twamona mwa kwikala baabanyanganyi baa ngiikadilu wa bunzambi,...

³⁶ Mpindyewu lekelaayi aci cibwele too ne mu ndondo menemene mpindyewu. Ncyêna nyiisha mu dinda emu to; tudi tulongesha dileesona edi cyanaana. “Ngiikadilu wa Bunzambi.” Lekelaayi mbalulule mvensa mwinâyi awu mpindyewu, bwa kalu kunupita to. “Ku byôbì ebi nkutudi bapeebwe...”

Ku byôbì ebi nkutudi twêtù bapeebwe milayi minenaanaale ne ya mushinga mukole: bwa ku yôyi eyi (milayi eyi) twêtù twamona mwa kwikala baabanyanganyi baa ngiikadilu wa bunzambi, bamane kupanduka ku dinyanguka didi pa buloba ku lukuka.

³⁷ Nudi numona, “maalu a pa buloba,” tukaadi bapanduke ku cyôcì aci mpindyewu. Eci udi ucyambila Ekeleeziya. Ke bwa cinyi tudi kaaba aka mu dinda emu, mbwa kujandula njila ne ngwêpì, ne mushingà wa Nzambi udi cinyi. Kakwena muntu kaaba aka mwikale munange Nzambi, kadi kayi muswe—muswe kulwa mutambe kufwanangana ne Kilisto to. Mpindyewu cyôcì aci ncidi cyadija kaaba aka eci. Mwena Kilisto yônsò! Mémè ewu ndi nkolomu wa kale. Tangilaayi Mwaneetu wa balume ne Mwaneetu wa bakaji Kidd mwab’ewu, pàmwâpa bôbò mbadi batambe kwikala bakulampe mu nzubu emu. Kadi bu mémè mwa kubakonka ne: “Dijingà dya mwoyi wenu didi cinyi?” Mbifwanyine kwikala ne: “Kutamba kwikala pamwe ne Nzambi.” Paudi uyilla maalu a Kilisto, kudi cintu kampanda kudiYe aku ciikale cya dinanga dya dikema, mu mushindu wa ne udi uditacisha bwa kubwela munda Mwende.

³⁸ Fwayiku luse bwa diyì dîndi ngamba edi. Mvwa ngambila mukajaanyi, mwab’ewu kî nkwanji kupita ntanta mule to, yêyè... twêtù bônsò babidi babange tukaadi tukulakaja, ke mémè kumwambila, ngamba ne: “Ucidi munnange mùvwà munnange amu anyi?”

Yêyè ne: “S’ncidi anu mukunange bulelela.”

³⁹ Nenukù mémè ne: “Udi mumanye’s, mémè ndi mukunange bikole mu mushindu wa ne ndi muumvwe anu mwa kukwangata kadi kukukokela munda mwanyi emu, bwa twamona mwa kwikala anu, mu bushuwa bwa bwalu, kwikala umwe, bipite ne piine apu.”

⁴⁰ Mpindyewu, cyôcì aci, nucivudije ku miliyô lukama, kadi nenujandule mushindu udi mwena kwitabuuja, udi mukwacike dinanga dya Kilisto, ujinga kubwela munda Mwende, bwalu cintu ndinanga. Nenukù mwab’ewu Yêyè neatuleeje mushindu utudi, ku milayi eyi, bafwanyine kwikala baabanyanganyi baa ngiikadilu wa Bunzambi wa Kilisto. Mibidi eyi, ya cifwaka eyi, mushindu utudi mwa kwikala baabanyanganyi.

41 Ndi mufwanyine kwamba cintu kampanda mwab'ewu. Cidi cyenza ne ngitabuuje... Mpindyewu muntu kampanda mmungumvwe bibi bitambe, kî nkwanji kupita matuku to. Ndi mupete mukanda mumfundila kudi nsangilu wa bambi, wamba ne mêmè ntu ngitabuuja ne kudi... "Twètù aba tuvwa misuuka milamakane. Nenku tudi ne cya kushiyangana ne bakaji beetu anyi baabayeeetu piikalabi ne katuvwa naabo misuuka milamakane, bwa kusela anyi kusediibwa kudi muntu mukwabo utuvwa nende misuuka milamakane." Kakaa, ekelekele!

42 Mêmè ne: "Mêmè ncyèna ne dipiila pa dipambuka bu nanku to." Mêmè ntu kwònsò eku ndwishangana ne cyôci aci. Mêmè—mêmè nciitu nciitabuuja to. Nansha kakese. Mêmè ntu ngitabuuja ne Nzambi utu utupa mwena dyetu. Aci ke cya bushuwa. Nenku pashiishe mpatudi tushaala muntu mwikale citupa cya mukwende. Aci ke cya bushuwa. Nenku kumpala kwa muntu kubwelaye mu dibaka, bidi bikengela èlè meeji bikole pa maalu aa, alonge bwalu ebu.

43 Nsongalume kampanda kunkonkaye dîngà dituku, wamba ne: "Udi welaku meeji, Mwaneetu Branham, ne mêmè ndi mwa kusela, bikengela nsele mwânà wa bakaji *kampanda* anyi?"

Mêmè ne: "Utu umwelela meeji kaayi?"

Yèyè ne: "Kaa, ekelekele, ndi mumunange be."

Mêmè ne: "Ee, pawikala kuyi mwa kwikala ne mwoyi wèwè kuyi nende to, pa dîbà adi mbîmpè umusele. Kadi pawikala mwa kwikala ne mwoyi nansha kuyi nende, kî mbîmpè umusele to. Nenku, kadi byôbi bifwanyine kukushipa, mbîmpè—mbîmpè nutungunuke too ne ku diselangana," mûngàakamwambilà. Nenku cîmvwà nteeta bwa kumufikisha ku dyumvwa, ncyôci eci, ne, wèwè mumunange bikole menemene!

44 Mpindyewu, mpindyewu mene, kumpala kwa nwènù kuselangana, byònsò bidi anu bîmpè ne bilengele. Kadi paanyima paa nwènù bamane kuselangana, ke ntatu ne mateeta bya panu kunubwelelabi. Pa dîbà adi ke padi pakengela nwènù kwikala mu dinanga dya menemene bwa nufike ku mushindu wa muntu uumvwa mukwende. Paukaadi uumvwa ne mukaji wakutekeshi mu maboko, anyi mukaji uumvwa ne wèwè wâmutekèshì mu maboko, nudi anu nutungunuka muntu ne muntu uumvwa mukwende.

45 Ke mushindu udibi ne Kilisto. Nwamonu anyi? Bikengela twikale menemene mu dinanga Nende, mu mushindu wa twètù balombe cintu kampanda, kadi Yèyè kayi mutupeci to, aci kaciyi mwa kutunyungishaku nansha kakese. Nwamonu anyi? Nwamonu anyi? Bwa cinyi? Ne mushindu umwepele unudi mwa kwenza nanku, ngwa kushaala baabanyanganyi baa ngiikadilu Wende wa Bunzambi, pa dîbà adi neùmvwè bwa cinyi Yèyè kèna mwa kukupaci. "Baabanyanganyi baa ngiikadilu Wende wa Bunzambi."

46 Tangilaayaaku kunu. “Bamane kupanduka ku dinyanguka didi pa buloba ku lukuka.” Bapandukeku! Nudi numona badibo bambila anyi? Badi bambila Ekeleeziya, aba badi mu Kilisto, bakaadibo bamane kubandisha kumutu kwa bintu ebi. Kabiya ne mmudibandishe yèyè mwine to, kadi Kilisto ngudi mumufikishe kuulu aku.

47 Bwa bânà beetu baa balume ne baa bakaji baa bafiike badipu mwaba ewu mu dinda emu, ncyèna ngamba bwalu ebu ne meeji a kutacishangana to. Kadi, kuvwa mmu disangisha kampanda kukaadi matuku, ncyèna mumanye ne nkaadiku mwambe bwalu ebu mu tabernacle emu anyi. Nkaadi mubwãmbambe mu myaba yàbũngì. Kuvwa mwaneetu wa bakaji wa bafiike wákamba ne: “Ndiku mwa kupeta bujaadiki, anyi kufila bujaadiki anyi?”

“Cya bushuwa’s, mwaneetu wa bakaji, tuyaaku tũng.”

48 Yèyè ne: “Ndi njinga kufila bujaadiki ebu bwa butumbi bwa Nzambi.” Yèyè ne: “Nudi bamanye’s, mêmè—mêmè ewu ncyèna cidi cikengela mêmè kwikala to,” kadi kwambaye ne: “Ncyè—ncyèna cîndì njinga kwikala to, kadi,” yèyè ne, “cintu cimwe cîndì mutwishii bwe, ncicyena cîmvwà kwõnsò eku aci to.” Nwamonu anyi? Ukaavwa muumuke mwaba kampanda. Bakaavwa bamane kumufikisha kuulu.

49 Mushindu awu ke utudi tumanya ne tukaadi buumuke ku lufu baye ku Mwoyi. Tudi tutangija mèsù paanyima ku ciinà civwabo batupatulè. Nwamonu anyi? Katwena citudi tujinga kwikala; katwena nanshà cidi cikengela twètù kwikala to; kadi cintu cimwepele citudi naaci ne kusakidila ncyà ne, katucyena cituvwa kwõnsò aku aci to. Ncyà bushuwa. Tudi mu njila.

50 “Nenku bamane kupanduka ku dinyanguka dya pa buloba.” Bamane kupanduka ku cyôci aci, ku lukuka ne dinyanguka bya pa buloba, nukaadi kumutu kwa byôbi abi. Mpindyewu aci—mpindyewu aci ke mushindu wa muntu udiYe wambila, muntu ukaadi mupanduke ku bintu ebi, nwamonu’s, mona, ku dinyanguka dya pa buloba.

Nenku pa kuumusha cyôci eci, biikale badifile ne cisumi cyõnsò, ku diitabuujja dyenu nusakidile bukole, ne ku bukole dimanya,

Ne ku dimanya didikanda, . . .ku didikanda lutuulu, . . .ku lutuulu difwana dya Nzambi,

Ne ku difwana dya Nzambi dinangangana dya bwânà bwetu, ne ku dinangangana dya bwânà bwetu luse.

51 Mpindyewu Yèyè nyewu wâtùpi dizola mwab’ewu dya cya dyenza, kumanya mwa kucyenza. Mpindyewu, bu mûngãmbi, twètù bõnsò tudi tuditacisha bwa kutamba kuseemena pabwipi ne Nzambi. Ke bwa cinyi ndi musungule Dyiisha edi mu dinda emu, bwa ekeleeziya, bu mûndi mumanye ne bantu badi

benza lwendu. Bwalu makeelela diloolo, mwya mwambe ne: “Mbanganyi kaaba aka, badi bafumine pambelu paa cimenga?” Bantu bu makumi citeema ne mwandamukulu pa lukama, bafumine pambelu paa cimenga. “Mbanganyi kaaba aka badi bafumine ku miles lukama [kilomeeta 160]?” Mona’s, kupitabi, ngela meeji, makumi mwandamukulu pa lukama. “Mbanganyi kaaba aka badi bafumine ku miles mipite pa nkama itaanu [kilomeeta 800]?” Pabwîpî ne cya—cyabisatu cimwe cya bantu bavwa kaaba aka mbafumine ku kilomeeta mipite pa lukama ne makumi asambombo, mipite pa nkama mwandamumukulu. Anji elaaayi meeji tũng, bwa bantu badi benza lwendu. Ee, bantu abu kabeena balwa mu ekeleeziya anu nanku awu bwa babamone to. Kakwena . . . cidi bantu baa pambelu bafwanyine kumona ne ke bulenga bwa mwaba mwine ewu to. Bônso mbantu anu beetu baa patupu aba, bapele, bavwale bilàmbà anu byetu bya patupu ebi. Kamwena miyengà minene myela kudi cisumbu cya beena misambu badi mwa kudyamba bu ne ncyà Banjelo to, bisanji bya orgues bya mbungu, ne madidiishi kampanda a mmwenu ya meekala. Bwa kupeta anu cibasa ciine cya disòmba nyewu bidi anu lutatu kunudi ne diimana mene dya kuulu biikale nwenda nulonda cimanu. Kabeena bavwila biine bya nanku abi to. Kadi badi balwa anu bwalu munda mwabo mudi cintu kampanda cidi cimona bulenga budi dîsù dyetu dya mu bufûki edi kadiyi dimona to. Dîsù dya nyuma ke didi dimona bulenga bwa Kilisto. Ke bwa cinyi badi balwa.

⁵² Pa nanku, matuku kumpala kwa twètù kwenza disangisha adi, ndi nsambila ku musangu ne ku musangu. Ndi nya mu diitu, ngangata ne kàlipê kaanyi kaa mu mpaaya. . . Ngambila mukajaanyi ne: “Nyaaya mu ditwa dya buluwà bwa nshindi mu dinda emu.” Nenku ngela crayon ne ndambu wa mabeji mu mpaaya. Kwîsù kudi anu kwenza ne kwâtòoku kwa muntu mufwanyine kumona, nsòmba mweyemene ku mucu mwaba kampanda, byanza byela muulu, ngamba ne: “Mukalenge, cîndi mwa kwenza leelu ncinyi? Cyûdi Wèwè muswe kumpa bwa bânà Beebe ncinyi?”

⁵³ Nenku pândi nkafika pa cintu kampanda cidi cimweka bu cidi citeema kapyà cilungula, ciikale cilwa cintu kampanda bu nanku ewu. Padi Bwikadi Bwende buseemena, ndi mbanga kuumvwa cintu kampanda mu ntanta mule, cintu kampanda bu cya bintu byenda bilondangana mushindu ewu: “Ibidi kuvudija ku ibidi mwomumwe ne inaayi.” Bitamba kuseemena: “Ibidi kuvudija ku ibidi mwomumwe ne inaayi. Ibidi kuvudija ku ibidi mwomumwe ne inaayi.” [Mwaneetu Branham udi wenda wambulula cintu aci mwikale wenda ubandîsha lubilu—Muf.] Anu nanku, anu nanku, anu nanku, mushindu awu. Ke Bwikadi Bwende budi bulwa abu.

⁵⁴ Udi udilekelela, nenku paanyima paa mutanci upatuka mu wèwè. Ke cikeena-kumona cilwalwa aci: “Nda ku mwaba

kampanda, ne cintu *kampanda*.” Nwamonu anyi? Cidi cibanga, bibangila ku dyelangana dyebe dya meeji dishindameene pa Nzambi, mupatuke mu maalu a pa buloba, muye kule ne baa pa buloba, mupatuke muye mu mwaba wa cipeela, paa nkayeebe.

⁵⁵ Ke Cyôci kubanga kulwa: “Umwe, umwe. . .” Ndi ngamba, nomba yônsò naka, anyi cintu kana cyônsò, cintu cibanga anu ku ndambu ku ndambu, cibwela biteketebitekete. Pashiishe cibanga kulwa lubilulubilu, lubilulubilu. Musômbe mwaba awu mwele byanza muulu, kuyi wamba bwalu to, kacya anu wêla byanza muulu. Cintu cya kumpala cidi cyenzeka, wêwè yônsò mujima bakupatula uya. Pashiishe ubanga kumona bintu bidiYe muswe bwa umanye, mwikale uleeja bintu bicivwawwa.

⁵⁶ Misangu mikwabo cidi cikafika pa kaaba kampanda, too ne pa kaaba kampanda, cishiisha ciimana. Kacyena cyandamuka cikeena-kumona to. Pashiishe Mifundu ibanga kuloka bu mvula. [Mwaneetu Branham udi utuuta cishonto misangu isatu—Muf.] Nkwata crayon wanyi, bwa ncilu kucipwa mwoyi to, nenku ncifûnda, ncifûnda.

⁵⁷ Nenku ngalukila kumbelu ne nkeba mwaba udici, ncilonga. Pàmwãpa kacyena nansha ne cidici cyamba bwanyi mêmè pândi munkaci mwa dicikeba apu to. Ke pashiishe, paanyima paa katangi, ke cyôci eci! Cindenga, kadi cya kabidi. Pashiishe ngangata kâlîpè kakese mushindu *ewu*, nenku mbanga kufunda lukasalukasa, anu ne mwanyi mwônsò, bidiYe ungambila abi. Mêmè kudyambidila ne: “Mukalenge, nênye ku tabernacle nkabâmbilè. Nê-. . . ‘Pwekaayi kuneeku.’ Bu mûndi mupete cintu kampanda bwabo bôbô.” Ee, mushindu awu ke utuci cilwa. Anu nanku menemene. Too, dyambedi, piikalaYe kayi mucimpeeshe to, ncyêna mwa kucipatulaku to.

⁵⁸ Nenku, apu, tuntu tukese tуди tufunda lukasalukasa etu ke tunutu nummona ntapà dîsù atu. Nenku cyôci eci, dyambedi, ke cîngââkabangâ, ncivwa mwanji kupeta eci citupa to too ne paakapitaku dituku dimwe anyi abidi, mu diitu mwamwa.

⁵⁹ Mpindyewu, bantu aba badi—badi. . . Peetelo udi wamba, mwaba ewu, mutudi mwa kwikala baabanyanganyi baa ngiikadilu Wende wa Bunzambi. Mpindyewu, muntu ne muntu wa kutudi udi uteeta bwa kukola too ne mu cipidi cya Nzambi.

⁶⁰ Mpindyewu, paanyima paa twêtù bamane kujikija Bitampi Mwandamutekete, nenku, mu cikondo aci cya dyela dya mpungi wa Citampi cya Mwandamutekete, anyi dikutulula. . . Mu bushuwa bwa bwalu, tуди bamanye ne citampi ncinyi, mbwa kukutulula mudimu wa bwambi, kukutulula Bitampi Mwandamutekete. Nenku netumone cyôci aci pa dizola. Nkukululula Mukenji kampanda, cintu ciikale citwa citampi.

⁶¹ Diloolo dya dyalumingu dyâshââdi edi, mwawa muyiishe pa: “Lusapi.” Ne lusapi ndiitabuujà. Diitabuujà ndidi dilame lusapi, ne lusapi m’Mufundu. Ne Kilisto ke Ciibi. Nwamonu

anyi? Pa nanku diitabuuja didi dyangata ndungilu mikese ya Mufundu kadi kukangula matumbi ne bwimpè bwa Nzambi, dibikangwila cisamba Cyende. Nwamonu anyi? Pa nanku, didi, diitabuuja ndidi dilame lusapi ludi lukangula Kilisto bwa cisamba; lukangula cyôci eci, lucibuulula.

⁶² Pa nanku, leelu ewu, netuteete bwa kwangata lwôlò lusapi lumwelumwe alu, bwa kukangula njila wa kulwa mwena Kilisto udi ne bukole mu cipidi cya Nzambi, bwa ne, ikale Tabernacle udi ne mwoyi bwa Nzambi udi ne mwoyi wamona mwa kusòmbelamù.

⁶³ Nwavulukaayi ne, Nzambi udi uDibuulula mu mishindu isatu. Musangu wa kumpala, Yèyè wakaDibuulula mu Dikunji dya Kapyà, aci cyakabiikidiibwa ne m'Buutaatu. Pashiishe Nzambi umweumwe awu, mumweneshiibwe mu Yesu Kilisto, uvwaYe mwibake mubidi, mwenze mubidi ewu. Musangu mwisâtù, kupicila ku lufu lwa mwine mubidi awu, Yèyè kujidila Ekeleeziya bwa Yèyè kumona mwa kusòmbelamù. Civwa n'Nzambi kumutu kwetu; Nzambi neetu; Nzambi munda mwetu; Nzambi umweumwe awu.

⁶⁴ Ke bwa cinyi cyakabiikidiibwa ne n'Taatu, Mwânà, Nyuma Mwimpè. Kacyi Nzambi isatu to; midimu isatu ya Nzambi umwepele. Bu nanshà bapete miine meeji awu ku Nsangilu wa Nicée, nunku katuvwa mwa kwikala mu cibwejakaji cyôsò eci to, kî mmwômò anyi? Mmwômò. Kî nnzambi isatu to. Bantu kabavwa mwa kubyumvwa mushindu uvwa Yesu wakula ne Taatu to, ne Yèyè ne Taatu badi Umwe. Ee, ke mwaba awu udi bwalu mu kaabujima busanganyiibwa. Cya bushuwa, ucivungulula anu naka. Cya bushuwa. Nwamonu anyi? Kî n'Nzambi isatu to. Midimu isatu! Mishindu isatu ya dimwen- . . .

⁶⁵ Ncinyi ciine aci? Nzambi mwikale wenza bu udi upweka milongo kudi bufùki Bwende. Nzambi utu muswe baMukuukwile. Mwaku ewu *Nzambi* udi uumvwija ne “cintu cya dikuukwila.” Nenku n'Nzambi uteeka bantu Bende mu ngiikadilu udi ukengediibwa, bwa Yèyè amone mwa kupeta kudibo cyàkabàfùkilàYe. Kaakakwenza bwa kwikala cingà cintu pa kuumusha mwânà wa balume ne wa bakaji wa Nzambi to. Wèwè mupangile aci, kwikala mwânà wa balume ne wa bakaji wa Nzambi, udi mupangile kiipacila.

⁶⁶ Nenku “kupangila,” mwaku ewu *m-p-e-k-a-a-t-u* udi uumvwija “kupangila kiipacila,” kupangila kiipacila. Nenku, mèmè ngasa cintu ciludikila, ngela dizaji mu ntanta wa yards makumi ataanu [mètres 47,72], mpindyewu ngasa; ngangata cingoma cyanyi ngasa, kadi mpangila cyôci aci, mu ntanta wa byâlà binaayi anyi bitaanu [centimètres 10 anyi 13], cidu cyenzeke ncinyi? Bikengela kujaalamija ndudi ya cingoma cyanyi aci. Kudi katanyi mwaba awu. Nenku mèmè mupangile diitabuuja mu Nzambi, mèmè mupangile kwikala mwena

Kilisto . . . Nzambi wakakuteeka mwaba ewu bwa wêwè kwikala mwena Kilisto. Wêwè museesuke muye ku luseke lumwe, alukila bajaalamije ndudi. Nenku kudi cintu anu cimwepele cidi mwa kukujaalamija ndudi, ke Mifundu. Nyuma Mwîmpè mu Mifundu, ukujaalamija, ukupingaja cyakabidi buludi ku cintu ciludikila. Ncya bushuwa.

⁶⁷ Mpindyewu netulonge Dìyì Dyende. Stefano wakamba, mu Byenzedi 7, kabidi ne mu . . . Twänjààyi kubala cyôci aci. (Citudi twamba mpindyewu eci, tudi twakula bwa Tabernacle kampanda wa Nzambi.) Mpindyewu, Stefano wákamba ne . . . (Mwikale, neciikale Tabernacle kampanda udi ne mwoyi wa Nzambi udi ne mwoyi.) Stefano ke udi mwambe, mu Byenzedi nshapita wa 7, ne ndi ngela meeji ne tudi . . . mu Byenzedi 7, tubangila ku mvense wa 44:

Baataatu beetu bavwa ne tabernacle wa bujaadiki mu cipeela, bu mukaadiye mutume dîyì bwa kwenza, wambila Mòsà, bwa ne uwwa ne cya kumwenza bilondeshile mushindu wakamonaye.

Yèyè mene awu wâkapetàbo kudi baataatu beetu, baataatu beetu baakabwela paanyima paa bôbô kubweja . . . Yesu mu bukookeshi bwa baa Bisamba bya bende, bavwa Nzambi mwipate kumpala kwa baataatu beetu, too ne ku dituku dya Davidi;

Yèyè wâkapeta dyakalenga kumpala kwa Nzambi, ne kujingaye bwa kupetela Nzambi wa Yakobo tabernacle.

Kadi Solomo ngwâkamwibakila nzubu.

Kadi Mutambe bunene wa mu Dyulu katu ùsòmbela mu ntempelu myenza ne byanza nansha, bu mudi muprofeta wamba ne:

Dyulu ke nkwaswa wanyi wa butumbi, ne buloba nkatambwa kaanyi kaa kuteekela makàsà, nanzubu kaayi unwangibakila nwênù? mudi Mukalenge wamba, anyi mwaba wa ciikishilu cyanyi ngwèpi?

⁶⁸ Mpindyewu mu . . . Mpindyewu, “tabernacle,” udi, mu bushuwa bwa bwalu, mwaba utuyaaya bwa kwikishila, mpindyewu, kupetelamu cyashima, ne bikwabo, bu mudi kwikisha bwa kulaala tulu, anyi bikwabo. Mpindyewu, Ebelu 10, ku mvensa wa 5, Pôlò nyewu ucibwejamu.

Ke bwa cinyi padiye ulwa pa buloba, udi wamba ne: Mulambu wa mashi . . . (n’Kilisto awu.) . . . Mulambu wa mashi anyi mulambu wa bintu wêwè kwèna muswe to, udi mundongolole mêmè mubidi.

⁶⁹ Mpindyewu Tabernacle ncinyi? Mubidi kampanda, Nzambi mwikale musòmbèle mu Mubidi kampanda.

⁷⁰ Nzambi musangu kampanda, lwa kuulu kwaka, paakatuulukaYe pa mukuna, nansha bu—cimpanga cya ngombe

anyi ngombe yêyè mulenge mukuna awu, bavwa ne cya kumushipa. Nzambi ngwa cijila.

⁷¹ Makelelela diloolo, pavwa Banjelo abu babwikile mpala Yabo. Baselefima baa cijila ne mpala ya cijila, kabayi bamanye nansha mpekaatu mwine ne ncinyi to, kadi Bòbò mbenzejiibwe bwa kubwikila mpala Yabo, mu Bwikadi bwa Nzambi; babwikila makàsà Aabo, mu didipwekesha.

⁷² Mpindyewu, Nzambi wa cijila katuku mufwanyine kulekela mpekaatu pende anu nanku to, pa nanku cintu nansha cimwe kacivwa mwa kulenga ku mukuna kuvwa Nzambi aku nansha.

⁷³ Pashiishe Nzambi kudyzayeye mubidi ne kusòmbayè munkaci mwetu, mu mmwenekelu wa Yesu Kilisto, Mwanende wa balume, bufùki Bwende. Pashiishe Mwanende awu kufilaye mwoyi Wende, ne kabulu kaa Mashi kaa Nzambi kutaayikaku, bwa Mwoyi kupatukawu mu Mashi awu, bwa kulwawu kutudi.

⁷⁴ Ku Mashi awu nkutudi bakezudiibwe. Nenku mashi etu twètù, mwoyi wetu twètù, wa bwena wakafuma ku dijinga dya disangila dya mulume ne mukaji awu, ke wakapatula wetu mwoyi wa pa buloba. Mashi a Yesu Kilisto ngadi atukezula, ashintulula ngiikadilu wetu, pa kutuma Nyuma Mwimpè pambidi peetu; pa dîbà adi tudi tulwa mu ngiikadilu wa Bunzambi wa Nzambi, pa dîbà adi tudi tulwa cisòmbedi bwa Nzambi. Yesu wakamba ne: “Mu dituku adi nenumanye ne Mémè ndi munda mwa Taatu, ne Taatu munda Mwanyi; Mémè munda mwenu, nwènù munda Mwanyi.” Nudi numona anyi?

⁷⁵ Manyaaayi mushindu kaayi udi Nzambi mu Ekeleeziya Wende. Bikengela mpindyewu Ekeleeziya angate kaaba kaa Kilisto, mwikale utungunuka ne mudimu Wende wa bwambi. “Ewu udi ungitabuujja Mémè, byenzedi bìndi ngenza neabyènzè pende. Mu katanci kakese emu, baa pa buloba kabaakuMmona kabidi to; kadi nwènù nenuMmone, bwalu Nèngikalè neenu, munda mwenu mene, too ne kundeelelu kwa buloba.” Nwamonu anyi? Ke bwalu mbwabu, kutungunuka ne mudimu Wende.

⁷⁶ Mpindyewu, Nzambi, anyi Bible ngudi mwambe mwaba ewu, cyôci aci. Stefano wakamba mwakaasa Solomo ntempelu ne: “Nenku Mutambe bunene wa mu Dyulu katu usòmbela mu ntempelu myenza ne byanza to. ‘Bwalu Dyulu didi nkwaswa Wanyi wa butumbi, ne buloba budi katambwa Kaanyi kaa kuteekela makàsà. Kadi mwaba wa ciikishilu Cyanyi udi penyi?’ ‘Kadi Wèwè udi mundongolole Mémè Mubidi.’” Amen. Nwâfikì’s.

⁷⁷ “Wèwè udi mundongolole Mémè Mubidi.” Nzambi udi usòmbela mu cipidi cya muntu kampanda, mwikale udileeja Yêyè mwine mu cimfwanyi mu Kampanda awu. Dikuukwila dipwangane! Nzambi munda mwetu twètù, twètù biikale Tabernacle Wende, Nzambi udimwenesha. Kaa, s’tudi bafwanyine kushaala pa cyôci aci too ne panudi nuumvwa cipwidiji muneemu emu, bwa luuya elu. Tangilaayi numone,

ne, Nzambi misamgu yônsò, dîbà dyônsò, utu anu udimwenesha Yêyè mwine mu cimfwanyi mu muntu.

⁷⁸ Uvwa n’Nzambi munda mwa Môsà. Mutangilaayi yêyè awu, mulediibwe mulombodi; Kilisto. Mu cikondo cyakamulelabo kuvwa dikengesha dya bânà, bakeba bwa kumupeta yêyè; cintu cimwecimwe cyakenzeka bwa Kilisto. Kadi wakalwa—wakalwa kusungidiibwa mu ciine cikondo aci; ne Kilisto pende. Yêyè wakadi mufidi wa mikenji; ne Kilisto pende. Môsà wakabanda ku mukuna, matuku makumi anaayi, ne wakapeta mêyî matuma, ne wakatuuluka ku mukuna. Kilisto wakaya mu cipeela, matuku makumi anaayi, ne wakaalukila, wamba ne: “Nwâkuumvwa bantu baa kale bamba ne: ‘Kwendi masandi.’ Kadi, Mêmè ndi nnwambila ne, ewu yônsò ukâtàngidi mukaji, bwa kumwalakana, wamanyi kwenda nende masandi.” Nudi numona anyi? Maalu ônsò mashiileshiilangane aa, civwa, Nzambi udileeja Yêyè mwine mu cimfwanyi.

⁷⁹ Tangilaayi Yozefu, mulediibwe mwânà wa balume wa nyuma munkaci mwa—mwa cisumbu cijima cya bânà baabo. Bônsò bavwa bantu bîmpè, bônsò bankambwa. Kadi, paakalwa Yozefu, uvwa yêyè mushiilangane. Uvwa mwa kumona bikeena-kumona, kuumvwija biloota, kadi baakamukina kudi bânà baabo bwa ciine aci. Anu bwa mudimu mene uvwa Nzambi mumuteekele pa buloba bwa kwenzaye, bânà baabo kumukina bwa ciine aci. Nwamonu anyi? Nenku bivwa byônsò bifunkuna nkuruse. Nenku, tangilaayi, baakamusumbisha ku binjanja bya mfranga bitwe ku makumi asatu, kudi bânà baabo. Kumwimanshabo mu dijimba, bwa kufwaye, kudi bânà baabo. Baakamupatula mu dijimba adi, kuya kasombayè ku dyabalume dya Pâlò. Nenku muntu nansha umwe kavwa mwa kulwa kudi Pâlò to, yêyè uvwa ne bukontononyi bwa buloba bujima mu diine dituku adi, muntu nansha umwe kavwa mwa kulwa kudi Pâlò to, anu mupicile kudi Yozefu. Muntu nansha umwe kêna mwa kulwa kudi Nzambi to, anu mupicile kudi Kilisto. Nenku pavwa Yozefu uumuka mu nzubu wa bukalenge, kumpala kwa kuumukaye, kuvwa mpungi udila, ne banyeemi baa lubilu bavwa banyeema lubilu kumpala kwende, benda beela mbila ne: “Twayi cinù! Yozefu nyawu ulwa!” Nansha wêwè usanganyiibwa penyi, anyi mwikale wenza cinyi, nansha mudimu webe ne mushinga wa bishi; uvwa ne cya kupona panshi ku binù too ne pavwa Yozefu ne cya kufika mwaba awu.

⁸⁰ Nenku paadila Mpungi, abidi adi panshi aa, cinù cyônsò necitwe panshi ne ludimi lwônsò nelujikule patooke. Paalwa Kilisto, wetu Yozefu, ushiya Butumbi ulwa, mudimu webe kawakwikala ne mushinga pa dîbà adi to. Cinù cyônsò necitwe panshi, ne kujikula ne Yêyè ke Mwânà wa Nzambi. Ncya bushuwa.

⁸¹ Kaa, mushindu mwine utudi tuMumona mu Davidi’s we! Mushindu wakadi Davidi, mfumu mubengiibwe, bamutonkole

mu nkwaswa wende wa butumbi, kudi bânà baabo, mwanende wa balume mulela, kusòmbayè pa Mukuna wa Oleve, pavwaye wenda ubanda, ku lusongo lwa Mukuna wa Oleve, waluja mèsù pa Yelusalema kadi kwasaye mwadi; bwalu mwômò amu bantu baa cisamba cyende sungasunga, bavwaye mukwacile mudimu ne mulongeshe Nzambi, bantu baa cisamba cyende sungasunga bamusaka kule benda bamwasa mangùlùbà, bamutwila mate ne bamwelulwila, pavwaye wenda ubanda mukuna mwikale mubengiibwe. Kaa, cimfwanyi kaayipu cipwangane cya Mwânà wa Nzambi, paakapitaku bidimu nkama mwandamukulu; Mfumu mubengiibwe, munkaci mwa bantu baa cisamba Cyende sungasunga, kusòmbaYè pa mukuna udila Yelusalema, mwikale Mfumu mubengiibwe.

⁸² Civwa ncinyi? Nzambi mwikale udileeja Yèyè mwine mu cimfwanyi mu baprofeta abu, biikale baleeja Kilisto mu cimfwanyi.

⁸³ Pashiishe kulwaku Kampanda uvwa bupwangane bwa Nzambi. Uvwa Nzambi munkaci mwetu.

⁸⁴ Nenku kubangila ku cikondo aci, Yèyè mmudiileeje Yèyè mwine mu cimfwanyi mu Ekeleeziya Wende, luseke lwa dya kuneeku kwa Kalvariyo. Pa nanku, nudi numona, tudi bônso tudyenzeja bwa kuya kafika pa cisòmbedi eci, Tabernacle ewu wa Nzambi udi ne mwoyi. Mpindyewu kudi bamwe bantu . . .

⁸⁵ Tudi tumona apa, mmwambe ne: “Kumpalampala tudi ne diitabuuya, bukole, dimanya, didikanda, lutuulu, bwimpè anyi difwana dya Nzambi, ne dinanga dya bwânà bwetu.” Bîmpè. Dinangangana dya bwânà bwetu, ne pashiishe kusakidila dinanga. Anyishaayi mbale eci, cyônso, ncibalulule cyônso, bwa nwikale batwishiiibwe ne nudi bacyûmvwè mpindyewu. Mpindyewu netubangile ku mvensa wa 5.

Nenku pa kuumusha cyôci eci, biikale badifile ne cisumi cyônso, ku diitabuuya dyenu nusakidile bukole, ne ku bukole dimanya,

Ne ku dimanya didikanda, ne ku didikanda lutuulu, ne ku lutuulu difwana dya Nzambi,

Ne ku difwana dya Nzambi dinangangana dya bwânà bwetu, ku dinangangana dya bwânà bwetu luse, ludi lwikale dinanga.

...bintu ebi byôbi munda mwenu, ne biikale bivulangane, bidi byenza ne kanwikadi baatuke anyi kanuyi nukwama mamuma mu dimanya dya Mukalenge wetu Yesu Kilisto.

⁸⁶ Mpindyewu, Peetelo udi munkaci mwa kutuzolela cintu kampanda mwaba ewu, mushindu wa kufika kwine aku.

⁸⁷ Mpindyewu, ndi njinga kwamba cintu eci, ne, kudi bamwe bantu badi ne ndambu wa bwine bukole ebu,

dimanya, lungenyi, lutuulu, ne bikwabo, batu kabayiku nansha badyamba ne mbeena Kilisto to. Mpindyewu tudi anu . . .tudi tulongesha kalaasa kaa dyalumingu. Kadi ncyà bushuwa. Kudi bamwe bantu batu ne ndambu wa byôbì ebi, kabayiku badyamba mudibo beena Kilisto to. Kadi aci kacyena . . .Aci kacyakukumbaja bwalu to. Aci cidì anu bu nyuunyi mufiike uteeta bwa kudisomeka masala a nyuunyi wa kayiba mu mapwapwa ende awu, bwa kumuvwijawu nyuunyi wa kayiba. Cidiye udi udifwisha anu bundu cyanaana. Bipiciibwe ne yêyè mushaale anu nyuunyi mufiike. Nwamonu anyi? Pakaadiye udyenzeja ne biine bintu ebi yêyè pende kayi mwena Kilisto to, s'udi anu mu mwaba udi kawuyi wende to.

⁸⁸ Mbyenze anu mudi mucì wa sycomore udyenzeja bwa kwenza ma-pommes. Kawena mwa kucyenzaku to, nwamonu's, nansha mudiwu paawu mucì amu. Kadi kawena mwa kwenza ma-pommes to.

⁸⁹ Mbyenze anu mudi kampundu kateeta bwa kukwatakaja myôsà ya mukooko, kaditacisha bwa kwikalaku mukooko kadi paaku kiikale myôsà ya mukooko, anyi, kiikale kampundu. Nudi numona, kakeena mwa kukwatakaja myôsà ya mukooko to. Kakeenaku mwa kuyenza to. Myôsà ya mukooko ndipà dipeesha mukooko, kî ndipeesha kampundu to. Nkafwanyine kudyenzeja bwa kwenza maalu bu mukooko, kadi kôkò kadi anu kampundu. Nwamonu anyi? Pa nanku, ke kôkò aku ne: "Ee, mêmè's ndi mwa kudya bu mukooko. Ndi mwa kwenza *cikampanda* bu mukooko." Nenku nansha wêwè mwa kwenza nî ncinyi nî ncinyi, bikengela wikale mukooko bwa wêwè kwikala ne myôsà ya mukooko.

⁹⁰ Nenku anyishaayi ngimane ndambu kaaba aka. Mukooko kawutu ukwatakaja myôsà to. Utu ne myôsà ya mukooko bwalu mmukooko. Bantu bààbûngì batu bateeta kwamba ne: "Ee, nênditâcishè bwa kulengela. Nênditâcishè bwa kwenza *cikampanda*." Wêwè kukwatakaji cintu nansha cimwe to. To, kwêna mwa kucyenza to. Mukooko kawena ucyenza to, kabeena bawulomba bwa kucyenza to, kabeena batekemena ne newukwatakaje myôsà to. Wôwò udi utoloka myôsà ayi, ne wôwò mwine udi uyitoloka bwalu mmukooko.

⁹¹ Nenku paudi mwena Kilisto, udi ukwama wêwè anu cyanaana mamuma a Nyuma. Kwêna—kwêna uàkwàtakaja to. Kwêna uditacisha bwa kubikwatakaja to. Udi uteeta . . .Wêwè kùdyênjì cintu kampanda cyûdì kuyi to. Wêwè udi ulwa anu cidì cikengela wêwè kwikala aci, nenku pashiishe cyôcì aci necidyênzèkèlè nkaayaaci. Nukaadiku bumvwe bantu bamba ne: "Ee, s'nyawu nkwambila. Ndi . . .ngâdyênjì mwena ekeleeziya. Bi—bikengela anu ndekele mashimi aa"? Ke wêwè udi uteeta kukwatakaja kabidi cintu kampanda awu, bwa mpindyewu. Kwêna mwa kucyenzaku to, pa nanku kabyena bikengela kuditacisha bwa kucyenza to, anu mudibi ne—ne—kampundu

kakeena mwa kufika ku diditolweshwa myôsa ya mukooko to. Kakeena mwa kucyenzaku to.

⁹² Anyi, ciminyi citeeta bwa kudya pamwe ne nkuci, ciminyi citeeta—ciminyi uteeta bwa kwikala nkuci. Nudiku mwa kudifwanyikijila kabangu nyuunyi pambelu paapa, wamba ne: “Udi mumanye’s, mêmè ewu’s ndi nkuci,” udisomeka ndambu wa masala, wamba ne: “Monaayi, ngăfwànyanganyi ne...” Nwamonu anyi? Yêyè’s mmufwanyine anu kwikala mu mushindu udi kawuyi wôwò to. Awu ke—ke muntu udi udyamba mudiye cintu kampanda padiye kayi cyôci aci to. Nwamonu’s, kwèna mwa kucyenza to.

⁹³ Kwèna mwa kwamba ne: “Mpindyewu monaayi, bidi bikengela mêmè kwikala ne bukole, nenku ndi muswe kwikala ne bukole. Bu mudibi bikengela bwa mêmè kwikala ne nsômbelu wa difwana dya Nzambi, nanku ndi muwe anu ne cya kwikala naadi.” Mona’s, wêwè’s udi anu uteeta bwa kudisomeka masala. Nansha mudibi ne adi pabwîpî paa wolola cyanza ulenga, kadi kwèna mwa kwasa masala pa nyuunyi udi kayi mwenawu to. Nwamonu anyi? Kabyakukumbanaku to. Ne byôbî biine bidi bileeja anu ne nyuunyi awu mmwena lubombo wa mushindu kaayi. Nwamonu anyi? Nudiku mwa kudifwanyikijilaku kabangu nyuunyi mukulakaji uteeta kwangata masala abidi a nkuci, wamba ne: “Tangilaayi kuneeku, monaayi, ndi nkuci?” Nwamonu anyi? Mona’s, twètù bônso’s tudi bamanye ne nkabangu nyuunyi. Nwamonu anyi? Nwamonu anyi? Kwajiki. Tudi mwa kwamba ne nkabangu nyuunyi.

⁹⁴ Ee, mpindyewu mushindu awu ke udibi, kuteeta bwa—bwa kukwatakaja bwena Kilisto. Kwèna mwa kucyenzaku to. Cintu cya kumpala cidi cikukengela kwenza, nkulediibwa cyakabidi. Bikengela ushintuluke. Nwamonu anyi? Nenku paudi ushintuluka, udi ulwa cifûkiibwà cipyacipyà. Mpindyewu udi wenda ulongoloka, mpindyewu. Nwamonu anyi? Mpindyewu kabyena bikengela kuditacisha bwa masala to, nebidyènzèkèlè, pa—pawalediibwa cyakabidi. Eyowa’s, mukalenge.

⁹⁵ Anu mûnkaadi mwambambe. Wangata ngu—ngulube, umunyaanuna kadi kumuvwadika nkooci wa tuxailor, anyi nkooci wa tuxedo, yêyè awu’s we, kumuvwadikaye, kadi kumulekela kuyaye pambelu paapa; yêyè’s uyaaya anu buludi mu ciinà cya bitoci udivwandamu. Bwalu, nwamonu’s, kaciyena ne cidici cifwanyine kwenza to. Yêyè’s nngulube. Ke wende pende ngiikadilu awu. Kudivwanda kwa mu bitoci ke wende ngiikadilu. Bikengela ushintulule ngiikadilu wende awu, nenku (yêyè) bikwabo byônso nebidyènzèkèlè.

⁹⁶ Mpindyewu, tangilaayi. Wêwè udi ne cya kulediibwa cyakabidi, mbwena kwamba ne, kushintuluka. Bikengela kwikale dishintuluka.

⁹⁷ Wêwè udi wamba ne: “Ee, Mwaneetu Branham, ntu mumanye mukaji kampanda muneemu emu, mona’s, yêyè kacya katuku mwanji kwenza bwalu bubi to. Yêyè utu mukaji mwîmpè. Anyi, muntu *kampanda* ewu, utu muntu mwîmpè. Katu wenzaku yêyè bwalu to. Wêwè ewu’s udi mumanye ne yêyè katu wenzelangana bibi.” Aci kacyenaku ne cidici cyamba to. Mmufwanyine kwikala mwena mutumba mwîmpè, kadi kî mmwena Kilisto to anu yêyè mulediibwe cyakabidi.

⁹⁸ Yesu wakamba ne: “Muntu yêyè kayi mulediibwe cyakabidi to,” Yone Munsantu 3, ne, “kêna nanshà mwa kumonaku Bukalenge to.” Mpindyewu, mbwena kwamba ne, *kumona*, mbwena kwamba ne “kuumvwa.”

⁹⁹ Udi utangila cintu kampanda, wamba ne: “Ncyêna anu mucimone to.” Udi uswa kwamba ne kwêna mucyûmwè to.

¹⁰⁰ Muntu kêna mwa kuumvwa ne mbwa cinyi bantu badi beela mbila to. Muntu kêna mwa kuumvwa ne mbwa cinyi ngaakwilu wa muntu mmufwanyine kushintuluka ne yêyè kwakula mu myakulu to. Muntu wa musunya kêna mwa kuumvwa mudi butumbi bwa Nzambi bufwanyine kulwa pa mèsù a muntu, nenku yêyè mufwanyine kumona cikeena-kumona ne kulondela bantu bintu kampanda, ne bidi bikengela kwenza to; kubambila maalu adi pawîpi ne kwenzeka, ne kulongolola maalu adi ne cya kwenzeka, mwâtwènzèdibo kudi Mukalenge mwaba ewu diloolo dya makeelela adi, menemene. Nwamonu anyi? Nwamonu anyi? Mee—meeji a musunya ôwò adi ateeta bwa kudifwanyikijilabi. “Ee, cyênjiye aci ncinyi? Anyi, ndijimbu dya mushindu kaayi didiye wenza edi? Ndiyelè kaayi didiye naadi?” Pa kumona muntu wakula mu myakulu, mbafwanyine kwamba ne. . . ne muntu mukwabo wandamuna wambila anu menemene cidimba kampanda cya Mubidi bwalu budiye mwenze, ne cidiye kayi ne cya kwenza. Nwamonu anyi? Nwamonu anyi? Bôbò badi beela meeji ne ndijimbu dya mushindu kampanda. “Kudi cintu cidibo balongolole munkaci mwabo amu.”

¹⁰¹ Muntu awu kêna mwa kucyumvwaku to padiye kayi mulediibwe cyakabidi. Nenku padiye ulediibwa cyakabidi, ke padiye mu njila wa bwobumwe, bwalu ukaadi cifûkîibwà cipyacipya. Muntu wa kale uvwa mutaludyanganyi wa maalu awu, wa mpatà awu, wâfù. Mpindyewu, ukaadi cifûkîibwà cipyacipya. Pa nanku, nwamonu’s, kabyena bimukengela bwa kusakidilaye cintu kampanda ku cyende yêyè to, mpindyewu, bwalu nebisakidiibwe anu bu bidi pa mukaba.

¹⁰² Tangilaayi, wêwè udi ne cya kulediibwa cyakabidi. Nenku paudi ulediibwa cyakabidi, kwêna mwa kulediibwa cyakabidi kuyi ne diitabuuja to. Ncyà bushuwa. Pa nanku, nwamonu’s, pa dizola dyanyi apa, ndi ne cishimikidi cyena diinà, diitabuuja ke cishimikidi cya byônso abi. “Bwalu kakuyi diitabuuja kabyena mwa kwenzekaku bwa muntu kusankishaye Nzambi to. Ewu

udi ulwa kudi Nzambi udi ne cya kwitabuuja ne Yêyè udiku, ne m'Mufuci wa aba badi baMukeba ne lukunukunu." Nwamonu anyi? Ke cidiye ne cya kwikala. Nenku paudi mwena mpatà ku Bible, paudi mwena mpatà ku ne Dîyi ndilelela, abi mbipiciibwe ne wêwè mushaadile paanyima too ne pawanji kwitabuuja.

¹⁰³ Mpekaatu ncinyi? Bupidya. Kudi bintu anu bibidi bidi bikontonona muntu. Cidi anyi mpatà anyi diitabuuja, eci anyi eci. Udi mukwaciibwe kudi cidi cikookesha nsômbelu webe. Mabilaale anu ku búngi bwa diitabuuja dyûdi naadi, mwaba ûdi mwa kubanda kufika awu.

¹⁰⁴ Kadi, dyambedi, bikengela ciikale diitabuuja. Anyishaayi nshaale pa cishimikidi aci ndambu. Mpindyewu, diitabuuja ncyûdi ne cya kwitabuuja aci. Diitabuuja didi. . . "Diitabuuja nkulenga kwa bintu bitekemena." Didi, wêwè ukaadi mumane kwikala naabi paudi upeta diitabuuja, bwalu mbibuuludiibwe mu diitabuuja. "Diitabuuja nkulenga kwa bintu bitekemena," Ebelu 11, nwamonu's, "cileeji." Ncinyi ciine aci? Ncileeji cya mushindu kaayi? Cileeji cya cijila.

¹⁰⁵ Ke bwa cinyi, paudi wamba ne: "Mwaneetu Branham, ndi ngitabuuja ne Nzambi m'Mwondopi." Ee, pawikala witabuuja cyôci aci, ne pashiishe uMwitaba bu Mwondopi webe, ne kuyi udinga to, kadi mwikale witaba mu bulelela ne ku mibundabunda Yende udi mwondopiibwe, kakwena cintu cyakuumushaku to. Cikaadi cintu cimana kujikija. Mpindyewu udi mufwanyine kwikala ne ditekemena, anu wepela kuya pa *cikampanda* ne kwepela kuya pa *cikansanga*. Kadi paudi ne diitabuuja, wêwè udi mucimanye, bwalu ncileeji. Ukaadi mumane kucipeta. Mvwa . . .

¹⁰⁶ Mbanganyi, nî nganyi nî nganyi, bavwaku bateeleje Oral Roberts mu dinda emu, pavwaye uyiisha mu dinda emu, Oral Roberts? Mêmè—mêmè mvwa mumuumvwe wamba cintu kampanda anyi cintu kansanga cya ne kudi diitabuuja kampanda, dya disungidiibwa, kusambila disambila dya diitabuuja, dya disungidiibwa. Wamba ne: "Enza ditwangana dyebe pa kulenga cisanji, enza ditwangana dyebe pa kulenga cintu kampanda, bwa. . ." Ke muntu awu pende wenza nanku, bwa cyôci aci cyamona mwa kupa bantu cintu kampanda bwa bamone mwa kuteekapu byanza. Cintu kampanda, wêwè wamba ne: "Ngâcìpecì mpindyewu, bwalu yêyè wangambidi bwa mêmè kulenga cisanji cyanyi. Ngâcìpecì." Nwamonu anyi? Mpindyewu, abi bidi anu bîmpè. Kadi, mpindyewu, diitabuuja dilelela dishuwashuwale kadyena ne bwalu bwa kulenga nansha cimwe cya ku bintu abi to. Mpindyewu, ncyèna mpiisha Mwaneetu Oral to, nansha kakese. Yêyè udi munkaci mwa kwenza mudimu munene, ne yêyè mwine mmuntu wa difwana dya Nzambi, nenku bulelela mêmè—mêmè ndi ntwâ Oral Roberts mushinga wâbûngi. Lutatu ndwa ne katwena ne baa bu yêyè awu bââbûngi to.

107 Kadi cîndi nteeta kwamba, cidi—cidi ne, diitabuuja kadyena dikengela cintu kampanda to. Nwamonu anyi? Diitabuuja didi diitabuuja Dîyì dya Nzambi. Bwalu diitabuuja didi difuma ku “dilenga” anyi? To. “Diitabuuja didi difuma ku dyumvwa, ne ku dyumvwa dya Dîyì dya Nzambi.” Aci ke cidi cidyelesha lwongo. Didiku. Nwamonu anyi? Nenku diitabuuja, bu mudibi byambiibwe emu, kaditu ne ntanta bwa kafika ku cyôci aci to. Diitabuuja mmpindyewu mene. Diitabuuja ng’apa. Mpindyewu byenze bu ne kudi muntu kampanda . . .

108 Mwânà mukese wa mu diboko awu, dikwabo dituku. Maamu wa bwena uvwa Mwaneetu wa bakaji Kidd ne bakwabo biikale bamba awu, uvwa ne mwânà mukese wa mu diboko mwikale ne mala pambelu, njila wa bunyawu kayi muunzuluke to, wa byakudya kwikalabi bipicila. Mpindyewu, inăbânzà ewu, paakumvwaye Mwaneetu wa bakaji Kidd ne bakwabo biikale bafila bujaadiki, kwitabuuja ne bu yêyè anu mwa kulenga, ne mêmè musambidile anu mwânà wa mu diboko awu. Mpindyewu, nudi numona, Nzambi utu utupa bantu . . .

109 Bamwe baa kutudi batu benza malabula ne Nzambi, a— a bushuwa menemene mu mushindu wa ne Nzambi mmwenze anu bu uyaaya mwaba ewu, bu nanku awu, nenku mwikale wakula ne Mwaneetu Neville anyi ne muntu kampanda ûdi wêwè mumanyangane nende. Nenku tutu misangu mikwabo tulomba biine bantu abu bwa kutusambidilabo. Ke citudi ne cya kwikala twenza. Nanku twêtù ne diitabuuja dya ne muntu mulume awu anyi mukaji awu, mwine yônsò udi utusambidila awu, udi wakula ne Nzambi, pa dîbà adi diitabuuja dyetu didi dyela nzadi dikwata. Didi dikwata ndendende. Bwalu mbujike.

110 Bwalu mbwebu. Mwena Loomo awu wakaya bwa yêyè kupetangana ne Yesu. Ke kwambaye ne: “Mêmè—mêmè ncyêna mwakanyine bwa Wêwè kulwa mu wanyi nzu bu to. To. Ncyê—ncyêna mwakanyine to. Nenku nci—ncivwa ncivwa . . . Ncyê—ncyêna ndibala mu mushindu awu to. Kadi,” yêyè ne, “mwanaanyi wa balume udi usaama be. Nenku Wêwè amba anu Dîyì cyanaana, wamonu’s, mwanaanyi neikale ne mwoyi.”

111 Civwa ncinyi? Ntanta kavwa ne bwalu to. Nwamonu anyi? Bwalu, Nzambi utu myaba yônsò. Nzambi utu wa bukole bwônsò. Nenku mwaba wônsò udi Nzambi usanganyiibwa, bukole bwônsò budi mwaba awu. Ne Nzambi mwine, bu mudiYe myaba yônsò, bidi byenza ne Nzambi ikale myaba yônsò, kwônsòkwônsò. Nwamonu anyi? Nzambi mmunene mu Allemagne, mu Suisse, ne mu Afrike mwamwa, mu kasunsa kamwekamwe aka, anu mudiYe mwaba ewu ewu. Kaa! Kadi’s ke bwalu abu.

112 Ke mpindyewu yêyè ne: “Ncyêna mwakanyine bwa Wêwè kulwa ku wanyi nzu bu to. Amba anu Dîyì.” Civwa ncinyi? Civwa ndiitabuuja dya mwena Loomo awu. Wakaciitabuuja.

Ke Yesu kwambaye ne: “Kwata njila ndaaku. Mwaneebe udi ne mwoyi.”

¹¹³ Ke yèyè kwasa lwendu kuya, lwendu lwa matuku abidi. Nenku paakacyabu, kumpala kwa kufikaye kumbelu, yèyè kusambakeena ne bamwe baa ku beena mudimu bende biikale benda balwa. Bôbò ne: “Mwaneebe udi ne mwoyi.”

¹¹⁴ Ke mwena Loomo awu kutupikaye bikole ne disanka, kufikaye ku dyamba ne: “Mpa dîbà kaayi adi dya dituku dyabangiye kuumvwa bîmpè? Civwa citupa kaayi cya dituku?”

Awu ne: “Tukaavwa twipacila pa dîbà dya dikumi ne dimwe, ke paabangiye kusanguluka.”

¹¹⁵ Ke mwena Loomo awu kumanyaye ne civwa mpa dîbà adi menemene pavwa Yesu mwambe ne: “Mwaneebe udi ne mwoyi,” ne yèyè uvwa mwitabuuje. Amen.

¹¹⁶ Wa bukole bwônsò, mwikale myaba yônsò, mumanyi wa byônsò, kayi mikalu, ke Nzambi nyawu. Nenku, padibo babiikila ku telefone bamba ne: “Sambila!” Ditwangana adi! Nenku diitabuuja dyebe ndidi ditwala Nzambi. Ke cintu cididifishisha disambila ne Nzambi ku ne, bitwilangane, mu cyalu. Disambila! Disambila ditu dishintuluka dyumuka *apa* diya *apa*. Dyôdi ndidi ditwangaja byôbi abi pamwe.

¹¹⁷ “Amba Dîyi. Cyônsò cîndi nkeba bwa Wèwè kwenza nkwamba Dîyi, ne byônsò nebilongoloke.” Nudi numona’s, kabivwa bikengela anu Yèyè kwikalapu to. “Amba Wèwè anu Dîyi.” Bwa cinyi? Nzambi utu myaba yônsò. Utu mwena bukole bwônsò. Yèyè udi ne bukole mwinshi mwa buloba anu mudiYe naabu kumutu kwa buloba, anyi luseke lukwabo lwônsò. Yèyè udi Nzambi. “Nenku cintu cimwepele cididifishisha Wèwè kwenza nkwamba anu Dîyi cyanaana,” mwakambaye.

¹¹⁸ Nenku, mpindyewu, diitabuuja didi dyanza bikwabo bidi bishaala abi. Diitabuuja didi dyanza bikwabo bidi bishaala abi. Nenku udi ne cya kwikala ne diitabuuja bu cishimikidi. Bwena Kilisto bwônsò, cyônsò cyûdi aci, cyônsò ciwikalaku aci, ncishindameene pa diitabuuja mu Dîyi. Ke bwalu kaayi mêmè ndi ngitabuuja Dîyi. Nwamonu anyi?

¹¹⁹ Ncyêna mwa kuteeka dyanyi diitabuuja pa cîngà cintu to. Mêmè mwambe ne nditeeke pa ekeleeziya, mpa ekeleeziya kaayi pângààditeèkà: ngwa Katolike, ngwa ba-Luthériens, ngwa ba-Méthodistes, ngwa ba-Baptistes, anyi ngwa beena Mpenta? Mpa cinyi pândi mufwanyine kuditeeka? Ncyêna mumanye. Bôbò bônsò badi beelakana ne bikwabo byônsò, nshinga mijingakanangane, ne bikwabo byônsò.

¹²⁰ Kadi pândi nteeka diitabuuja dyanyi mu Dîyi Dyende, ndyele lwongo. Muntu nansha umwe kèna uDyumvwija to. Ke Dyôdi edi: EMU MMUDI MUKALENGE WAMBA. Nenku Cyôci aci ke cîndi ngitabuuja. Ke cishimikidi aci.

¹²¹ Ngangabuka mukwabo wa maalu mîmpè lwa kwînshi eku mu cimenga emu, mulunda wanyi, Ngangabuka Sam Adair. Tuvwa nende bânà batekete. Nwênù bônso nutu bamanye Sam. Nenku uvwa ungambila, wamba ne: “Bill. . .” Paanyima paa difika dya cikeena-kumona aci, pâmvwà mumwambile mwaba uvwaye mwa kwashila nzubu wende awu, mushindu uvwa nzubu awu mwa kumweneka. Mpindyewu ndaayimu, numukonkaayi musangu mukwabo piikala bwalu abu kabuyi bulelela. Bidimu bibidi anyi bisatu kumpala kwa kwenzekabu, mêmè kumwambila mwaba uvwa nzubu awu mwa kwikala. Mêmè ne: “Newangate ntanta mutwe ku mpangu inaayi ayi.” Nenku kudi cintu anu cimwepele pankaci pende yêyè ne cyôci aci, ke mwaba wa dyalujulwilangana bukole awu. Ngangabuka Adair mmwangate ne citupa cikwabo civwa cishaale aci, ne nzubu wa dyenzela manga. Kwajiki. Ngangabuka Adair mmuje cyônso patapata, cikeena-kumona aci. Piinaapu, uvwa mmwaba uvwaye yêyè wamba ne: “Muntu kêna nansha mwa kupalengaku to munda mwa bidimu makumi abidi ne bitaanu. Mmwaba udi ne bilumbu ku tuumilaadi.”

¹²² Mêmè ne: “Ngangabuka, Mukalenge udi ukupa mwaba awu, bwa didipwekesha dyebe.”

Yêyè ne: “Mêmè wa bwalu nciyi nansha ne pabwàsà.”

¹²³ Mêmè ne: “Wêwè’s udi nkuvu. Udi ne cizubu lwa pamutu, cizubuzubu mùdi utangidila balunda beebe pambelu apa, kadi lwa munda’s wêwè udi muntu wa bushuwa. Patuka mu cizubu aci.” Mêmè ne: “Nzambi wakupi mwaba awu.”

¹²⁴ Yêyè ne: “Kacya ncitu mukweleku wêwè ewu mpatà to, Billy, kadi bwa aci bikengela mêmè kucyelaku mpatà.”

Mêmè ne: “Ndaaku ku birô byebe.” Ke kupatuka kuyaye.

¹²⁵ Dinda dyakalonda, yêyè kumbiikila ku telefone, wamba ne: “Ndi mfwa ne mashika.”

¹²⁶ Mêmè ne: “Mbwalu kaayi abu?” Tuvwa lwa mu ngondo wa mwandamutekete. Mêmè ne: “Mbwalu kaayi’s, Ngangabuka?”

¹²⁷ Yêyè ne: “Nkaadi mumane kusumba mwaba awu, Billy. Bènji cisangilu makeelela awu diloolo mu Boston, nenku nkaadi mumane kusumba mwaba awu mu dinda emu.”

Mêmè ne: “Mêmè’s mvwa mukwambile.”

¹²⁸ Mvwa mupweke muyeku dituku adi, mêmè kuyiikilangana nende, paakantaayikila cingoma mumpala. Yêyè ne: “Ndi ndifwanyikijila ne ntu nkaadi mubulondele bantu cinunu batu bamvwile mwaba ewu, mushindu awu.” Ncinyi ciine aci? Mpindyewu, padi Nzambi wamba bwalu kampanda, budi ne cya kwenzeka.

¹²⁹ Makeelela diloolo balunda bakwabo bavwa bamvwile. Bavwa bumvwe bwalu bûmvwà mulonde bwa cikeena-kumona cya nyama wa kasha wa nsengu mapanda uvwa ne nsengu bule

bwa byâlâ makumi anaayi ne bibidi [mitwe ku mètre 1] awu, ne ours munene wa lwonji mufiikuluke. Ncyêna mumanye búngì bwa bantu bavwa balwe kwanyi to, bajinga kumona cyôci aci. Mêmè ne: “Mètre wa kupima nende nyêyè ewu. Teekaayi pa lusengu apu.” Yêyè ukaavwa muumvwe bwalu abu kumpala kwa kwenzekabu. Nwamonu anyi? Bwa cinyi? Padi Nzambi wamba bwalu kampanda, budi ne cya kwenzeka. Ke cidi cyenza ncyaci, ncijaadikiibwe.

¹³⁰ Mpindyewu, ndongamu wa disungila ke yêyè ewu. Nunku ewu piikala cikeena-kumona Cyende ncyûle patapata, anu mushindu menemene udibi byambiibwa ne nebyenzeke, ne ekeleeziya ewu mwikale mumanye ne mmwômò, kadi netwâmbè bishi bwa Dîyì Dyende? Nwamonu anyi? Dyôdì adi’s didi ne ditwishiiibwa kupita dya cikeena-kumona. Piikalabi ne cikeena-kumona kacivwa cyakule mumwe ne Dîyì to, nanku cikeena-kumona aci ncyà mafi. Kadi bikengela Dîyì, kumpala, bwalu Dîyì ke Nzambi. Nwamonu anyi? Pa nanku, Yêyè udi myaba yônso. Yêyè uvwa mucyâmbè kaaba aka, kadi kwenza ne cyûle mu Canada. Amen. Nwamonu’s, Yêyè udi myaba yônso. Eyo.

¹³¹ Dyambedi, udi ne cya kulediibwa cyakabidi. Ne pathiishe paudi ulediibwa cyakabidi, udi ne diitabuuja; udi witabuuja Dîyì. Paudi kuyi anu mwanji kulediibwa cyakabidi to, newikale anu wela Dyôdì adi mpatà. Pawikala ne meeji matuma anu ku butendeleedi, nenku—nenku mwikale ne kaa—kaa—kaadimanya kakese kaa buntu bwa wikale wenza maalu mîmpè, kwadyakwikalaku ne mushindu wa kwitaba cidi Dîyì dya Nzambi dyamba to. Kwadyakucyenzaku to. Bikengela ulediibwe cyakabidi. Nunku, mulediibwe cyakabidi, aci ncidi cilela diitabuuja. Eyo. Pashiishe, paanyima paa wêwè mupete diitabuuja, edi didi *apa* edi, d-i-i-t-a-b-u-u-j-a, diitabuuja, dîbà adi udi anu mwimane mu mushindu wa wenda ukola.

¹³² Mpindyewu, bantu bààbúngì batu baya ku cyoshelu, basambila, bamba ne: “Mukalenge, mfwileku luse.” Nunku dilabula dinene dya dijidiibwa dibavwila, ne bikwabo. Mwaba awu umba upeta dicyonkomoka, ujuuka uya ku cyoshelu aku, wela mbila. Walukila, wamba ne: “Nzambi abeneshiibwe, ngamupeci.” To, wêwè udi anu mubange cyanaana mwaba wa wêwè kumona mwa kukola. Kwêna mwanji kwenza cintu to. Wamonu anyi? Cintu cimwepele cyûdì mwenze cidi anu kuteeka kwa cishimikidi.

¹³³ Mpindyewu wêwè udi uya bwa kwasa nzubu, nenku upongolola cishimikidi cya shamenda, wêwè ne: “Balumyana wa yaaya, mêmè’s ngapeci nzubu.” Wamonu anyi? Ciwapeci ncishimikidi bwa kwashilapu nzubu webe. Mpindyewu bikengela wàsè nzubu.

¹³⁴ Mpindyewu mwaba awu ke udi cintu cibwela, mu dinda emu, citwikala mwa kwakwilapu mpindyewu. Eyo. Nzubu,

cishimikidi eci nciidi cilwa dyambedi. Cishimikidi cya bwena Kilisto ncinyi? Diitabuuja mu Dìyì dya Nzambi. Ke cishimikidi cyebe ncyaci. Mpindyewu ubanga kwenda kukola. Pashiishe ubanga, ubanga kwenda kusakidila ku cishimikidi eci.

¹³⁵ Mpindyewu, paudi wasa nzubu, udi wasa makunji ebe ne bikwabo byònsò. Mwaneetu Wood, ne bamwe baa ku benji baa mabaya ne benji baa makumi a bya dyasa naabi badi apa aba mbafwanyine kutwambila mushindu údi mwa kwasa nzubu webe. Wamonu anyi? Kadi mêmè nênkwambilè mwa kwasa nzubu webe wa mu nyuma, mudi Nzambi mwa kusòmbela. Yèyè mmuswe kusòmbela munda mwebe. Mmuswe kukuvwija mudiYe Yèyè mwine. Mmuswe bwa wèwè kwikala muleejiiabwe mu cimfwanyi, uleeja cimfwanyi, nanku's we, cya CidiYe Yèyè.

¹³⁶ Nudi bamanye, mu bikondo bya kale pavwabo ne ciibidilu cya kwenza ngòlò, kumpala kwa kupetabo cyamu cidi cyengulula bwa kumwoshabo ne kundeekeelu, bavwa ne ciibidilu cya kwikala kutuuta ngòlò, batuuta bwa kuumusha bisota, cyamu cifiike ne cya kabanda ne bikwabo bintu, babyumusha, batungunuka anu ne kutuuta, bamukudimuna emu ne emu, bamutuuta. Ba-Indiens bacitu bacyenza too ne mpindyewu, batuuta ngòlò, bamutuuta. Nudi bamanye muvwabo mwa kwamba ne cyamu cifiike cyònsò cyùmùkù, ne bukooya bwònsò ne bikwabo, ne bisota byònsò byùmùkù mwòmò? Mpavwa mutuuci awu mwa kumona cimfwanyi cyende yèyè mwine cimwenekelamu, cyenze bu mu lumwenu, mwòmò amu. Uvwa ushaala mukezuke ne mutooke bikole mu mushindu wa uleeja cimfwanyi cya mutuuci awu.

¹³⁷ Mushindu awu ke udi Nzambi wenza. Udi wangata ngòlò udiYe musangane mu buloba, Umutuuta, ku Nyuma Mwimpè, umukudimuna emu ne emu, umukudimuna, umukudimuna kabidi, umutuuta too (ne padiYe upeta) ne padiYe mwa kumona cimfwanyi Cyende. [Mwaneetu Branham udi utuutakaja byanza misangu yâbûngì padiye wamba cyambilu eci—Muf.]

¹³⁸ Nenku ke citudi twètù ne cya kwenza, kuleeja cimfwanyi cya Mwânà wa Nzambi. Nenku mpindyewu tudi ne cya kwenza mudimu Wende. Mmwambe ne: “Ewu udi ungitabuuja Mêmè. . .” Yone Munsantu 14.7: “Ewu udi ungitabuuja Mêmè, byenzedi bìndì Mêmè ngenza neabyènzè pende.” Udi ubanga kuleeja mu cimfwanyi byenzedi bya Kilisto.

¹³⁹ Kadi bààbûngì beetu batu bateeta kwenza byenzedi bya Kilisto kumpala kwa kuleeja cimfwanyi cya Kilisto munda mwetu. Mpindyewu's ke lutatu alu. Tudi tusangana bintu abi biikale byenzeka. Nutu bamanye nanku. Mêmè ntu mumanye nanku. Tutu tumona byôbì ebi, bilendwishi njila mujima. Tudi tusangana mishiki ne mishiki ya bambi badishinde, ya beena Kilisto, biikale bungwija mishiki njila mujima, mbwalu kabavwa babwelemu mu mushindu uvwa ukengediibwa to.

¹⁴⁰ Nénku ke bwa cinyi ndi mwaba ewu mu dinda emu, mbwa kuteeta kulongesha kaekeléeziya kakese aka, ne mêmè mwine, mushindu utudi mwa kulwa cisòmbedi cya Nzambi udi ne mwoyi. Mbanganyi badi baswe kwikala cyôci aci? [Disangisha didi dyamba ne: “Amen.”—Muf.] Cisòmbedi cya Nzambi udi ne mwoyi!

¹⁴¹ Mpindyewu citudi twenza ncyôci eci. Cintu cya kumpala ncinyi? Kwikala ne diitabuuja ne kulediibwa cyakabidi. Ke kuteeka kwa cishimikidi aku.

¹⁴² Pashiishe, paanyima paa twêtù bateeke cishimikidi, cintu ciibîdi cyûdi usakidila ku cishimikidi cyebe. “Nusakidile ku diitabuuja dyenu,” mudi Peetelo mwambe apa. Usakidile ku dyebe. . . Dyambedi udi ne diitabuuja, pashiishe udi usakidila bukole ku diitabuuja dyebe adi. Edi ke dikunji didi dilonda. Dyambedi, pongolola nshamenda bwa cishimikidi cyebe: diitabuuja. Pashiishe, ku diitabuuja dyebe, sakidila bukole.

¹⁴³ Mpindyewu, anu mwaba awu ke udi wela bààbûngi beetu cibula. Eyowa’s, mukalenge. Eyo. “Nusakidile bukole ku diitabuuja dyenu.” Aci kî mbwena kwamba ne kusòmba nsòmbelu wa buuvirgo to, nudi bamanye, bu mudi mukaji anyi mulume, ne bikwabo. Aci kacylene ne dipetangana nansha dimwe ne aci to.

¹⁴⁴ Bible mmwambe, tudi tubala mwaba ewu mu Mukanda wa Luuka, mwaba udiWu mwambe ne: “Bukole bwakapatuka munda Mwende.” Mmwômò anyi? [Disangisha didi dyamba ne: “Amen.”—Muf.] Patwikala tukeba bwa kwikala bu Yêyè, tudi ne cya kwikala ne bukole, pa dîbà adi. Tudi ne cya kwikala naabu, bwa kwikala bu Yêyè. Ke musambu wa kumpalampala ûnkaadiku munange, mu—mu misambu, umwe wa ku idi mitambe bunene, uvwa wa ne: *Kwikala Bu Yesù*. Ee, pângikala nkeba kwikala bu Yesu, bikengela ngikale ne bukole, ne njila udibu mwa kupicila buumukila kûndi buya kudi bantu. Bwalu: “Bukole buvwa bupatuka munda Mwende buya kudi bantu.” Bukole! Nénku kumpala kwa wêwè kubupatula kuyabu, bidi bikengela wânjî kwikala naabu dyambedi. Wêwè kuyi naabu to, kabwakupatuka nansha. Kakwena cintu cidibu mwa kupatukilamu to.

¹⁴⁵ Twămbèbi tûng bu muntu uteeta kukoka bukole mu twêtù, kadi kabeji kaa shekè kaalukila bafunde ne “mfranga kî mmikumbane to”? Nwamonu anyi? To, to, kamwena kantu nansha kamwe mudibo mwa kubukoka to, shekè mwaluja. Muntu ukutangila mumone bu ne udi mwena Kilisto, kadi maalaba ukumona pambelu apa mwikale wenza maalu a lukutukutu bu ngènzâmpèkââtù, kakuyi bukole bwine bwa nsongo budi mwa kukoka ku ciine aci. Nwamonu anyi? Eyo.

¹⁴⁶ Bukole budi ne cya kwikala munda mwetu. Nénku patucidi anu katuyi banji kupeta bukole. . . Nénku patudi

tupeta bukole bwa bushuwa, ke patudi mwa kubusakidila ku diitabuuja dyetu. Ke cishimikidi cidi cilonda cya cimanu. Mpindyewu, dyambedi udi ne cya kwikala ne diitabuuja. Diitabuuja nkaayaadi kadyakukumbaja bwalu to. Bikengela wêwê. . . Peetelo mmwambe ne: “Pashiishe nusakidile bukole ku diitabuuja dyenu.” Udi ne cya kwikala ne bukole, bwa wamona mwa kubusakidila ku diitabuuja dyebe.

¹⁴⁷ Mpindyewu, pashiishe, mbifwanyine kwikala ne, cyûdi kuyi ubupetela, mbwalu ekeleeziya yâbûngî ya leelu ewu idi ilongesha ne kabyena bikengela kwikala naabu to, anyi ne matuku abu akaadi mamane kupita. “Kabyena anu bikengela kwikala naabu to. Cintu cimwepele cidi cikengela wêwê kwikala naaci nkudishiya mwena ekeleeziya. Eyowa, matuku akaadi mamane kupita.”

¹⁴⁸ Bukole, muntu yônsò ewu mmumanye cidi mwaku ewu bukole uumvwija, nwamonu’s, nenku bikengela anu twikale naabu. Piikalabi ne bukole bwakapatuka munda Mwende, bwa kwondopa mukaji uvwa usaama awu, Yêyê mmuswe bukole bumwebumwe abu bwikale mu Ekeleeziya Wende, bwalu Yêyê nguvwa cileeji lu cyetu. Nenku piikalabi ne Yêyê uvwa ne bukole bwa kupa bantu, Yêyê mmuswe bwa twêtù kwikala ne bukole bwa kupa bantu. Nenku bukole mene ncinyi? Bukole ndikanda, ngulu.

¹⁴⁹ Bamwe baabo kabatu nansha biitabuuja bukole bwa Nzambi to. Badi bamba ne: “Aci—aci—aci cikaadi cimane kupita. Cintu cimwepele cidi cikengela wêwê kwenza cidi anu kufundisha dîna dyebe mu mbukù, ne kukumyaminabo mâyi, anyi kukupongolwelabo mâyi, anyi kukubatiizabo, anyi nî ncinyi cikwabo. Ke cyônsò cidi cikengela wêwê kwenza aci.”

¹⁵⁰ Kadi Peetelo yêyê mmwambe apa ne: “Nusakidile bukole.” Mpindyewu, Peetelo udi wamba bwa diibaka dya Nzubu wa Nzambi, nwamonu’s, Ntempelu wa Nzambi, umujaadika mu mwaba kampanda. Nunku paanyima paa wêwê mupete bukole, udi ne cya kupeta. . . Paanyima paa wêwê mupete diitabuuja, udi ne cya kupeta bukole pamwe ne dyôdi adi. Ncya bushuwa. Kupeta bukole bwa baa pa buloba bujima.

¹⁵¹ Ntu muyiishe diyisha kukaadi bidimu bitwe ku makumi abidi, ngela meeji, pa Révérend Mukalenge Mbata. Mbata, mpaasata. Mwua mudipatule mu mêyi adi mu mwaba udi Yesu mwambe ne: “Londeshaayi mbata, mudiyi kayiyi nansha ikwata mudimu mukole anyi iluka. Kadi ndi nnwambila ne, Soolomo mu butumbi bwende bwônsò kaakavwalaku bu umwe wayi to.”

¹⁵² Tangilaayi mbata. Udi upatukila lwa mwinshi menemene mwa bitoci. Nenku kasunsa ne kasunsa kônsò kaa dituku aka yêyê udi anu ne cya kwikala ubukoka mu buloba. Nwamonu anyi? Kadi cidiyè wenza ne bukole ebu budiye ukoka ncinyi? Udi ubwabanyinangana. Udi umweka cintu cilenga cya dikema

bwa mubandidi. Udi udivungulula bwa bwîci, bwa lubulubulu kulwa kwangatalu walu ndambu. Kêna udyabakeena to. Udi anu naabu, bwa kubwabanyinanganaye. Ambabi tũng bu lubulubulu mwa kubwelamu; mfranga kayiyi mikumbane to, kamuyi bwîci? Lubulubulu lukese alu ndufwanyine kudikoonya ku mutu ne kwamba ne: “Ewu kadi ke mbata wa mushindu kaayi mwine ewu’s?”

¹⁵³ Bu muntu mwa kulwa, ukeba bwa kupeta disungidiibwa, kadi uya ku ekeleeziya udi witabuuja ne matuku a bishima akaadi mamane kupita?

¹⁵⁴ Bu mwakamba Jack Coe musangu kampanda. Ubwela mu nzubu wa cidiilu, wangata dibeji dinene dya mênà a byakudya; ubanga kubibala too ne kwinshi, bifweteke ne bikwabo. Yêyè ne: “Ndyadya bifweteke.”

“Ee, aci civwa mbwa dituku dishaale. Katwena naaci to.”

¹⁵⁵ Bipiciibwe ne muteeke dibeji dya mênà a byakudya adi panshi mupatuke, nwamonu’s, ncyà bushuwa, bwalu nyawu kabayi ne cintu nansha cimwe cya didya, twamb’eku twmab’eku. Pa nanku mbipiciibwe ne wêwè muye ku mwaba udi nzubu wa cidiilu mwikaleku ne cintu kampanda cya didya.

¹⁵⁶ Nenku muntu wa nyuma, wenda ukola, udi dijinga ne cintu kampanda cya didya. N’Dîyi dya Nzambi. Mêmè ndi ngitabuuja Dîyi dyônsò dya Dyôdi adi.

Nzambi udi ne meesa maadija kudi bansantu
baa Nzambi badiishiibwa,
Yêyè udi ubiikila bantu Bende basungula ne:
“Lwâyi nudye.”
Yêyè udi utudiishangana ne Mana Ende, Udi
ukumbaja dijinga dyetu dyônsò,
Kaa, mbilenga bwa kudya didya dya diloolo ne
Yesu misangu yônsò.

¹⁵⁷ Ncyà bushuwa. Eyowa’s, mukalenge. Yêyè udi naaWu. Ekeleeziya udi naaWu, Ekeleeziya wa Nzambi udi ne mwoyi, udi mwibakiibwe mu muntu mupwangane ewu, wa dimanya dya Kilisto. Mpindyewu, mpindyewu udi ne cya kwikala ne bukole.

¹⁵⁸ Pashiishe mêmè kwamba ne, cya kumpala, kudi muntu utu munange kuumvwa dipembu. Yêyè katu ne citù to. Utu ne dipembu. Kumpala kwa yêyè kumona mwa kwabanyinangana diine dipembu adi, bikengela kwanjiye kwikala naadi. Kumpala kwa kwabanyinangana bwîci, bikengela kwanjiye kwikala naabu. Kumpala kwa yêyè kwabanyinangana bulenga bwa kwîsù, bikengela kwanjiye kwikala naabu.

¹⁵⁹ Kumpala kwa wêwè kwabanyinangana bukole, bikengela wikale naabu wêwè. Pa nanku, ku diitabuuja dyebe, sakidila bukole. Amen. Nudi bumvwe anyi? Tudi bafwanyine kushaala pa cyôci aci ntanta mule, kadi dîbà ditudi naadi

ndifwanyine kutukeepela. Kusakidila bukole ku diitabuuja dyebe. Mpindyewu, dyambedi ndiitabuuja, pashiishe bukole.

¹⁶⁰ Nenuk pashiishe, ciisâtù, udi usakidila dimanya. Dimanya, mpindyewu, ki mbwena kwamba ne ndimanya dya maalu a pa buloba to, bwalu adi didi dicimbakana kumpala kwa Nzambi; kadi ndimanya dya kujingulula, kujingulula (cinyi?) maalu mîmpè ne maalu mabi. Udi uàjimgilula bishi, mwaba awu, pawikala ne dimanya dya bwena Kilisto ne bukole bwebe ne diitabuuja? Udi ujingulula bwa kumanya ne Dìyì ndilelela anyi ndya mashimi. Nenuk wèwè mwa kuteeka ku luseke twitabaayi yebe yònsò, ne bupidya bwebe bwònsò, byònsò byùdi ulaka mukana wamba ne udi mwenze abi, dîbà adi udi ne dimanya dya kwitabuuja ne Nzambi kèna mwa kushima to. “Dìyì dya muntu yònsò diikale mashimi, kadi Dyanyi diikale dilelela.” Nudi numona anyi? Mpindyewu udi wenda upeta dimanya. Adi ke dimanya dya kumutu kwa mamanya. Kabyena bikengela bwa wèwè kwikala ne mapolome anaayi a mu tulaasa tutumbuke kampanda, anyi cintu bu nanku awu, bwa kudipeta to, bwalu makole miine ònsò aa Nzambi ngudi ukupawu, bwa kuàtèka pa cishimikidi cya diitabuuja dyebe, bwa wamona mwa kufika ku cipidi mu kaabujima cya muntu mulelela wa Nzambi, mwikale ne mwoyi. Eyowa’s, mukalenge.

¹⁶¹ Sakidila, sakidila dimanya, bwalu, dimanya dya Dìyì Dyende. Udi ne cya kudiitabuuja mu mushindu ewu. Cileejilu, udi ne cya kwitabuuja leelu ewu ne ma- . . . ne kwitaba cyòci aci ne, matuku a bishima kî mmanji kupita to. Dimanya dya ne cidi Nzambi mwambe, Nzambi mmukumbane kucyenza.

¹⁶² Abraham wakiitabuuja cyòci aci. Ne paakafikaye mu bidimu lukama, yèyè kaakatenkakana ku mulayi wa Nzambi bu bupidya to. Tangilaayi numone muvwa Dìyì adi dimweka dicimbe. Ke muntu nyewu, wa bidimu lukama, mwindile dileedi bwa dya mwànà mu dîkù dyende, kudi mukaji wa bidimu makumi citeema. Nwamonu anyi? Bidimu bitwe ku makumi ataanu bya kulela bipite, yèyè ukaavwa musòmbe ne mukaji awu kubangila pacivwaye mwànà wa bakaji mu—mutedete, anyi ne bidimu mwinshi mwa makumi abidi. Ke yèyè ewu, musulu wende wa mwoyi mumane kufwa. Ne munda mwa Sarah paamu mukaavwa mumane kufwa. Ne ditekemena dyònsò dimane diye, bwa twètù bambe kwakula bwa ditekemena. Kadi, nansha nanku, mutedkemene civwa kacyi kutekemena, wakiitabuuja mu ditekemena, bwalu uvwa ne dimanya dya ne Nzambi uvwa mukumbane kushaala mukwate ku cyònsò cyakalayaYe.

¹⁶³ Mpindyewu, wèwè naadi mushindu awu, apu kaayi udisakidile ku diitabuuja dyebe. Paudi ne bukole bwa cya bushuwa, ubusakidile ku diitabuuja dyebe. Paudi mwa kupatuka pambelu apa mu mùsèèsù, kwikala ne nsòmbelu bu mwena Kilisto, kwenza maalu bu mwena Kilisto, kwikala mwena Kilisto, sakidila aci ku diitabuuja dyebe. Paudi ne dimanya . . .

164 Udi wamba ne: “Ee, ncyêna mumanye mpindyewu Mufundu ewu nî mmujaalame menemene anyi to. Mpindyewu ke Byenzedi 2.38 nyêyè ewu, ncyêna mumanye mushindu wa kuwukumbajangana ne Byenzedi 28.19 to. To.” Eyo. Kusakididi cintu to—to, bwalu kwêna mwanji kwikala naaCi to. Wamonu anyi? Ciwenza ncinyi? Bwalu, kwêna mwanji kupeta dimanya dikumbane bwa kumanya bidi bitangila Nzambi nansha, dya ne, Bible katu Wenza kwamba maalu abengangana to. Lekela cintu aci anu mudici amu. Kùbwàkùlù kabidi to. Wamonu anyi? Cilekela wêwè anu mudici amu.

165 Kadi pawikala mwa kumona ne Mifundu kayena ibengangana, ne ke cyûdi wêwè mwa kwamba; ne udi mwa kumona, ne, ku dibuulula dya Nzambi, Dîyî dyônsò nkòong ndifundiibwe mu maalu masokoka, ne anu dimanya dya kudi Nzambi ndidi mwa kuDibuulula; pashiishe paudi upeta ne wamba, utwa “amen” ku Dîyî dyônsò dya Nzambi, dîbà adi sakidilaaku cyôci aci ku diitabuuja dyebe.

166 Kaa, ukaadiku wenda ushaala muntu mwîmpè bwa mpindyewu ewu. Wamonu anyi? Ukaadi wenda ubanda, wamonu’s. Ne cinyi? Ne diitabuuja, pashiishe ne bukole, pashiishe ne dimanya. Nudi numona mudi cyôci aci cyenda ciibaka muntu ewu anyi? Udi mwa kumona ne kakwenaku mushindu wa kucyepuka to—to. Ewu ke mushindu wa kulwa mu cipidi mu kaabujima cya Kilisto. Eyowa’s, mukalenge.

167 Kujingulula, kujingulula mushindu mululame. Kujingulula ne mbulelela anyi mmashimi, kwitabuuja Dîyî dya Nzambi. Kujingulula ne mbulelela anyi mmashimi, ne bidi bikengela mêmè kukwacila twitabaayi mudimu anyi kukwacila Nzambi mudimu. Kujingulula nî mbulelela nî mmmashimi bwa ne, ndi ne cya kulediibwa cyakabidi anyi kushaala mwena ekeleeziya. Dîbà adi ukaadi ubanga. Kujingulula mushindu mululame, padi muyiishi wamba ne: “Matuku a bishima akaadi mamane kupita.” Bible mmwambe ne: “Yesu Kilisto umweumwe awu makeelela, leelu, too ne kashidi.” Mpindyewu ciwitabuuja ke cyèpi?

168 Paudi wamba ne: “Nêngàngatè Nzambi.” Mpindyewu, kwêna ucyamba anu bwa kwamba cyanaana ne: “Ee, ndi—ndi ncyangata’s,” cifumina anu mu mwoyi webe naka. Kadi, cintu kampanda munda mwebe amu, diitabuuja dyebe ndidi dipatuka. Ke bwalu abu. Diitabuuja dyebe dyamba ne: “Mêmè ndi mumanye ne Yêyè udi umweumwe awu. Amen. NgaMufididi bujaadiki ne ngumweumwe awu. Kakwena cidu mwa kucyumusha kùndi to. Ndi mumanye ne Yêyè mmulelela.” Amen. Dîbà adi sakidilaa aci ku diitabuuja dyebe. Citeekaaku pa cishimikidi aci. Wenda ubanda mpindyewu, wenda anu ubanda mutangile ku Bukalenge. Wâfikî pa kaaba kampanda mpindyewu. Eyo.

¹⁶⁹ Mpindyewu, cintu cidi cilonda, muyiishi neakwambile, ne bantu bààbùngì bamba ne: “Bi-...Bintu byùdi ubala mu Bible ebi, bivwa mbwa dituku dikwabo. Mpindyewu, mèmè nènñwāmbilè ne mbwa cinyi. Mbwalu, katwena dijinga ne bintu abi leelu to. Katwena naabi dijinga to. Wamonu anyi? Katwena ne cya kwikala naabi dijinga to. Kabyena bikengela bwa twètù kwenza bintu abi to, dyondopa dya kudi Nzambi adi. Katwena twenza dyakula dya mu myakulu to, mu ekeleeziya, bwa—bwa kulama ekeleeziya wetu mululame. Nenku katwena twenza *cikampanda* to.”

¹⁷⁰ Netufike ku cyôci aci. Ndi mufunde Mufundu mwaba ewu pa cyôci aci, nwamonu’s, bwa ne bivwa bikengela twètù kucyenza anyi to, bwa mpindyewu.

¹⁷¹ Kadi apa mmwambe ne: “Ncyêna mumanye. Kabivwa bikengela twètù kucyenza leelu ewu to. Cintu cimwepele cîndi ngela meei ne civwa cikengela twètù kwenza, bivwa bikengela kuyiila mwa kwakula ngaakwilu wa kapelu kumpala kwa musumba wa bantu. Bivwa bikengela twètù kuya kambila ngangabuka wa mitu bwa kututeetaye mitu, bwa kumona ne tudi bakumbane bwa kwikala bakumbane mwa kuditeeja anyi, ne cipidi cya dimanya cyetu ncibande mu cipimu cikumbane bwa kwenza cyôci aci, ne—ne bikwabo bya nanku awu. Ndi ngela meei. . . Ne twètù’s mbadi ne masangisha matambe bunene. Twètù mbadi biibaka bulongolodi bwetu.”

¹⁷² Twètù katwena twitaba bulongolodi to. Ncyêna kaaba aka mu dinda emu bwa kwibaka bulongolodi kampanda to. Kilisto katuku muntume bwa kwibaka bulongolodi nansha. Kilisto mmuntume bwa kwibaka bantu nkaaya ne kubafikisha mu cipidi cya Yesu Kilisto, bwa kwikalabo nzubu udi utuma nzembu ne cisòmbedi cya Nyuma, ku Dìyì Dyende. Ku Dìyì Dyende, nwamonu’s, kwibaka muntu nkaaya ne kumufikisha pa kiine kaaba aku. Kî nkwiwaka bulongolodi ne kubufikisha mu mushindu wa dingumba ditambe bunene to, kadi kwibaka muntu nkaaya kumufikisha ku bânâ baa balume ne baa bakaji baa Nzambi. Ke mmwenenu nyawu. Nwamonu anyi? Ku diitabuuja dyebe, sakidila bukole; ku bukole bwebe, sakidila dimanya. Ee, mpindyewu ukaadi ufika pa kaaba kampanda.

¹⁷³ Mpindyewu, pakaadibo babanga kwamba ne: “Ee, kabyena bikengela twètù kwitaba aci leelu ewu to. . .” Wèwè kaayi udi anu naaci. Cidi ne cya kwikalaku.

¹⁷⁴ Mifundu kayena mwa kushima to. “Ne Yôyì kayena ya muntu udyumvwijila to,” mudi Bible mwambe. Udi uCiitabuuja anu mushindu udibo baCifunde Mwômò amu. Nwamonu anyi? Bikengela wikale ne bintu ebi. Ne mushindu umwepele wa wèwè kwikala mukumbane kwikala naabi, nkwiwaka ne dimanya dilela kudi Dyulu. Ne dimanya dilela kudi Dyulu ke dyashindika Dìyì. Nwamonu anyi?

175 Bikengela witabuuje, kî nkwitabuuja kwa budingibudingi to. Nansha cimwe cya ku byôbî ebi kacyna cya diitabuuja dya budingibudingi to, wamonu's, paudi uteeta kwamba ne: "Ndi naaci." Kwikadi nyuunyi mufiike udi udisomeka masala a nyuunyi wa kayiba mu wêwè to, wamonu's, bwalu ôwò awu neatuuke amate. Kî mmatolokemu mushindu útù masala atoloka awu to. Mmasomeka cyanaana.

176 Ndi mvuluka mwaba wakamba Davidi mwaba awu, mu Misambu 1 ne: "Yêyè neikale bu mucu mukùna ku kaala kwa misulu ya mâyi." Nudi bamanye, kudi dishiilangana pankaci paa kwikala mukùna ne kwikala muteeka cyanaana, mushimika. Bu mudi mucu wa nsanga wa kale, wakakunyiibwa, mwikale ubweja miji mu buloba ne ushimata. Kaaditamba kakese nkashimika mwaba awu, kwêna mumanye cyàkàvwilà to. Kakayi ne miji. Kakayi ne cishimikidi. Nudi numona anyi?

177 Byenze bu mudi bantu bakwabo badi buumukila mu seminere anyi cintu kampanda, nwamonu's. Kabayi ne. . . "Ee, Docteur *Kampanda* ke wâkanjidila mêmè ewu mu mudimu wa bwambi." Aci kacyna ne cidici cyenza bwa ne civwa cinyi to.

178 Kilisto ngudi mwenze bwa ulediibwe mwômò amu, wamonu's, wamonu's, ku diitabuuja dyebe. Wamonu anyi? Wêwè udi mufukùlùdiibwe ne mulediibwemu. Ne paanyima paa wêwè mumane kulediibwamu, byôbî ebi ke bintu bidiYe muswe usakidile. Wêwè tungunuka anu ne kubisakidila. Mpindyewu tuyaaya twenda tupweka too ne kwinshi kwa mulongo.

179 Mpindyewu nekwikale cikwabo cintu citenteka pa dimanya edi, citudi bafwanyine kwamba, dimanya dya cijila. Nwamonu anyi? "Bible mu dituku edi wâjîmiji dyumwija Dyende anyi?" Nwamonu's, bôbò, bantu bààbûngî batu banwambila cyôci aci, ne Bible kêna uswa kwamba menemene cyôci aci to. Piikala Nzambi untabaleela mêmè ewu, ne undongolola mu mpekaatu wanyi, ne piikalabi ne ndi mwânà wa Nzambi, Yêyè udi ucyanza. Yêyè udi unwenza mushindu awu, nwênù bânà baa balume ne [Katupa kaa mukaba wa mêyi munda mutupu—Muf.] baa bakaji. Paudi wenza cintu cibi, Yêyè udi ukulongolola. Kadi piikalabi ne Nzambi udi utamba kwenza nanku bwebe wêwè sungasunga, Yêyè ukutabaleela ne ukulongolola, Yêyè neatambe kutabaleela Dîyi Dyende mushindu kaayi, dyôdi didi diikale cileejiilu cyebe, didi diikale Yêyè mwine!

Ku cibangidilu kwakadi Dîyi, ne Dîyi dyakadi ne Nzambi, ne Dîyi dyakadi Nzambi.

Ne. . . dyakandamuka mubidi, ne dyâkasomba munkaci mwetu, . . .

180 Dîyi ndibuulula dya Yesu Kilisto, mudi Bible wamba, Kilisto mwikale mubuulula mu Dîyi Dyende. Nenku piikalaYe mukutabaleele wêwè paudi utupa ku mikenji eyi, Yêyè ukupiisha

bwa ciine aci, Yèyè mmutambe kutabaleela mukenji Wende udi ukupiisha awu mushindu kaayi! Amen.

¹⁸¹ Wèwè tungunuka, mulumyana, kungambidi mèmè abi to!

¹⁸² Mèmè ndi ngitabuuya mu dimanya dilelela, dya kudi Nyuma Mwîmpè. Dimanya dya kudi Nyuma Mwîmpè ditu misangu yònsò anu ditwa “amen” ku Dìyì. Paudi upeta bintu ebi bidi bimweka bu bidi bibengangana, mu Bible, sòmbelà panshi ubilonge, ne mu mushindu wa disambila nanku awu. Nenku cya kumpala, Nyuma Mwîmpè udi ubanga kubwela mu cyalu. Paanyima paa katanci udi ubimona binwangana, nenku ke wèwè wacipeci awu. Wamonu anyi? Ke dimanya ndiyadi.

¹⁸³ Bamwe baabo badi bamba ne: “Ee, mpindyewu, Bible mmwambe ne Yèyè udi umweumwe awu makeelela, leelu too ne kashidi.”

¹⁸⁴ Kadi ekeleeziya udi wamba ne: “Mu mushindu kampanda, Yèyè udi umweumwe awu.” Huh-huh! Huh-huh! Nwàmanyi kukangula kaaba kaa dibwelela, anu mwaba awu. Nwamonu anyi? Eyowa’s, mukalenge. To, mukalenge. Yèyè udi umweumwe awu. Eyowa’s, mukalenge.

¹⁸⁵ “Yesu udi umweumwe awu makeelela, leelu, too ne kashidi.” Kakwena dishiilangana mu Yèyè to, nansha kakese. Yèyè udi ne mwoyi mu Ekeleeziya Wende, mwikale wenza cintu cimwecimwe aci. “Mu katanci kakese emu,” bu mûngâtèèdi cyôci aci kukaadi katanci, “mu katanci kakese emu baa pa buloba kabeena baMmona kabidi to, kadi nwènù nenuMmone.” Bwalu, Yèyè wakamba ne: “Nèngikalè neenu, munda mwenu mene, too ne kundekeelu kwa buloba.” Kabidi, Yèyè kwamba ne: “Byenzedi bìndì Mèmè ngenza nenùbyènzè peenu.” Kabidi, Yèyè kwamba ne: “Nèngikalè Muci wa mvinyo. Nwènù nenwikale matamba.” Ne ditamba paadi ditu ne mwoyi anu ku Mwoyi wa Muci wa mvinyo. Cyònsò cidi munda mwa Muci wa mvinyo cidi cipatukila ku ditamba. Butumbi’s we! Pa dîbà adi: “Kilisto umweumwe awu makeelela, leelu, too ne kashidi.” Didi dipatula Mwoyi wa Mukalenge Yesu Kilisto. Amen.

¹⁸⁶ Dimanya; kadiyi dya pa buloba to (adi didi dilukakaja lungenyi). Mushindu wònsò wa dimanya dya pa buloba didi dilukakaja lungenyi. Nwamonu anyi? Kadi diitabuuya kaditu ne dilukakakaja dya lungenyi to. Nzambi mukubuulwile ne cintu *kampanda* necyenzeke, mwena maalu a mamanya yònsò pa buloba ebu mmufwanyine kukwambila ne: “Aci cidi cibengangana. Kacyena mwa kwenzeka to.” Nansha nanku, wèwè uciitabuuya. Nwamonu anyi? Eyowa’s, mukalenge. Kadyena dilukakaja lungenyi to. Bible mmwambe ne: “Tudi tushimbula dilukakaja dya ngenyi.” Kwèna ulukakaja lungenyi ne diitabuuya nansha. Diitabuuya kadyena ne dilukakaja dya lungenyi nansha. Diitabuuya ditu dimanye mwaba udidi disanganyiibwa. Diitabuuya didi dyenza cyenzedi. Diitabuuya

didi dikwata dikwacilamu. Kadyena mwa kunyunga to. Kakwena cidi mwa kudinyungishaku to. Nansha nî ncinyi cyambe *cikampanda*, *cikansanga*, *cikankenga*. Kadyena dinyungaku to, nansha kakese. Didi dishaala anu mwaba awu, dindila, dindila, dindila, dindila. Kabyena ne cidibi bishintulula nansha. Didi dishaala anu mwaba awu.

¹⁸⁷ Nzambi wakambila Noa ne bintu ebi nebyenzeke. Pende kuciitabaye. Nwamonu anyi? Nzambi wakambila Mòsà ne bintu ebi nebyenzeke. Pende kuciitabaye. Nzambi wakambila bayiidi ne bintu kampanda nebyenzeke: “Bandaayi kwaka ku Mpenta nwindile.” Kushaalabo anu kuntwaku. Eyowa’s, mukalenge. Eyo.

¹⁸⁸ Mpindyewu, dimanya, mpindyewu, kadiyi dimanya dya pa buloba to, kadi ndimanya dya ku Dyulu. Ne dimanya dya ku Dyulu adi, padi Nzambi mwikale mpokolo mwine wa dimanya dyônsò, ne Nzambi udi n’Dîyì, pashiishe, wêwè ne dimanya dya ku Dyulu, udi witabuuja Dîyì, nenku udi ulukakaja lungenyi pa cintu kana cyônsò anu ku Dîyì.

¹⁸⁹ Nenku cilumbu eci cya citadi cikaavwa ekeleeziya musanganyiibwemu eci, anyi mêmè musanganyiibwemu’s we. Umwe wa ku bantu abu musangu kampanda, mu kantanta kakese kaa dinteeleja, ke uvwa mungambile. Wamba ne, mêmè mvwa mwambe ne. . . “Kî mbapete bwalu bubi nansha bumwe to.” Ke pa nanku bôbò kubanga ku- . . .

¹⁹⁰ Mêmè ne: “Ee, nanku, piikalabi ne kakwena bwalu bubi to, kanwena nundekelaku ku maci talala bwa cinyi?” Nwamonu anyi? Nwamonu anyi? Ke mêmè kutungunuka, mmwambila ndambu wa Mifundu.

¹⁹¹ Yèyè kwamba, mulumyana wa katanku awu mwikale ne mucu wa mfwanka ku cyaanza, yèyè ne: “Mukalenge Branham, mêmè ntu mulongi wa Bible.”

Mêmè ne: “Ndi ne disanka pândi ngumvwa aci nanku.”

¹⁹² Yèyè ne: “Mpindyewu ndi muswe mmanyè dijimbu edi, udi ufucishangana mfranga bwa mishwala yûdi utuminangana ayi, kaadijimbu kaa disambidila mishwala kadi kuyituminangana aku, ‘tulùlù tulaaba maanyi’ atu, tûdì wêwè mwinyike ne ‘ntulùlù.’” Yèyè ne: “Pashiishe ubifucishilangana mfranga.”

Mêmè ne: “To, mukalenge. Ncitu mfucishangana lufranga nansha lumwe ku byôbì abi to.”

Yèyè ne: “Ee, kadi bwalu ebu bwa dijimbu edi.”

¹⁹³ Mêmè ne: “Wêwè ngudi ucibiikila ne ndijimbu, mukalenge. Wêwè ewu’s wângambidì anu mu tusunsa tukese emu ne utu mulongi wa Bible.”

Yèyè ne: “S’ke cîndì.”

194 Mémè ne: “Nteelelaaku Byenzedi 19.11.” Dimanya’s! Ke yêyè kukwacika nkaayende mu buteyi anu mu cyôci aci, ukaavwa uteeta bwa kushintulula cyena bwalu. Mémè ne: “Pashiishe nteelela Yone 5.14.” Kayi mwa kucyenza to. Mémè ne: “Pashiishe Yakobo 5.14.” Kayi mwa kucyenza to. Mémè ne: “Utu mumanye Yone 3.16?” Nwamonu anyi? Dimanya, meeji matwe, bya pa buloba! Kadi pakaavwa. . .

195 Yêyè ne: “Kadi, Mukalenge Branham, wêwè udi ukeba kulumbulula cilumbu eci ne Bible. Twêtù tudi tucilumbulwisha ne mikenji ya ditunga.”

196 Mémè ne: “Mukalenge, mikenji ya ditunga kayitu miibakila pa Bible anyi? Nenku’s ke bwakane abu.” Amen! Cya bushuwa.

197 Dimanya; kadiyi dya pa buloba to. Dimanya dya mu nyuma dya Dîyi, kumanya cidî Nzambi mwambe, kwenza cidî Nzambi mwambe, ncyâ bushuwa. Pashiishe wêwè ne cyôci aci mwikale kabidi mwa kwitabuujâ bintu byônsò ebi, bwa ne Yêyè udi umweumwe awu mu bintu byônsò bidi Dîyi dyamba ne mbilelela ebi, udi utwa “amen” ku kantu ne kantu. Ke mudibi menemene. Sakidila aci ku diitabuujâ dyebe. Ncyâ bushuwa. Eyo.

198 Muntu yêyè uteeta kukwambila, wamba ne: “Bible ukaadi mujimije bukole bwende. Kakutu cintu paaci ne ndibatiiza dya Nyuma Mwîmpè to.” Huh-huh. Aci kucisakididi nansha. Kacyakukumbana to. Necituuke cimate. Mbyenze anu bu kulamika diima pa lubwebwe, kadyakushaalapu tootoo nansha. Nedivingutuke.

199 Pashiishe bantu bakwambila, ne: “Kamwena mushindu wa kweyemena Bible leelu ewu to. Nwatapa ntaala nwadimuka bwa mpindyewu. Kanuyi kiitabuujâ aci to. Kacyena mwa kwikala cilelela to.” Nukaadi bumvumvwe cya nanku dîbâ dyônsò. Kaadiyi kakese aka kaa ne: “Kamwena mushindu wa kweyemena Bible.” Ee, wêwè—wêwè mwikale ne aci mu meeji ebe, ku—kuteeci kucisakidila to, bwalu kacyakukumbana to. Nzubu mujima neupukile anu mwaba awu mene.

200 Bikengela nzubu awu alamakajiiibwe ne nshamenda wa Nyuma Mwîmpè. Ndi njinga kwamba ne mukwatakaja pamwe, nshamenda mwine udi umulamakaja awu. Nenku cintu cimwecimwe cidî cicikwatakaja. . . Nudi bamanye mushindu. . .

201 Ndundu wa munda mwikale mulâmba ne soufre utu misangu yônsò ulaala kupita wa kale udi mulamika biteetela. Kaaluuya kakese padiku anu kâlenga citeetela cya kale cidî cilamika pa ndundu wa munda aci, cya kumpala cidî cyenzeka, bidi byenza ne ndundu awu udi ukwata ndambu luuya, wêwè munyeemeshe ndambu wa lubilu, necilamuke. Eyowa’s, mukalenge. Nwamonu anyi?

202 Nenku’s ke lutatu ludi naalu bantu bààbûngî leelu ewu. Badi bateeta bwa kulamika dimanya dyabo pa dimanya dya pa buloba, ne ndambu wa budimbu bwa kale bwa pa buloba,

kadi, pakaadi mateeta alwa: “Ee, pàmwápa mvwa mutupakane.” Nwamonu anyi? Ke lupepele lupatuka, ushààla bùtùbùtù mu tusunsa tukese. Mbila yebe yònsò yúvwà wela ayi ne ditupika muulu ne panshi adi kabiciyi ne cidibi bikwenzela cya ndolò to. Bantu bakaadi bakumona wèwè mwalukile cyakabidi mu cijibajiba cimwebimwe aci. Nwamonu anyi? Ncya bushuwa.

²⁰³ Kadi wèwè mushaale mwaba awu ne ndambu mukumbane wa luuya lwa Nyuma Mwimpè, mu mushindu wa lukuvwija wèwè ne ndundu wa munda nushaala cintu cimwe. Ke cyòcì aci. Wèwè ne ndundu wa munda nushaala cintu cimwe. Paudi ushaala mwaba awu too ne paudi wèwè ne mukai wònsò wa Nzambi nushaala cintu cimwe, pa dîbà adi sakidilaaku cyòcì aci ku diitabuuja dyebe. Kabiyi nanku to, kucisakididiku to nansha kakese.

Udi wamba ne: “Kamwena mushindu wa kweyemena Dîyi to.” Kudidingi wasakidila aci to.

²⁰⁴ Udi wamba ne: “Milayi idimu eyi, ya dibatiiza dya Nyuma Mwimpè eyi, yakafidiibwa anu bwa bapostolo dikumi ne babidi nkaayaabo,” mudi ekeleeziya mikwabo yamba leelu ewu, kudidingi wasakidila aci to. Mwaba awu ke udi cishimikidi cyabo, cyupukile cyònsò. Nwamonu anyi? Bu muvwa Uziya, makeelela diloolo, paakamonaye cishimikidi cya muntu ewu uvwaye mweyemene, cyupuke cyònsò, mutuuciibwe ne nsudi, kabyakadi bimpè nansha. Mpindyewu: “Anu bwa bapostolo dikumi ne babidi nkaayaabo, anu bapostolo dikumi ne babidi.”

²⁰⁵ Mvwa mupweke mwa Mwaneetu Wright mwamwa . . . Ngela meeji ne badi mwaba kampanda lwa mundekeelu mwamwa. Diloolo kampanda, kuvwa mwambi kampanda mupweke mwômò amu, mêmè nguvwa uyiisha, bayiishi banaayi anyi bataanu musangu umwe. Muiishi ewu kajuuka kadi kwamba ne: “Mpindyewu, ndi njinga kunwambila cintu kampanda nwênù bakwetu bananga. Kaa, ngela meeji ne nudi cisamba cimpè be.”

²⁰⁶ Mêmè kwamba, ngambila muntu kampanda, mêmè ne: “Ke—ke yêyè udi musòmbè mwaba wawa naka wawa. Tangila.”

²⁰⁷ Pa nanku, Junior Jackson, lwa paanyima apu, ucivwa anu ufuminaku ku dyakula. Ke yêyè ne. . . uvwa uyiisha pa ngàsà wa Nzambi. Ekelekele!

²⁰⁸ Uvwa usunsuma, mwindile. Ke yêyè kukatamuka kwaka naka uteeta bwa kuumvwa. “Mpindyewu, ndi njinga kwamba ne Mukalenge Branham ewu, ke mêmè udi unwambila awu, mmufwilakanyi ne Kilisto.” Ke kubangaye mushindu awu, diloolo dijima adi.

²⁰⁹ Bamwe baa ku bayiishi bakaavwa babanga. . . Mêmè ne: “Anji indilaayi. Mpindyewu, nwênù kanwedimu dîyi to, bânà beetu. Yêyè nyawu udi anu nkaayande kadi twètù biikale búngì cyanaana.” Mêmè ne: “Mulekelaayi cyanaana bwa mpindyewu.

Udiye mutwe munu mmêmè.” Ke cîmvwà nkeba, mêmè mwine, ne mwoyi uzuka, ncimanyi cya dyenza to. Nwamonu anyi?

²¹⁰ Nenku, ke yêyè ne: “Mukalenge Branham mmufwilakanyi ne Kilisto,” ke yêyè kutungunuka ne dyamba byônsò binutu bamanye abi, ulola’s. Yêyè ne: “Nyewu wămbi kaaba aka ne: ‘Dibatiiza dya Nyuma Mwîmpè.’” Yêyè ne: “Bible mmwambe ne kuvwa anu bantu dikumi ne babidi baakapeta dibatiiza dya Nyuma Mwîmpè.” Wakula bwa dyondopa dya kudi Nzambi ne: “Anu bapostolo dikumi ne babidi mbavwa ne dyondopa dya kudi Nzambi.” Yêyè ne: “Twêtù tudi twakula mwaba udi Bible wakula, ne tupuwa mwaba udi Bible upuwa.” Mêmè kwindila too ne paamanyiye kulaka mukana mwaba awu bu munda mwa cyabibidi cijima dya dîbà nanku awu.

²¹¹ Mêmè ne: “Anji indila kakese. Ndi mufunde bintu bûngi cyanaana mwaba ewu,” mûngàakambà, “anji mpeeshaku mpunga bwa ngandamune ku bimwe bya ku byôbì abi.” Nenku ndi mwenze anu njuuka anyi, ke mêmè ne: “Mukalenge ewu, nyewu wămbi muvwaye ‘wakula mwaba uvwa Bible wakula,’ muvwa ekeleeziya wende wenza, ‘ne mupuwe mwaba uvwa Bible mupuwe.’ Nwênù bônso’s nwadimwenyi. ‘Eyowa.’” Mêmè ne: “Mpindyewu, yêyè wămbi ne ‘Kuvwa bantu anu dikumi ne babidi baakapeta Nyuma Mwîmpè.’ Wanyi Bible’s nyêyè ewu mwambe ne bavwa lukama ne makumi abidi, dyanza dya kumpala.” Amen! Imanshaa dimanya dya mushindu awu, nwamonu’s, divwaye yêyè uteeta naadi adi.

²¹² Mêmè ne: “Nanku ndi ngela meeji ne Pôlò kaakapeta yêyè Nyuma Mwîmpè to paakambaye ne wakaMupeta apu.” Nwamonu anyi?

²¹³ Mêmè ne: “Mwamwa mu...Paakapweka Filipino bwa kuyiisha beena Samaaleya. Bakaavwa babatiijiibwe mu Dînà dya Yesu. Cibi, Nyuma Mwîmpè kavwa mwanji kubapwekela to. Ke kubiikidishabo Peetelo ne Yone, bôbò kupwekaku ne kubatentekelabo byanza, ke Nyuma Mwîmpè kubapwekelaye. Ngela meeji ne abu bavwa anu dikumi ne babidi’s?”

²¹⁴ Mêmè kwamba ne: “Mu Byenzedi 10.49, pavwa Peetelo usanganyiibwa kuulu kwa nzu bu apu, ne paakamonaye cikeena-kumona bôbò biikale benda baya batangile kwa Koneeliyo apu. Pacivwa anu Peetelo wakula mêyi awu, Nyuma Mwîmpè kupwekela bavwa bateeleja Dîyi abu.” Mêmè ne: “S’ke Bible uci di wakula ewu. Ekeleeziya wenu mwaba awu udi penyî?” Mmushaadile mu bya difwikakaja’s. Ncya bushuwa. Nwamonu anyi?

²¹⁵ Mêmè ne: “Dyondopa dya kudi Nzambi, wambi ne: ‘Anu bapostolo dikumi ne babidi mbavwa nkaayaabo ne dyondopa dya kudi Nzambi.’ Bible nyewu mwambe ne Stefano wakapweka ku Samaaleya ne wakiipata badémóns ne wakondopa babeedi, ne kwakadi disanka dinene mu cimenga amu. Wa bwalu kayi

nansha umwe wa ku dikumi ne babidi abu to. Kavwa mupostolo to. Yèyè uvwa mulami.” Amen. Amen.

216 Mémè ne: “Ne Pòlò mwine kavwa nansha umwe wa ku dikumi ne babidi bavwa mu nzubu wa kuulu abu to, kadi nyawu uvwa ne dipà dya dyondopa.”

217 Mémè ne: “Anji tangila anu mapà a dyondopa miine! Kacya anu byatungunuka, bidimu makumi asatu bimane kupita, yèyè ucivwa anu mu beena Kolinto, mwikale anu uteeka dipà dya dyondopa pa kaaba kaadi mu Mubidi wa Kilisto.” Kaa, ekelekele!

218 Mpindyewu, dimanya dya mushindu awu dyûdi uyiila mu mukanda kampana, mbipiciibwe ne wèwè mudimànshe ku diyaala’s. Fika ku edi dimanya. Padi Nzambi mwambe ne: “Yèyè udi umweumwe awu makeelela, leelu, too ne kashidi,” amba ne: “Amen.” Eyowa’s, mukalenge. Eyowa’s, mukalenge. Kî ng’anu kudi dikumi ne babidi abu to; mbwa bônso. Paudi upeta dii—diitabuuja dya mushindu awu, padi diitabuuja dyebe, ku kantu ne kantu, ditwa “amen,” pashiishe wamba ne: “Mmwômò,” sakidilaaku aci ku dyôdi adi.

219 Ciinâyì. Bikengela tulwijakaje, bwalu ndi anu...Bidi byumvwika anu bîmpè be bwa kwikala kacya anu ngimana mwaba ewu ngakula pa byôbi abi. Amen. [Mwaneetu wa balume mukwabo udi wamba ne: “Bidi bitusankisha be.”—Muf.] Eyo. Ciinâyì. . .Twasakidila.

220 Usakidile “didikanda.” Kaa, ekelekele! Nyewu twâfikî ku didikanda. Mpindyewu, wâmanyi kupeta diitabuuja, dyambedi; bikengela wikale ne dyôdi adi, kumpalampala. Pashiishe udi usakidila bukole ku diitabuuja dyebe, piikalabu bukole bwa mushindu wa mwîmpè. Pashiishe udi usakidila dimanya, piikaladi dimanya dya mushindu wa mwîmpè. Mpindyewu neusakidile didikanda.

221 Didikanda kî mbwena kwamba ne, “kulekela kunwa maala a kapyà” to, mwaba ewu, anyi cinyi. To, to. Didikanda kadyena diswa kwamba ne mbwanga bwa kwondopa dinwa dya maala a kapyà to, mu ebu bwalu to. Edi didikanda ndya Bible, didikanda dya Nyuma Mwîmpè. Aci cidi anu lumwe lwa ku nkuka ya mubidi, kadi twêtù tudi twamba didikanda dya Nyuma Mwîmpè. Mbwena kwamba ne, mushindu wa wèwè kulama ludimi, kubenga kwikala mwena kabwabwa; mushindu wa kukontonona cilunji cyebe, kuyi ubinduluka musangu wônso udi muntu ukucyamakana ku mèyì to. Kaa, ekelekele!

222 Bakwetu wa yaaya, bààbûngî beetu nebadishinde kumpala mene kwa katuyi nansha banji kubanga, kî mmwômò anyi? Nwamonu anyi? Pashiishe ke twêtù kubanga kudikonka ne mbwa cinyi Nzambi kèna mu Ekeleeziya Wende, wenza bishima ne maalu avwabo benza pa ciibidilu. Eyowa’s, mukalenge. Nwamonu anyi?

223 Sakidila bintu ebi. Sakidila didikanda ku cyôci aci. Kaa, didikanda, mushindu wa kwandamuna ne musangeelu padibo bakwambe bwalu ne cijji. Muntu wamba ne: “Mona musumba wa bansantu babunguluki baa mu malaba kwaka naka’s we!” Mpindyewu kuyi uzunzuka ubanga kubunya maboko a muteelu to. Nwamonu anyi? Aci to. Kadi mwikale wakula ne dinanga dya muntu wa difwana dya Nzambi, ne didikanda, ne musangeelu. Mushindu awu ke unudi baswe kwikala anyi? [Disangisha didi dyamba ne: “Amen.”—Muf.] Padibo bakuyobola, kuyi uyobolangana peebe to. Enza bwa Yêyè ikale cyebe cileejilu.

224 Paakambabo ne: “Wêwè ne udi Mwânà wa Nzambi, enzabi bwa mabwe aa andamuke mâmpà,” Yêyè’s uvwa anu mwa kwikala mucyenzè, bwa kuleeja muvwaYe Nzambi. Kadi Yêyè uvwa ne didikanda. PaakaMubiikilabo ne, “Beelezebula,” Yêyè wakamba ne: “Nènnûfwilè luse bwa cyôci aci.” Ncya bushuwa anyi? BaakaMutuula manza a myevu ku cibanga, kuMutwilabo mate mwisù, bamba ne: “Tuuluka ku nkuruse!”

225 Yêyè wakamba ne: “Taatu, ubafwe luse. Kí mbamanye cidibo benza aci to.”

226 Paabi’s, Yêyè uvwa ne dipà, Yêyè’s uvwa mumanyi wa maalu ônsò, bwalu munda Mwende muvwa kaabujima kaa Bunzambi mu mubidi. Bôbò’s bakaavwa baMumone wenza bishima, pa kwambila bantu bubu buvwabo naabu, ne bikwabo bya mushindu awu. Bôbò kuMujingila mukusu kaa mututu nenku ewu, baMuswika kwisù, baMutuuta dikombo ku mututu, bamba ne: “Amba ciprofeta tŭng, utwâmbilè udi muKutuute. NetuKwitabuuje.” Nwamonu anyi? Yêyè uvwa ne didikanda.

227 Mpindyewu, wêwè naadi mushindu awu, udisakidile ku diitabuuja dyebe. Paucidi anu utonoka ne wandamuna kuyi ne kaneemu to, ne ukokangana, ne ubinduluka, ne wenza maalu a lukutukutu, huh-uh, wêwè kwênàku ne. . . Kwêna mwa kusakidila aci to, bwalu kacyakusakidiibwa to. Nwamonu anyi? Kacyakubwelakananganaku to. Kwêna mwa kwangata kapese kaa ndundu, udi mumanye, kukalamika ku katupa kaa cyamu to. Kabyakukumbanaku nansha. To, bikengela kiikale kanefuke, anu mùtù ndundu amu. Nwamonu anyi? Nenku padi diitabuuja dyebe ne didikanda dyebe bishaala mushindu wa mwomumwe wa didikanda dya Nyuma Mwîmpè divwaYe naadi adi, pa dîbà adi nebibwelakanangane Nende. Wàsàkidiibu ku cyôci aci.

Padi bukole bwebe bu Bwende bukole, pa dîbà adi nebusakidiibwe ku cyôci aci.

228 Padi dimanya dyebe diikale bu Dyende dimanya: “Ndi ndwa bwa kwenza diswa Dyebe, Wêwè Nzambi.” Nwamonu anyi? Ne Dîyì dya Taatu, Yêyè wakacimuna démon ne démon yônsò. Maulu ne buloba nebijimine, kadi Dîyì kadyakujimina to. Nwamonu anyi? Paudi ne dimanya dya mushindu awu, nedibwelakanangane ne diitabuuja dyebe.

229 Paudi ne mushindu mujaalame wa didikanda, muvwaYe naadi amu, nedibwelakanangane. Wêwè kuyi naadi to, dyenze anu bu dya citupa dikwatakaja kudi bantu, diitabuujja dya disaapuluke, anyi didikanda dya ne: “Kaa, mêmè’s mvwa ne cya kumumubangula, kadi—kadi pàmwăpa bikengela ndekele, bwalu mbafwanyine kumfunda dînà mu cibejibeji bwa ciine aci.” Adi kî ndidikanda dya mushindu udiYe wamba to. Kudidingi wasakidila aci to. Kacyakukumbana to. Kadi mu bushuwa bwa bwalu, ne bupole budi bufumina mu mwoyi webe, bu wêwè mwa kufwila muntu yônso luse, kushaala mupuwe, kulekela peebe nanku awu, wamonu’s, pa dîbà adi nebibwelakanangane. Udi mwa kusakidila aci ku diitabuujja dyebe. Yoyöyò!

230 Kabyena bikemesha to padi ekeleeziya mwikale ne mupuuya mwîpî. Kî mmwômò anyi? Kabyena bikemesha to. Ndi mufwanyine kwamba ne: “Nyingalalaayi nubatiijiibwe, mudi Bible mwambe, mu Dînà dya Yesu Kilisto.” Kadi Trinitaire wa mu umwe udi kayi witabuujja aci to, neâmbè ne: “Mufwilakanyi ne Kilisto wa kale wawa. S’mmwena Dînà Dya Yesu. Mmwena Yesu Nkaayende.” Dimuka, mulumyana, ncyêna mumanye mudi didikanda dyebe mpindyewu ewu to. Wamonu anyi? Mbwa cinyi kwêna ulwaku, wamba ne: “Twănji kuyiikilabi pamwe pa bwalu ebu, Mwaneetu Branham. Ndi muswe kuumvwa dyumvwija dya Cyôci eci”? Wamonu anyi? Pa nanku pwekela kuneeku uteleje Cyôci aci. Nenku pa dîbà adi Cyôci aci nciteekiibwe kumpala kwebe, kadi wêwè wasa lwendu uya; netu—netufike ku cyôci aci mu tusunsa tukese emu, ku “difwana dya Nzambi,” wamonu’s. Kadi paudi—paudi utonoka apu, ukeba bwa kutupikila ku mushindu wônso bwa ne bwalu bwine abu bujike, huh-uh, ka—kabyena nanku to. Wamonu anyi? Kwêna mwanji kwikala ne didikanda dya Bible paudi wenza nanku awu apu to; mushindu wa kwandamuna. Nenku wêwè ne byônso ebi, udi mwa kusakidila cyôci eci ku diitabuujja dyebe.

231 Pashiishe, paanyima paa aci, ciinâyî, udi ujinga kusakidila lutuulu ku diitabuujja dyebe. Paudi ne diitabuujja, “didi dilela lutuulu,” mudi Bible mwambe. Wamonu anyi? Pa nanku, eci ndutuulu. Mpindyewu, ke cintu cidî cilonda ciikala mwa kwibaka cipidi eci. Nudi bamanye, Nzambi udi ne bya diibaka naabi bya bushuwa mu Nzubu Wende.

232 Nwamonu mushindu utudi ne mupuuya mwîpî anyi, wêwè mwaneetu wa balume, wêwè mwaneetu wa bakaji? Nwamonu anyi? Nudi numona ne mbwa cinyi, mwaba utudi anyi? Eyowa’s, mukalenge. Nwamonu anyi? Tudi ne butumbi, tudi ne mbila ne bikwabo bintu, mbwalu tudi ne diitabuujja. Kadi patudi tupweka ku ebi bintu *apa*, Nzambi kêna mwa kutwibaka mu cipidi aci to. Nwamonu anyi? To. Kêna mwa kutufikisha too ne kuulu mu mwaba wa mushindu awu to. Tudi ne bintu bikwabo byônso ebi. Tudi tudishinda, tusenunuka tuya ku luseke biikale naabi. Nwamonu anyi? Kêna mwa kwibaka Ekeleeziya Wende to.

233 Lutuulu ku cinyi? Lutuulu lwa mushindu kaayi? Cintu cya kumpala, nkwikala ne lutuulu kudi Nzambi. Wêwê ne diitabuuja dilelela, dishuwashuwale, newikale ne lutuulu lulelela ne lushuwashuwale, bwalu diitabuuja ndidi dilela lutuulu. Padi Nzambi wamba cintu, udi uciitabuuja. Kwajiki. Udi ne lutuulu.

234 Udi wamba ne: “Ee, ngaMulombu bwa kungondopa makeelela awu diloolo, kadi nyewu nci di anu nsaama mu dinda emu anu mwanyi ne kale.” Kaa, ekelekele! Lutuulu kaayi?

235 Nzambi wakambila Abraham, kadi paanyima paa bidimu makumi abidi ne bitaanu kakuvwaku nansha kaacimanyinu to. Yêyê uvwa anu kacya witabuuja. Uvwa ne lutuulu kudi Nzambi. Uh-huh.

236 UMuteeke Yêyê kumpala kwebe misangu yônsò. Yêyê ikale cintu cilondele cidi cikucyamakana. Kwêna mwa kuMusambuka to, pa nanku uMuteeke anu kumpala kwebe. “Yêyê ngudi mwambe nanku awu, nenku necyenzeke.” Nwamonu anyi? UMulame kumpala kwebe. Ncya bushuwa.

237 Noa uvwa ne lutuulu. Eyo. Noa uvwa ne lutuulu lulelela, lwa muntu wa difwana dya Nzambi. Nzambi wakamba ne: “Nêmbutulê buloba ebu ku mvula,” nenku Noa kwanjiye kuyiisha bidimu lukama ne makumi abidi, kumpala. Lutuulu lwa luyiila ne panshi. Kakuvwaku nansha kaalumuma kanji kumata mu Dyulu to. Kakuvwa cintu nansha cimwe to. Anu lupwishi kacya lwamonangana, munda mwa bidimu lukama ne makumi abidi, kadi yêyê anu ne lutuulu.

Nenku, Nzambi udi uteeta lutuulu lwebe. Ncya bushuwa. Nzambi utu ubateeta.

238 Paanyima paa Yêyê mumane kwambila Noa, ke mpindyewu Yêyê kwamba ne: “Noa, ndi muswe bwa wêwê kutungunuka too ne ku dibwela dya mu bwâtù. Mêmê nênsakê nyama ilwe kubwelamu, Ndi—Ndi muswe ubwelemu. Bândilà mu cibambalu cya kuulu, mpindyewu, bwa wamona mwa kutangila pambelu, ku dididiishi dya kuulu. Mpindyewu, ndi muswe ubwelemu. Ndi muswe wambile bantu aba ne: ‘Maalaba, cîntù muyiishe munda mwa bidimu lukama ne makumi abidi aci necyûlê.’ Eyo, pwekela lwa mwinshi mwamwa ùbâmbilê.”

239 Cimanyinu cya kumpala cyakadi cinyi? Noa wakabwela mu bwâtù. Kakuvwa mvula to. Noa wakadilongolola, wakavwala nkooci wa mvula, ne bikwabo, bwa wamona mwa kutapa dîsù pambelu, ku musangu ne ku musangu. Kudilongololaye. Kadi dituku dyakalonda . . .

240 Ndi ngitabuuja ne uvwa mwa kwikala mwambile famiye wende, ne bakaji baa bânà bende ne bônso abu, ne: “Kaa, ekelekele! Maalaba nenumone cintu cinutu kanuyiku banji kumona kacya to. Bwalu, mu maulu mwônso, nemwikale mufiike fitutuu. Nekwikale mikungulu ne mikenyi yela. Mwele munene wa nkânzâ wa Nzambi neupenye eku ne eku kwa dyulu.

Neapiishe musumba wa bangènzàmpèkààtù badi batubenge aba, munda mwa bidimu lukama ne makumi abidi ebi. Nwènú tangilaayi anu cyanaana numone.” Nwamonu anyi?

²⁴¹ Bamwe baa ku beena kwitabuuja baa nkacinkaci, nudi bamanye, biikale bajinganangana anu kumpenga aku kadi kabayi mwa kubwelaku to, nudi bamanye. Nu—nucidi anu naabo, nudi bamanye. Pa nanku bôbò—bôbò kuvwila lwa pabwipi apu, bamba ne: “Ee, mukulakaji ewu mmufwanyine kwikala mubinge’s, pa nanku netuye kuntwaku tukindile ndambu wa matuku, anyi kwindila ndambu wa mēbà mu dinda, nwamonu’s.”

²⁴² Dituku dyàkalondà, pamutu paa divuba difiike, ke dîbà kupatuka diikale dibanda anu muvwadi dibanda kwônsò aku. Noa kutapa dîsù pambelu. Yêyè ne: “He, kakwena divuba nansha dimwe to.”

²⁴³ Ke mulumyana awu kusemena, yêyè ne: “Aa, mēmè’s mvwa mumanye ne wêwè udi umwe wabo. Wamonu’s, nyawu ukaadi ujingakanangana anu kuntweku.”

²⁴⁴ “Ee, wâmfwakù luse, mukalenge. Ha-ha. Pàmwâpa mvwa—mvwa—mvwa anu, udi mumanye’s, anu ngakula mwikale musaluke cyanaana, udi mumanye. Mu mushindu kampanda, udi umona’s. Ha-ha-ha.”

²⁴⁵ Kadi, Noa, uvwa yêyè ne lutuulu. Kwambaye ne: “Piikala bwalu ebu kabuyi bwenzeke leelu to, nebwenzeke maalaba.” Bwa cinyi? Nzambi nguwwa mwambe.

“Uvwa mukwambilebu dîbà kaayi’s, wêwè Noa?”

²⁴⁶ “Kukaadi bidimu lukama ne makumi abidi. Nyewu nkaadi mufike too ne pânkaadi apa, nanku ndi anu ngindila apa bwa mpindyewu.” Nwamonu aci anyi? Paanyima paa mutanci. . .

²⁴⁷ Tudi tusangana ne, Nzambi nyewu mufike too ne patukaadi apa, mwindile Ekeleeziya, yêyè pende, kadi Yêyè neikaleku. Kanuditacishi to. Yêyè ngudi muMulaye.

²⁴⁸ Twindidi cikondo cyônsò eci bwa dibiika dya ku lufu. Nediikaleku. Kuditacishi to. Nzambi ngudi mudilaye. Indila ne lutuulu. Pawapona mu tulu, aci kacya-. . . Udi mufwanyine kubakulaku kalù kakese kumpala kwa dyôdì kwenzeka, kadi neubiike pa diine dîbà adi. Yêyè ngudi mudilaye, wamonu’s. Kalù, wamonu’s, citudi tubiikila ne nkalù kaa lufu aci, udi mumanye. Citudi tubiikila ne ndufu aci, nkalù kakese cyanaana, anyi kulaala tulù mu Kilisto. Cintu ne nkufwa mu Kilisto kacituku to. Mwoyi ne lufu kabyenaku mwa kwikala byônsò pamwe to. Nwamonu anyi? Citudi tubakula nkalù cyanaana, kalù kadi balunda beetu kabayi mwa kutubiikila peetu kumba kubiika to. Anu Yêyè ke udi mwa kubiikila. “Neabiikile, ne mēmè nēmMwitàbè,” mwakamba Yobo. Yobo mmulaale tulù mpindyewu kukaadi bidimu binunu binaayi. Kuditacishi

to. Yêyè ne—neabiike. Kanuditacishiku to. Yêyè uci di anu mwindile.

249 Noa kwindilaye. Dituku diinâyî kupitadi. Mvula udi aku anyi udi kunu. Bidi anu bîmpè. Bwalu nebwenzeke.

250 Ndi mwa kuumvwa Mandamu Noa usemena pabwîpî apu wamba ne: “Papa, udi mutwishiiib- . . . ?”

“Kwakulu mushindu awu nansha.”

251 Yêyè uvwa ne lutuulu, bwalu uvwa ne diitabuuja. Eyowa’s, mukalenge. Uvwa ne bukole. Uvwa ne dimanya dya ne Nzambi uvwa mubinge. Uvwa ne didikanda. Yêyè kavwa mubinduluke, wamba ne: “Ee, ncyêna mumanye biine byônsò abi ne bidi bishi to. Ngâjîmiji dimanyika dyanyi dyônsò pambelu paapa.” To, to. “Bantu kabacyena bancyuka kabidi to. Nêmpatukè pambelu paapa mbangulule byônsò, ngênzè bipyabipya.” To, to. Yêyè uvwa ne lutuulu. Nzambi ngudi mulaye. Nzambi neâcyênzè. Nzambi neâcyênzè, bwalu Nzambi ngudi mwambe nanku.

252 Neku ndi mwa kumona mwanende wa balume usemena kudiye aku, wamba ne: “Papa, udi mumanye. . .” Umutuuta cyanza pa mvya yende mile ayi, nudi bamanye. Wa bwalu ukaavwa ne bidimu nkama, nudi bamanye, musòmbè mwaba awu. Yêyè ne: “Ndi mumanye ne wêwè ewu ukaadi nkambwa mununu. Ndi—ndi mukunange, papa. Kadi mbifwanyine kwenzeka ne wikale ndambu mwambe cya naka anyi?”

“Kaa, to. To.”

“Bwa cinyi?”

“Nzambi ngudi mwambe nanku!”

253 “Ee, papa, ke matuku asambombo aa atudi kacya anu twasòmba kuulu eku aa. Basòmbè kuulu eku muneemu mu ciibwâtù buneneci, cya kale, cyûme ncyoncyoncyo cidi cisòmbè anu mwab’ewu eci. Cya bwalu cilaaba kamonya, munda ne pambelu. Ne twêtù tudi benze bidimu byônsò ebi anu munkaci mwa dibwibaka. Wêwè peebe wimana anu pambelu paapa yuiisha, too ne muvavu kutoloka mvya ne kutuuka dibâla. Kadi ke wêwè ewu mpindyewu lwa kuulu eku, uditacisha bwa kwamba cintu *kampanda*. Ne bantu paabu’s ke kusekabo eku, baasa tumata tubole ne bikwabo bintu ku luseke lwa bwâtù. Tangila kwaka umone cyûdi wenza. Mona’s, udi mumanye. . .”

“Ikalaku ne lutuulu’s, mwanaanyi.”

“Udi mutwishiiibwe anyi?”

“Mvula’s nealoke!”

Ke mukaj’a mwanende ne: “Taatu, udi mumanye. . .”

“Mvula’s nealoke!”

254 “Kadi’s nyewu bidimu byônsò ebi nkacya anu twindila. Tudi anu tulongolola. Peebe wêwè ewu’s udi mutwâmbile ne mvula nealoke, kukaadi lumingu lujima. Kadi nyewu tukaadi

munda emu, biibi byônsò bikanga, ke twêtù aba tukaadi twâtwa eku twâtwa eku muneemu munda emu, muunya paawu ke kukenukawu eku anu bu pa kânà kakulu.”

“Kadi mvula’s nealoke!”

“Wâmanyi bishi?”

“Nzambi ngudi mwambe nanku!”

²⁵⁵ Mpindyewu paudi ufika mu mushindu awu, sakidila aci. Kadi wêwè kuyi mupete cyôci aci mu mushindu awu to, ku—kudidingi wacisakidila to. Kabyakukumbanaku nansha. Kabyakukumbanaku pa bidi bitangila dyondopa nansha. Kabyakukumbana pa bidi bitangila cintu cikwabo nansha cimwe to. Nwamonu anyi? Bikengela cisambakanangane ne cyamu cimwecimwe aci cidici cibwelakananganangane naaci. Ncya bushuwa. Bikengela ucisakidile. Lutuulu ku mulayi wa Nzambi. Eyowa’s, mukalenge. Noa yêyè wakaciitabuuja. Kabidi uvwa ne lutuulu kudi Nzambi, bidimu lukama ne makumi abidi.

²⁵⁶ Môsà, uvwa ne lutuulu kudi Nzambi. Eyowa’s, mukalenge. “Môsà, ngûmvù lubila lwa cisamba Cyanyi. Ngâmònu lutatu lwabo. Ndi mpweka bwa kubasungila. Wêwè ke ûngââtùmà bwa kupwekamu.”

²⁵⁷ Ne dipangakana dikese mwaba awu pankaci pende ne Nzambi, ke Nzambi kumuleejaye butumbi Bwende. Yêyè ne: “Ke mêmè uyaaya ewu.” Mmwenze anu umona butumbi bwa Nzambi musangu umwe, nwamonu’s, pende umba upeta ne diitabuuja.

KwambaYe ne: “Cidi mu cyanza cyebe aci ncinyi, Môsà?”

Yêyè ne: “Dikombo.”

Yêyè ne: “Dyêlà panshi.”

Kwandamukadi nyoka. Yêyè ne: “Kaa, ekelekele!”
Kubangaye . . .

²⁵⁸ Yêyè ne: “Dyâmbùlaaku, Môsà. Piikalabi ne Mêmè ndi mukumbane kudyandamuna nyoka, Ndi mukumbane kudyandamuna cyakabidi dikombo.”

²⁵⁹ Aa! [Mwaneetu Branham udi utuutakaja byanza misangu isatu—Muf.] Amen! Piikala Nzambi mukumbane kumpa mwoyi wa panwapa ewu, Yêyè mmukumbane kumpa Mwoyi wa nyuma! Piikalabi ne Nzambi uvwa mukumbane kumpa dilediibwa dya kumpala, Yêyè mmukumbane kumpa Dilediibwa dya cyakabidi! Amen! Piikala Nzambi mukumbane kwondopa *eci*, ku dyondopa dya kudi Nzambi, Yêyè mmukumbane kucijuula ku lufu bwa butumbi Bwende, ku dituku dya ndekeelu. Ncya bushuwa.

²⁶⁰ “Ndi mwa kwela dikombo edi panshi ne kudyandamuna nyoka. Ndi mwa kudyaluja kwandamukadi cyakabidi dikombo. Mukwate ku mukila aku.”

²⁶¹ Môsà kwolola cyanza e kumukwata. Ndyôdi adi, dikombo. Kubangaye kusakidila dimanya anu piinaapu. Nwamonu anyi?

“Ku cyanza cyebe aku kudi disaama kaayi, mpindyewu, Mòsà?”

“Nkutupu.”

“Cyèlààku mu dyâpà dyebe amu.”

²⁶² “Eyo. Kadi . . .” Citooke tòò ne nsudi. “Eyi Mukalenge, tangilaaku umone cyanza cyanyi!”

“Cipingàjăku mu dyâpà, Mòsà.”

²⁶³ Ucipingaja anu mu dyâpà *nunku* anyi, cyôci kwandamuka anu bu . . . Ke kubangaye anu kubisakidila *nunku*, pashiishe, nwamonu’s. Eyowa’s, mukalenge.

²⁶⁴ Ke kupwekaye kuntwaku. Nunku dipangakana dya kumpala . . . Kupwekaye kuntwaku. Upatuka kwaka wamba ne: “Mukalenge Nzambi wămbi ne: ‘Lekela cisamba Cyanyi ciye.’ Pâlò, ndi muswe umanye bwalu ebu. Mêmè ngudi mulwe bu mwênâmpalà wa Nzambi. Udi ne cyà kuntumikila.”

²⁶⁵ Ke Pâlò ne: “Kutumikila? Utu mumanye ne mêmè ewu ndi nganyi? Mêmè’s ndi Pâlò. Nkutumikila kaawêwè aka, kapika?”

²⁶⁶ Yêyè ne: “Anyi udi untumikila, anyi ufwafwa. Newénzè anyi eci anyi cikwabo ciwaswa aci.” Bwa cinyi? Yêyè uvwa mumanye civwaye wamba. Uvwa ne mudimu mumutuma naawu. Ukaavwa mupweke mwômò amu. Uvwa mwakule ne Nzambi. Uvwa ne diitabuuja. Uvwa mumanye pavwaye.

“Kaawêwè aka uswa bwa mêmè nkutumikile? Mpàtùkilè mwab’ewu!”

“Kadi imana nkuleeje.”

“Ndeējaaku cimanyinu.”

Kwelaye dikombo panshi; kwandamukadi nyoka.

²⁶⁷ “Mona’s,” ke yêyè awu, “aku’s nkaadiyele kakese kaa beena majimbu! Vwilaayibi apa kakese. Vwilaayibi apa, Yane, wêwè ne Yambele, elaa yi makombo enu awu panshi.” Kuèlabò panshi, ke wôwò kwandamuka nyoka.

²⁶⁸ Yêyè ne: “Mpindyewu, kaawêwè kantu cyanaana aka, pwekela kûndi eku tûng, mêmè mwena Ejipitu, pâlò wa Ejipitu. Upweka peebe apa ne kaadiyele keebe kakese kaa beena majimbu aku, kaadijimbu keebe aku,” nudi bamanye, dibala dya mu meeji. Nudi bamanye cîndi muswe kwamba aci. Ndi ntekemena ne ncyôci aci cinudi nubala. “Lubuku anyi cintu kampanda, wamonu’s, eyo, upweka peebe apa ne bya nanku awu.” Yêyè ne: “Ee, twêtù’s tudi mwa kwenza cintu cimwecimwe cyûdi kaawêwè aka wenza aci.”

²⁶⁹ Mòsà uvwa cinyi? Yêyè kaakamba ne: “Kaa, Mukalenge Pâlò, mfwileku—mfwileku luse, mukalenge. Nênshaalè mupika webe.” To, mukalenge.

270 Wakiimana kamungulu. Amen. Wakashaala anu mwaba awu. Nzambi ngwákamba, kavwaku ne mpatà mu mwoyi wende to: “Ikala ne ditalala. Mémè’s nènkuleejè cintu.” Paudi mwenze anu menemene cidiYe mwambe bwa kwenza, bitu bimweka anu bu ne mbiye mu mushindu mubi; imana kamungulu, angata lutuulu.

271 Mòsà kwamba ne: “Udi mumanye’s, pândi mwibakile pa cishimikidi aci, pàkaavwa lutuulu luteekapu, nenku nêngindilè anu kwindila bwa kumona cyenza Nzambi.”

272 Ke nyoka mikulakaji ayi, idikokela eku ne eku, ipwidila, yelangana tushiba. Cya kumpala cyènzèkì ncinyi, nyoka wa Mòsà kubanga: “Kub, kub, kub,” ke kuyimina yònsò kuyipwekesha mu difu. Yèyè uvwa ne lutuulu.

Bàdì bindilà Mukalenge, nebavwijulule
dikanda dyabo dipyadipya,
Nebabande ne mapwapwa bu mukanku.

Ncya bushuwa anyi? [Disangisha didi dyandamuna ne: “Amen.”—Muf.] Nwamonu anyi? Eyo.

Nebanyeeme kabayi bacyoka, benda lwa
makàsà kabayi bapangila.

Wamonu’s, wèwè indila anu Mukalenge. Angata lutuulu. Wamonu anyi? Eyowa’s, mukalenge.

273 Pashiishe Izaleela uvwa ne cya kupatudiibwa. Ke mishindu minene ya dipangakana kulwayi, ke Mòsà kwindilaye.

274 Pashiishe kubwelaye mu cipeela. Kuvwa ntanta wa lwendu lwa matuku bu asatu anyi anaayi cyanaana. Kudi anu ntanta wa miles makumi anaayi [kilomeeta 64] kuumukila mwaba uvwaye mukosolwele awu, bitangilangane anu ne mwaba wakalwabo kukosolwela cyakabidi awu. Kadi, Mòsà, mu cipeela amu, kwindilaye bidimu makumi anaayi. Lutuulu’s. [Mwaneetu Branham udi utudika ne tuseku—Muf.] Amen. Ncya bushuwa. Kwindilaye bidimu makumi anaayi. Kaa! Eyowa’s, mukalenge.

275 Nenu bivwa bîmpè twètù kwikala ne lutuulu muntu kudi mukwende, twètù peetu. Nudi numona anyi? Mûngà musangu. . . Tutu tulwa—tutu tulwa bapange lutuulu bikole be kudi bakwetu. Tutu twela meeji ne bidi bikengela twètù kwikala bu Mòsà. Mòsà uvwa ne lutuulu kudi cisamba. Monaayi, ke civwa cibapangishe bwa bôbò kuya dyamwamwa. Nwamonu anyi? Paudi uteeta bwa kwenza cintu kampanda. . .

276 Cileejilu, ngâkateeta bwa kufikisha tabernacle ku dyumvwa Mukenji ewu, bwa kumona ne cidimba cyònsò cya tabernacle cishaale *Cyôci eci*. Mbikole bwa kucyenza. Ndi muditacishe bwa kwangata lutuulu; mbidimu makumi asatu ne bisatu ebi. Nwamonu anyi? Kwangata lutuulu mwine. Bakaji bacidi anu babebula nsuki yabo, bicidi anu bya mwomumwe. Kadi kwangata anu lutuulu. Nwamonu anyi? Kwangata anu lutuulu.

Kwindila. Bikengela anu nanku. Wèwè kuyi naalu to, kudidingi wibakila pa eci cidi kwinsi *eku* eci to. Ikala ne lutuulu.

²⁷⁷ Nansha musangu mukwabo, paakajuuka musumba awu wa bantomboji baakapanga lutuulu abu, baakafikisha Mòsà ku dyenza cintu kampanda cya cibi. Kadi, nansha nanku awu, paakafikabi ku diteetangana dya makanda, cyenzi cyabo aci cyakendesha Nzambi ku mwoyi. KwambaYe ne: “Tapuluka naabo, Mòsà. Nèmbàshipè musumba wabo mujima, bwa kubangulula.”

²⁷⁸ Yèyè kudyela pankaci, ne: “Nzambi, kwenji aci to.” Ncinyi aci? Lutuulu kudi bantu bavwa bamutombokela.

²⁷⁹ Ndi ndikonka ne twètù aba tudi bafwanyine kwenzaku nanku anyi? Pawikala kuyi mwa kucyenza to, kudidingi wibakila pa *eci* to, bwalu kacyena—kacyena cishintuluka to, udi mumanye nanku. Mushindu awu nguvwa cya kumpala cibwelakanangane mu *eci*, ne ke mushindu udi cimwe ne cimwe cya ku byòbì abi ne cya kubwelakanangana. Cyanaana, kwakufika ku cipidi aci cya cisòmbedi cya Nzambi udi ne mwoyi to, paudi kuyi ne lutuulu, lutuulu, muntu ne mukwende. Eyo.

²⁸⁰ Bânà baa beena Ebelu bavwa ne lutuulu. Cya bushuwa, bavwa naalu. Nzambi uvwa mubalaye, mubãmbile ne: “Kanwinaminyiku lupingu nansha lumwe to.” Kadi bóbò bavwa ne lutuulu. Baakamba ne: “Nzambi wetu twètù udi ne bukole. Kadi, nansha nanku, katwakwinaminaku lupingu lwebe alu to.” Lutuulu, mumanye ne, Nzambi neamubiishe ku lufu mu matuku a ndekeelu.

²⁸¹ Mwoyi ewu kawena ne bwa nsongo to, twamb’eku twamb’eku. Nwamonu anyi? Nzambi neawubiishe ku lufu mu matuku a ndekeelu. Kadi pakaadibi ne nkwinamina lupingu kampanda, twètù katwakucyenzaku to. Mpindyewu, netupe Kaayisa cya Kaayisa, kadi, pakaadi Kaayisa ukabwelakana ne Nzambi, Nzambi ke udi kumpala.

²⁸² “Nzambi mmwambe ne: ‘Kanwinaminyi lupingu alu to.’ Ne mèmè ncyakucyenza to. Nzambi wetu twètù udi ne bukole bwa kutusungila. Yèyè kayi mutusungile to, ncyakwinaminaku lupingu alu nansha.”

Yèyè ne: “Mbîmpè’s, cikutu cya kapyà’s ncyôci aci.”

²⁸³ “Ee,” mwakambaye, “kaa, ngela meeji ne, mvula mukole nealoke bufuku ebù àkàjìmè kònsò.” Kadi kayi anu muloke to. Anu lutuulu lumonangane.

²⁸⁴ Bucya mu dinda, paakabapatulabo ne kubafikisha kumpala kwa tubadi, Nebukandaneesa musòmbè mwaba awu. Yèyè ne: “Mbîmpè’s, nwènù balumyana, nukaadi badilongolole bwa nwènù kuvuluka ne mèmè ke mfumu wenu anyi?”

“Ncya bushuwa. Ikala ne mwoyi kashidi, Eyi mfumu wa yaaya.”

“Mpindyewu inaminaayaaku lupingu lwanyi.”

“Kaa, to.”

²⁸⁵ “Ee, nwênù’s nenwoshike nulungule. Nudi bantu baa lungenyi. Nudi ne meeji matwe. Nutu batukwacishe bikole. Nutu dibenesha bwa bukalenge bwetu. Kanwenaku mwa kuumwwa ne ncyèna muswe bwa kwenza cyôci eci anyi? Kadi nyewu ndi mweleshe dîyì dya patooke mwab’ewu, ne bidi bikengela dyenjiibwe. Ncyèna muswe kunwela muntwamu to. Kaa, balume we, mbwalu kaayi bwine ebu’s bunudi naabu?”

²⁸⁶ “Ndi mumanye ne abi bidi byumvwika bîmpè be ku maci. Kadi, Nzambi wetu twètù udi ne bukole bwa kutusungila. Kadi nansha byôbì ne . . .” Bavwa ne lutuulu.

²⁸⁷ Ke kubangabo benda babanda ne cibumba. Kubangabo kutangilangana. “Bidi anu bîmpè. Mbîmpè.” Bangate lutuulu. Beela cidya dimwe, Nzambi udi aku anyi udi kunu. Bidya bibidi, Kayiku. Bidya bisatu, bidya binaayi, bidya bitaanu, batungunuke anu benda baya, Yèyè kayi anuku to. Ke kwelaye cidya kubwela ne mu cikutu cya kapyà. Bavwa ne lutuulu. Kadi Yèyè uvwa mwômò amu. Nwamonu anyi? Anu ndambu mukumbane wa kapyà kubalengaye, bwa kwosha anu cyanaana myonji iwva mibaswike ku byanza ne ku makàsà ayi. Nenku mmwenze anu udyata makàsà panshi paa cikutu cya kapyà nunku ewu anyi, ke Yèyè ewu. Nwamonu anyi? Bavwa ne lutuulu.

²⁸⁸ Danyeleye bya mwomumwe. Danyeleye uvwa ne lutuulu. Cya bushuwa. Kavwa mwa kulekelaku to. To, mukalenge. Wàkenza cinyi? Wakunzulula madidiishi awu ne wakasambila, nansha muvwabi amu. Civa wa mushingà wa Nzambi. Yèyè uvwa ne lutuulu. Wakindila Nzambi, mumanye ne Nzambi uvwa ne bukole bwa kushaala mulamate ku Dîyì Dyende. Kumwelabo mu bwina bwa ntambwe, ne: “Netulekele ntambwe ikudye.”

²⁸⁹ Yèyè ne: “Bidi anu bîmpè.” Uvwa ne lutuulu. Bwa cinyi? “Ee, ngîndidì kwine kwônso aku, mwindile Nzambi. Byôbì bikengela kwindila kabidi binunu bya bidimu, nêmbiikè ku lufu mu dituku dya ndekeelu. Pa nanku, ngangate lutuulu, ngindile.”

²⁹⁰ Pòlò uvwa ne lutuulu. Uvwa naalu cya bushuwa. Tangilaayi civa cikengela Pòlò kwenzaye. Nwênù badi bamba bwa lutuulu’s!

²⁹¹ Netwámbe cinyi bwa baakapeta mpenta abu? Bu muvwabo anu bapete mudimu mubatuma naawu ne: “Nwindile too ne,” nwamonu’s, “nwindile too ne panwavwadikiibwa ne Bukole.” Too ne dîbà kaayi? Bôbò kabaakeela alu lukonko lwa ne: “Nebiikale too ne dîbà kaayi? to.” Baakapeta bôbò anu dyandamuna ne: “Nwindile too ne.”

²⁹² Bôbò kubanda kuulu aku bamba ne: “Mbîmpè, balumyana, pàmwâpa mu tusunsa dikumi ne tutaanu kubangila ku

mpindyewu Nyuma Mwîmpè neatupwekele ne netupete mudimu wetu wa bwambi.” Tusunsa dikumi ne tutaanu kupita, udi aku anyi udi kunu. Dituku dimwe kupita, nyaanyaanya; abidi, asatu, anaayi, ataanu, asambombo, mwandamutekete.

²⁹³ Bamwe baabo bavwa mwa kwikala bambe ne: “Hee, nwênu kanwenaku nwela meeji ne tukaadi baMupete anyi?”

“To, to, to, to.” Ke mudibi. To. Ncya bushuwa.

²⁹⁴ “Ebi’s mbipiciibwe ne twêtù bapatuke’s, balumyana.” Dyabulu ne: “Nu—nu—nudi bamanye ne nukaadi bapete cinudi nukeba aci. Ndaayaaku, nubange mudimu wenu wa bwambi.”

²⁹⁵ “To, to, to. Katwena banji kuMupeta to, nansha. Bwalu, Yèyè mmwambe ne: ‘Nekulwe, ciikala mwa kwenzeka mu matuku a ndekeelu: Ne mishiku idi ikukumina ne mu myakulu mikwabo ke mushindu ûngakulà ne bantu aba, ne Ditalala dîmvwà mwambe adi ndyôdi edi,’ nwamonu’s, Yeshaayi 28.19.” Yèyè ne: “Ke—ke Yèyè ewu, ne—nenuMupete panwikala... Mona’s, twêtù’s netumanye paalwaYe. Netumanye paalwaYe. Netucimanye ne: ‘Mulayi wa Taatu.’” Ke kwindilaye matuku citeema. Ke pashiishe mu dituku dya dikumi: “Tuvwamu.” Bavwa ne lutuulu, bwa kwindila.

²⁹⁶ Mpindyewu, wêwè ne lutuulu lwa mushindu awu, paanyima paa Nzambi mumane kukupa mulayi ne wêwè muwumone mu Bible ne: “Ngwanyi mêmè,” nanku windile. Pashiishe, wêwè ne lutuulu lwa mushindu awu, ulusakidile ku diitabuuja dyebe. Nenku udi umona mûdî wenda ubanda mpindyewu anyi? Udi wenda ubanda *apa* mpindyewu. Eyo. Kalonda kaa dîbà kadi anu kanyunguluka, ne kôkô paaku, kî mmwômô anyi? Eyo. Eyo. Sakidilaaku aci ku diitabuuja dyebe.

²⁹⁷ Mwikale anu uMuteeka Yèyè kumpala kwebe, mwikale uvuluka ne, Yèyè ngwâkalaya. Wâkalaya awu, kî mmêmè to. Wâkalaya awu, kî mpaasata to, anyi Mwaneetu Neville. Kî mmwambi kampanda mukwabo, wâkalaya to. Kavwa nsaserdose kampanda anyi paapà to. Kavwa mmuntu kampanda wa pa buloba to. Nzambi ngwâkenza mulayi, ne Nzambi udi ne bukole bwa kushaala mulamate ku cyônsò cyakalayaYe. Eyo. Wêwè ne diitabuuja dya mushindu awu, dya kumanya ne Nzambi ngwâkacilaya! Udi wamba ne: “Mwaneetu Branham, ndi nsama. Ndi njinga dyondopa bibi be.” Udîtabè’s. Ndipà dikupa, eyowa’s, mukalenge, bu wêwè anu mwa kwitabuuja. “Ee,” mûdî wamba, “s’ndi mwitabuuje mwitabuujiilemu.” Nanku pwaku bwalu abu mwoyi. Kwajiki. Byônsò abi byamanyi kujika. Nwamonu anyi?

²⁹⁸ Ikalà ne lutuulu, pawikala ne lutuulu. Wêwè kuyi naalu to, neubumbuke ku Nzubu ewu, wamonu’s. Necibyankule bikwabo byônsò bya kwôkô abi panshi, cintu cimwepele aci. Bikengela wikale ne cyôci aci. Kucisakididi to, bwalu, necishimbule nzubu webe pawikala kuyi ne lutuulu to, pawikale kuyi ne bukole

bwa kusakidila ku diitabuuja dyebe dyûdi wamba ne udi naadi adi. Nenku wêwè kuyi ne diitabuuja to, kadi uteeta bwa kuteekapu bukole, necyupule diitabuuja dyebe. Wamonu anyi? Udi wamba ne: “Ee, mpindyewu, indila kakese. Pàmwăpa byônsò ebi nntupakanyi, nansha bishi. Pàmwăpa Nzambi kēna Nzambi to. Pàmwăpa Nzambi katuku mene to.” Wamonu’s, necicibule cintu aci bitupa bibidi. Wamonu anyi?

²⁹⁹ Kadi wêwè ne diitabuuja dishuwashuwale, nenku uteekepu bukole bushuwashuwale, pashiishe dimanya dishuwashuwale, pashiishe didikanda dishuwashuwale, pashiishe lutuulu lushuwashuwale. Wamonu anyi? Udi munkaci mwa kubanda wenda ulonda mushoonyi. Mbimpè.

³⁰⁰ Citânù, sakidila difwana dya Nzambi. Kaa, ekelekele! Difwana dya Nzambi dya kusakidila. Difwana dya Nzambi didi dyumvwija cinyi? Ndi mukebe mu mikanda inaayi anyi itaanu ya mbumbilu wa myaku nciyiku nansha mwa kupeta civwadi cyumvwija to. Ndekeelu wa byônsò, mêmè kupweka mwa Mwaneetu Jeffries mwamwa, twètù kucipeta mu—mu mukanda kampanda wa mbumbilu wa myaku. *Difwana dya Nzambi* mbwena kwamba ne “kwikala bu Nzambi.” Kaa ekelekele! Paanyima paa wêwè mupete diitabuuja, bukole, dimanya, didikanda, lutuulu, pashiishe kwikala bu Nzambi. Yoyöyò!

³⁰¹ Udi wamba ne: “Mêmè ncyêna ne mushindu wa kwenza nanku to, Mwaneetu Branham.” Kaa, eyowa’s, wêwè’s udi ne mushindu wa kwenza nanku.

³⁰² Anyishaayi nnuvadile anu ndambu wa Mifundu mwaba ewu, kasunsa kamwe cyanaana. Maataayi 5.48. Netwangate ewu nunku bwa tumone mudiwu wumvwika, Maataayi 5.48, ne kumona ne udi ne cya kwikala bu Nzambi. Nudi bamanye ne Bible udi wamba ne: “Nudi banzambi.” Yesu ngwâkamba nanku. Bwa cinyi? Bukole bwônsò, bintu byônsò bidi munda mwa Nzambi abi, bidi munda mwenu. Maataayi 5.48: “Ikalaayi. . .” Yesu ngudi wakula ewu, mu disanka.

*Nanku ikalaayi b-a-p-w-a-n-g-a-n-e, (Ncinyi aci?)
bapwangane, anu mudi Taatu wenu. . .mu dyulu
mwikale mupwangane.*

³⁰³ Ukaadi mubande *apa* mpindyewu, kumpala kwa wêwè kulombiibwa bwa kucyenza. Bikengela bwa bintu byônsò ebi bisakidiibwe dyambedi. Pashiishe paudi ubanda mwaba ewu, Yèyè mmukulombe mpindyewu bwa wikale mupwangane, difwana dya Nzambi, bânà baa balume ne baa bakaji baa Nzambi. Neya bushuwa. Bintu biine bûngì bîndi mufwanyine kwamba mu mulongo awu’s we!

³⁰⁴ Tubuululaayi mu Efeso 4, bwa tujandule mwab’ewu, mu Mukanda wa Efeso ne, ncinyi cidiwu wamba bwa cintu eci, wôwò paawu, pa mushindu utudi ne cya—mushindu utudi ne cya kwenza. Efeso, nshapita 4, kubangila ku mvensa wa 12. Efeso 4,

kubangila ku mvensa wa 12. Eyo. Tubangilaayi mwab'ewu ku mvensa wa 11.

Nenku yèyè wakapa bakwabo, bapostolo; ne bakwabo, bapofeta; . . .

305 Nudi bavuluke diloolo dya makeelela anyi? Kwidikiji bwa kwangata mudimu wa muntu mukwabo to. Nwamonu anyi?

. . .ne bakwabo, batangadiki; ne bakwabo, bampaasata . . .ne bakwabo, balongeshi;

306 “Bwa difikisha dya Nzambi ku bupwangane”? Ke mudiwu wamba anyi? [Disangisha didi dyamba ne: “To.”—Muf.] Bupwangane bwa cinyi? [“Bansantu.”] Bansantu mbanganyi? Bajidiibwe. Amen. Badi babangile lwa kwinshi *eku*.

. . .difikisha dya bansantu ku bupwangane, bwa dyenza dya mudimu wa bwambi (mudimu wa bwambi wa Yesu Kilisto), bwa diibaka dya mubidi wa Kilisto (bwa diibaka, diWasa too ne kuulu, diibaka), too ne . . .

Too ne patwafika bônso ku bwobumwe bwa diitabuuja, ne . . .dimanya dya Mwânà wa Nzambi, ne ku muntu mupwangane, ku ditwishiiwa, (kaa, ekelekele), ku cipimu cya cipidi cya kaabujima kaa Kilisto;

307 “Bapwangane,” bikengela difwana dya Nzambi. Bikengela wêwè kusakidila ku diitabuuja dyebe, difwana dya Nzambi. Udi umona's, udi ubangila kwinshi *eku*, ne bukole. Pashiishe uya ku dimanya. Pashiishe uya ku didikanda. Pashiishe uya ku lutuulu. Mpindyewu udi pa difwana dya Nzambi. Difwana dya Nzambi! Kaa, ekelekele! Dîbà dyetu didi anu dyenda diya's. Twânjî tumonebi. Kadi's nutu bamanye civwa difwana dya Nzambi dyumvwija. Nwimbi musambu ewu ne:

Kwikala bu Yesu, kwikala bu Yesu,
Pa buloba ndi njinga kwikala bu Yèyè;
Mu lwendu lwanyi lwônso lwa mwoyi
kuumukila pa buloba too ne ku Butumbi
Ndi anu ndomba bwa kwikala bu Yèyè.

308 Ke difwana dya Nzambi ndyadi. PaakaMutapabo dipi luseke lumwe lwa kwîsù, Yèyè wakafila lukwabo. PaakaMwambabo mêyî a nkabukabu, Yèyè kaakaakulaku to. Kaakapingajaku cipendu ku cipendu to. Nwamonu anyi? Ne difwana dya Nzambi, mwikale ukeba cintu anu cimwepele: “Mêmè ndi ngenza misangu yônso anu cidi cisankisha Taatu.” Nwamonu anyi? Eyowa's, mukalenge. Misangu yônso. Ke difwana dya Nzambi ndyadi. Nwamonu anyi?

309 Paanyima paa wêwè mumane kuumuka *apa*, mufike *apa*, mufike *apa*, mufike *apa*, mufike *apa*, mpindyewu udi ubwela mu cipidi mu kaabujima mpindyewu cya mwânà wa Nzambi. Kadi bikengela wikale ne *eci*, kusangisha ne cyônso *eci*,

ne wêwè mwine kwêna nansha mwa kubanga to pawikala kuyi mupete *eci*.

³¹⁰ Mpindyewu nwavulukaayi nyuunyi mufiike mwikale ne masala a nyuunyi wa kayiba. Kanumupu mwoyi to. Nwamonu anyi? Kudidingi wasakidila cyôci aci pawikala kuyi mulediibwe menemene cyakabidi to. Bwalu, wêwè, kabyakukumbana to, ne kwêna—kwêna mwa kwenzaku bwa kukumbanabi to. Nebifike ku *eci*, anyi *eci* apa nunku, necyupuke mwaba kampanda.

³¹¹ Kadi paudi upweka kwinsi *eku*, nkuci mushuwashuwale mulediibwe cyakabidi, dibà adi kwêna usakidila cintu nansha cimwe to. Cyôci ncidi cidisakidila kúdi wêwè, wamonu's, cyenda cibànda, eyo, cyenda ciya bwa kafika too ne mu bupwangane mpindyewu. Eyo.

³¹² Pashiishe, ciisambombo, tusakidilaayi, Bible mmwambe kaaba aka ne, kusakidila dinanga dya bwânà bwetu... dinangangana dya bwânà bwetu. Mpindyewu, aci ncintu cîmpè, anu kaaba aka, ciisambombo, mwandamutekete. Eyo. Kusakidila dinangangana dya bwânà bwetu. Eyo. Patudi tufika ku aci, dinangangana dya bwânà bwetu, wêwè udi uditeeka pa kaaba kende, mu bwalu abu. Mpindyewu udi wamba ne... .

³¹³ “Mwaneetu mmungenzele mpekaatu,” mwakamba Peetelo. “Nèmmufwile luse,” yêyè ne, “misangu mwandamutekete ku dituku anyi?”

Yêyè kwamba ne: “Makumi mwandamutekete misangu mwandamutekete.” Nwamonu anyi?

³¹⁴ Dinangangana dya bwânà bwetu. Mpindyewu, nudi numona's, mwaneetu yêyè mupanganangane neebe, kwikadi wâpanga lutuulu kudiye to. Wamonu anyi? To. Wamonu anyi? Ikala ne musangeelu kudiye. Ndaaku, nansha bishi.

³¹⁵ Muntu kampanda uvwa wamba, anu abidi aa, ne: “Mmunyi mùdi mwa kwitabuuja bintu ebi mushindu ûdi ubiitabuuja ewu, kadi mucikàle anu uya kudi beena Assemblées de Dieu, ne ba-Unitaires, ne bakwabo bônso abu?” Pashiishe teekaaku, wamonu's, dinangangana dya bwânà bwetu. Wamonu anyi? Wamonu anyi? Mwikale utekema, dîngà dituku, wamonu's; mwikale nende ne lutuulu, wamonu's; mwikale ne didikanda, mwikale umutwala; dimanya, bwa kuumvwa bidiye yêyè witabuuja, uvuluka ne, ke bidi pende mu mwoyi wende, ke byôbi abi; bukole, mu wêwè mwine, bwa kubulekela bupatuka ne musangeelu, ne kalolo, kudiye; mwikale ne diitabuuja dya ne dîngà dituku Nzambi wadyakumubweja. Nwamonu anyi?

³¹⁶ Dinangangana dya bwânà bwetu, cintu cya mwandamutekete. Umwe, ibidi, isatu, inaayi, itaanu, isambombo, mwandamutekete. [Mwaneetu Branham udi utuuta bintu ku cibasa misangu mwandamutekete—Muf.] Nwamonu's, cintu cya mwandamutekete. Nunku, mpindyewu, wenda ulwa.

317 Cintu cidi cilonda, pashiishe, kusakidila luse, ke dinanga. Ke dibwe dya mùsongà. Dimwe dya ku matuku adi panshi aa, mu ekeleeziya . . .

318 Mpindyewu, bu nwênù mwa kuswa, biikale bimanya pa mukaba wa mēyì, ne myaba mikwabo yònsò ne, ncyêna ndongesha bwalu ebu bu ne ndilongesha dya nshindameenu to, cîndi njinga kwamba mpindyewu eci. Kadi ndi anu njinga kunuleeja ne, ku dikwacisha dya Nzambi, cidi bwalu ebu mu bulelela, ne, Bible wa kumpala ukaadiku Nzambi mufunde uvwa n’Cidiminanzaji mu dyulu. Udi ubanga ne virgo. Udi ujika ne Leo ntambwe. Nenku pângààbwelà mu Citampi aci Ciisambombo ne cya Mwandamutekete, nenujandule ne, paakakangudiibwa Citampi cikwabo aci, cimanyinu cyaci cya mu Cidiminanzaji cya kiine kaaba aku civwa nkansere, mishipa micyamakane. Nenku ncikondo cya kansere citudi ne mwoyi mpindyewu eci, cibiulula. Ne cintu cidi cilondele civwa Citampi aci cikutulule, Cyakabuulula Leo ntambwe, Dilwa dya Cyakabidi dya Kilisto. Wakalwa, musangu wa kumpala, kudi virgo; Udi ulwa, musangu udi ulonda, Leo ntambwe. Nēmfikishè bwalu ebu to ne ku . . .

319 Mpindyewu, ncyêna mumanye ne ngâpeta dîbà mu dinda emu. Nèngenzè ne mwanyi mwònsò, bwa kunuleeja ne bibandilu ebi bidi mu bipaapu bya musaka, anu mudibi menemene, Bible mwibîdi uvwa Nzambi mufunde. Enoke ke wâkabîfùnda, ke kubiteekaye mu cipaapu cya musaka.

320 Nenku mwisâtù, Nzambi utu misangu yònsò muvwijiibwe mupwangane anu mu mwisâtù, pashiishe Yèyè kudivwija Yèyè mwine Dìyì Dyende.

321 Mwab’ewu, mpindyewu, nwavulukaayi ne, mu cipaapu cya musaka . . . Ngela meeji ne bààbùngì beenu nwênù basalaayi nuvwa mu Ejipitu. Cipaapu cya musaka kacyyena ne mùsongà kumutu to. Kacya kacya kacitu naawu to. Di—Dibwe dya Scone, ne bikwabo byònsò bidibo naabi, kadi paabi’s . . .

322 Wèwè mwikale ne kabeji kaa ndola umwe mu mpaaya, tangila pa kabeji kaa ndola aku, neujandule ne, lwa kuulu ku dyabalume aku, kadi ne mukanku mwikale ne dibendela dya Amerike. Ne mbambepu ne, citampi “cya États-Unis.” Luseke lukwabo, kadi ne cipaapu cya musaka, ciikale ne dibwe dinene dya mùsongà ne dîsù dya muntu. Mbambe ku lwine luseke elu ne: “Citampi cinene.” Ee, piikalabi ne edi ke ditunga dinene, bwa cinyi citampi cinene eci kaciyi cifwanyine kwikala citampi cyadi dyôdi cya ditunga? Nzambi ngudi ubafikisha ku difila bujaadiki, nansha bôbò baye penyi.

323 Mvwa nyiikilangana ne ngangabuka kampsnda musangu mukwabo, yèyè uvwa anu unyoobesha be, pa bidi bitangila dyondopa dya kudi Nzambi. Tuvwa biimanyine mu mùsèèsù. Yèyè ne: “Mukalenge Branham, wèwè’s udi anu ufila cibwejakaji

mu mitu ya bantu.” Wamba ne: “Kakutu dyondopa nansha dimwe to, anu dya ku manga a baamunganga.”

³²⁴ Kungenzekelabi ne nkudimuke, ntape dîsù ku cimanyinu cyende civwa ku mashinyi, civwa ne nyoka awu mukudika ku mucu. Mémè ne: “Nanku’s mbipiciibwe ne wêwè muumushe nyoka udi mukudika ku mucu wawa, mu mashinyi ebe, bwalu cimanyinu cyebe wêwè mwine cidi cifila bujaadiki bwa ne Nzambi m’Mwondopi.”

³²⁵ Ngangabuka mulelela udi witabuuja aci. Abu mbangangabuka baa mafi. Eyowa’s, mukalenge. Nyoka awu mukudika ku mucu! Mòsà ngwâkabândisha nyoka ku mucu. Yèyè wakamba ne: “Mémè ke Mukalenge udi ukwondopa ku masaama ebe ônsò.” Nenu bavwa batapa dîsù ku nyoka awu, bwa dyondopa dya kudi Nzambi. Kadi aba bôbò badi bafila bujaadiki bubenga aci; kadi cimanyinu cyabo bôbò biine’s nciidi cifila bujaadiki bwikale bubenga cidibo bamba aci. Yoyôyò!

³²⁶ Muneemu emu, ditunga dyetu edi, bamba bintu bidibo bamba abi, biikale baseka bintu ebi, pàdì mfranga yabo bôbò biine, lupetu lwabo, biikale bifila bujaadiki bwa ne citampi cya dyulu ne buloba n’Nzambi. Nudi bamone dîsù didi diimanyine lwa kuulu kumutu kwa cyôci aci aku adi, pa kabeji kaa ndola umwe aku anyi? Ke citampi cinene aci.

³²⁷ Kabavwaku banji kuciteeka pamutu paa cipaapu cya musaka aci to. Kabavwa mwa kuumvwa ne mbwa cinyi to. Dibwe dya mùsongà baakadibenga, Mutu awu, Kilisto. Kadi neDilwe, dîngà dituku.

³²⁸ Mpindyewu, mu kwibaka, bukole...Mu kwibaka kwa monument ewu, mu kwibaka kwa cipidi eci, nwamonu’s, cidi cibanga ne dibwe dya cishimikidi; diitabuuja, bukole, dimanya, didikanda, lutuulu, difwana dya Nzambi, dinangangana dya bwânà bwetu. Mpindyewu bidi byenza cinyi? Pashiishe bidi bindila Dibwe dya mùsongà, didi diikale dinanga, bwalu Nzambi ndinanga. Nenu Yèyè ngudi ukontonona, ne Yèyè ke dikanda bwa cyônsò cya ku bintu ebi. Neya bushuwa. Eyowa’s, mukalenge.

³²⁹ Anu mwômò *emu*, anu mwômò *emu*, nudi numona ne, lwa munkacinkaci emu, ndi muteeke midimu yônsò eyi mwômò emu, ne apa tuumavwala tukese tudi tulwa etu. Ncinyi aci? Nyuma Mwîmpè mwikale upweka, upicila kudi Kilisto, nwamonu’s. Nyuma Mwîmpè! Nyuma Mwîmpè udi kumutu kwa byônsò *ebi*, ulamakaja byôbì ebi kaaba kamwe, wibaka (cinyi?) Ekeleeziya mupwangane, bwa Dibwe dya mùsongà disômbèle pa Yèyè.

³³⁰ Ncenyjibwe kabidi cinyi? Ncimweneshiibwe mu Bikondo Mwandangamutekete bya Ekeleeziya, ne baamusanjeela baa Ekeleeziya mwandangamutekete.

³³¹ Byakabangila paanyima *apa*. Ekeleeziya wakaashiibwa penyi bwa musangu wa kumpala? Ekeleeziya wa mpenta

wakaashiibwa penyi bwa musangu wa kumpala? Kudi Pòlò Munsantu, mu Efeso, mutooto wa Cikondo cya Ekeleeziya wa Efeso, Efeso.

³³² Cikondo ciibìdì cya Ekeleeziya civwa Seemuna. “Bukole.” Irénée, muntu munene wâkatwâ Evanjeeliyo wa Pòlò nyama ku mikolo.

³³³ Cikondo cya Ekeleeziya cyakalonda civwa Peegamo, uvwa Martin. Martin ke muntu munene wâkashààla. Pòlò, Irénée, Martin.

³³⁴ Pashiishe mu Twatila Colomban kulwaye. Nudi bavuluke anyi? Ncyôci eci, cizodiibwe mwaba *ewu*. Colomban. Paanyima paa Colomban . . . Bikondo bya Mîdimà kubwelabi muntwamu.

³³⁵ Pashiishe Saadi kulwaye, udi uumvwija *mufwe*. Luther. Aleluuyah! Pashiishe cinyi? Ncinyi cyakalwa paanyima paa Saadi, Luther?

³³⁶ Pashiishe Filadelefiya kulwaye. “Difwana dya Nzambi.” Wesley, cijila! “Mwakane udi ne mwoyi ku diitabuuja,” mwakamba Luther. Dijidiibwa kudi Wesley.

³³⁷ Pashiishe kulwaku dinangangana dya bwânà bwetu, kudi Laodikiya. Nenku tudi twitabuuja ne Mukenji munene wa dimweneka diibìdì dya Eliya, mu dituku dya ndekeelu, newutangalake pa buloba.

³³⁸ Ke nwênù aba, Bikondo Mwandamutekete bya Ekeleeziya, bibandilu mwandamutekete. Nzambi munkaci mwa kwibaka Ekeleeziya Wende, ncyenze bu muntu umwepele ubwela mu muntu nkaaya, mu Yèyè mwine. Butumbi, Bukole bwa Nzambi, biikale bipwekela mu *eci*, biCilamakaja pamwe. Ke bwa cinyi, beena Mpenta baakiipata ba-Luthériens, baakiipata ba-Weslèyens ne bikwabo, kî mbamanye cidibo bamba to. Nwamonu’s, bôbò bavwa basòmbèle mu *eci* citupa cya ntempelu. Ke mudi bwalu nanku, bantu bakwabo badi mwa kubanda too ne pa mwaba kampanda ewu kadi kudishinda. Kadi kudi citupa cishuwashuwale cya cyôci aci, citungunuka ne kwenda bwa nzubu awu amweke. “Nèngàlujululè,” mudi Mukalenge wamba.

³³⁹ Nudi bavuluke *Muci Mukàji Musèla* anyi? Nudi bavuluke diyiiisha pa *Muci Mukàji Musèla* anyi? BaakaWudya too ne kwinshi, kadi Yèyè wakawusonga. Kupetabo matamba a cyena mangumba; Yèyè kuàsônga. Kujululabo ekeleeziya mukwabo, matamba a cyena mangumba; Yèyè kusonga aci. Kadi mwoyi wa Muci awu wakatungunuka ne kwenda kukola. “Kadi pa dîbà dya diloolo nekwikale Bukênkè.” Nwamonu anyi? Ke pa dîbà adi paakalwa Kilisto, Nyuma Mwîmpè. Yesu udi upweka udijaalamija Yèyè mwine ku Mutu wa Ekeleeziya pa dîbà adi, ne Yèyè neabiishe Ekeleeziya ewu ku lufu, mwikale Mubidi Wende Yèyè mwine. Munda *amu* ke mudi Mubidi.

³⁴⁰ Nenku mushindu udi Nzambi muswe bwa twètù tukole, mmushindu wakafikishaye Ekeleeziya Wende ku dikola. Cikondo cyônsò cya Ekeleeziya, Udi ushaala Ekeleeziya umwepele munene. Nwamonu anyi?

³⁴¹ *Aba* bantu kabavwa babalombe civwabo balombe *aba* bantu to. *Ewu* kabaakumulomba civwabo balombe *ewu* to. Nwamonu anyi? Kadi Yèyè wakiibaka Ekeleeziya Wende too ne kuulu mushindu umweumwe awu. Wakiibaka Ekeleeziya Wende—Wende too ne kuulu mushindu umwemumwe udiYe munkaci mwa kwibaka bantu Bende. Pashiishe Peetelo mwab'ewu udi wamba, dyambedi, bintu mwandamutekete: diitabuuja, bukole, (nwamonu's, byenda bibanda), dimanya, didikanda, lutuulu, difwana dya Nzambi, dinanga dya bwànà bwetu, kusakidila dinangangana dya bwànà bwetu, ne pashiishe dinanga dya Nzambi. Nyuma Mwîmpè, Kilisto mu mupersona wa Nyuma Mwîmpè, ukupwekela, mu dibatiiza dilelela dya Nyuma Mwîmpè, nenku upeta makole ônsò aa matwa citampi munda mwebe. Pa dîbà adi, Nzambi mmusômbèle mu Tabernacle, udibo babiikila ne Nzubu, Tabernacle udi ne mwoyi wa cisômbedi cya Nzambi udi ne mwoyi.

³⁴² Padi muntu mwikale ne bintu bya mushindu ewu, pa dîbà adi Nyuma Mwîmpè udi umupwekela. Nansha byôbi ne, udi mufwanyine kwakula mu myakulu, udi mufwanyine kutentula cipeedi cyônsò naka cidi Nzambi naaci. Udi mufwanyine kwenza aci. Kadi padi anu makole aa kâyi mabwele munda mwebe to, wêwè uci di anu kule ne cishimikidi cilelela, cishuwashuwale cya diitabuuja. Kadi padi makole aa akolamu, ne wêwè musakidile eci ku cyacya, dîbà adi udi monument udi ne mwoyi. Udi lupingu ludi ne mwoyi, lwikale lunyungakana.

³⁴³ Kadi, nudi bamanye, ba—bampangaanu, batu bapona mikookwela kumpala kwa lupingu, nzambi mudifwanyikijila. Nenku mu mushindu wa didifwanyikijila awu batu biitabuuja ne nzambi mudifwanyikijila awu udi ubandamuna. Abu's mbumpangaanu. Abu's mbwena Loomo. Batu biinamina bansantu baa mishindu yônsò ne bintu bikwabo byônsò. Nenku batu ne Munsantu Cecilia, nzambi wa lubanza, ne bintu byâbûngî bishiileshiilangana bya mushindu awu. Batu babinamina, ne mu bushuwa bwa bwalu batu babinabuuja mu mushindu wa didifwanyikijila. Nci—ncimfwanyi kaayipu's we, cya Nzambi mulelela udi ne mwoyi.

³⁴⁴ Kadi twètù, kabiya bya didifwanyikijila to, kadi tupona mikookwela kumpala kwa Nzambi udi ne mwoyi, bukole budi ne mwoyi, dimanya didi ne mwoyi, lutuulu ludi ne mwoyi, difwana dya Nzambi didi ne mwoyi, Bukole budi ne mwoyi bwikale bufumina kudi Nzambi udi ne mwoyi, bwikale buvwija muntu udi ne mwoyi ushaala cimfwanyi cidi ne mwoyi mu cipidi cya Nzambi. Yèyè ewu udi wenza cinyi? Bintu bimwebimwe byakenza Yesu abi; wenda mushindu umweumwe wakendaye

Yèyè, wenza bintu bimwebimwe byakenzaye Yèyè. Bwalu, kî ncintu cya didifwanyikijila nansha. Kudi bulelela kampanda budi bujaadika.

³⁴⁵ Nudi nuumvwa cîndi njinga kwamba anyi? Nudi numona mudi makole aa, bintu bya diibaka naabi ebi, biikale byenza cimfwanyi pamwe ne baamusanjeela baa Ekeleeziya, ne bikondo bya Ekeleeziya anyi? Mpindyewu, dimwe dya ku matuku aa, netwangate umwe ne umwe wa ku myaku eyi, kuyilonga mu ndondo, nenku tuleeje ne bidi bijaadika bwalu ebu. Bidi byenda byônsò cyapamwe. Cya bushuwa. Nwamonu anyi? Kaa, ekelekele! Mushindu mwine udibi bya dikema's we, nwamonu's, pa kumona cidibi—cidibi byenza.

³⁴⁶ Mpindyewu, awu ke Nzubu udi Nzambi ùsòmbelamù; kî nnzubu mwikale ne ngonga munene kuulu kwende, ne kaleyi kaasa kuulu to. Nwamonu anyi? “Kadi Wèwè wâkandongolola Mémè Mubidi,” Mubidi udi Nzambi mwa kusòmbelamù, mudi Nzambi mwa kwendela, mudi Nzambi mwa kumwena, mudi Nzambi mwa kwakwila, mudi Nzambi mwa kukwacila mudimu. Amen! Cyamu cya mudimu cidi ne mwoyi cya Nzambi, Nzambi mwikale wendela ku makàsà abidi, mu wèwè. Butumbi's we! “Makàsà a muntu mwakane mmalombola kudi Nzambi,” Nzambi wendela mu wèwè. “Bwalu nudi mikanda mifundilangana, idi bantu bônsò biikale babala.” Nenku piikala Mwoyi udi mu Kilisto mwikale munda mwenu, nenukwame Mwoyi wakakwama Kilisto.

³⁴⁷ Anu bu mûnkaadì mwambambe. Patula mâyi adi mu mucu wa pêches, nenku bu wèwè mwa kuàsambulujà, ku dyela dya mashi ku cipompa ne lushingi, mu mucu wa pommes, mucu wa pommes awu mmufwanyine kukwama ma-pêches. Bushuwa. Ncya bushuwa. Nansha matamba miikale ne mmwenekelu kaayi, udi ne mâyi a mucu wa pommes munda mwawu, nudi numona's, anyi a mucu kaayi wônsò. Nwamonu anyi? Wèwè mupatule mwoyi wawu awu ku mucu wa pommes awu, upatula wônsò awu, ne uwela ne—ne cipompa cya mashi, uzololoja mâyi a mucu wa pêches uèla mu mucu wa pommes. Cidi cyenzeka ncinyi? Kawakukwama kabidi ma-pêches to. Nwamonu anyi? To, mukalenge. Kawakukwama to. Mwoyi wa mucu wa pêches wôwò mubwele mu mucu wa pommes, nanku's we, kawakukwama kabidi ma-pommes to. Newukwame ma-pêches, nwamonu's, nwamonu's, bwalu udi ne mwoyi awu munda mwawu.

³⁴⁸ Ee, utwängàtè twètù aba, badi biikale katuyi cîngà cintu to anu cilowolowo cya cisuku eci, muntu cyanaana, nwamonu's, nenku kakuyi cintu cya nsongo mu twètù, bwalu tudi bônsò bafwe mu mpekaatu ne mu matomboka. Tudi bônsò mu ngiikadilu wa mushindu awu. Pashiishe twètù, twètù biine, tudi mwa kupona mikookwela, kudilekelela, too ne padi Nzambi wangata kandundu Kende kaa dyelangana naaku mashi, Dîna dya Yesu Kilisto, bwalu: “Kakwena dîngà Dîna mwinshi mwa

Dyulu didi muntu mwa kusungidiibwaye ku dyôdi,” nenku usambuluja Mwoyi wa Kilisto uwela munda mwetu. Pa dîbà adi tudi ne diitabuuja dya mushindu *ewu*, diitabuuja divwa naadi Kilisto. Ne diitabuuja dya Kilisto kadivwa dyashila pa Bafaalesa abu, anyi Basadoka, anyi mu tunyingu twabo, mbidika yabo, ne ngesu yabo, ne dibisukula dyabo to. Divwa dyashila pa Dîyi dya Nzambi, amen, mu mushindu wa ne, Kilisto uvwa Dîyi, Dîyi dyakandamuka mubidi. Nenku bu twêtù mwa kufika ku dyediibwa mashi a cipoma ku Bukole Bwende, mu mushindu wa tufwa ku ngeelelu wa meeji wetu twêtù biine, ne diitabuuja dyetu dilwa diitabuuja dishuwashuwale, aleluuyah, pa dîbà adi Mwoyi wa Kilisto udi wediibwa munda mwetu ku dyela dya mashi mu mijilu. Tudi tulwa bifùkiibwà bidi ne mwoyi bya Nzambi, cisòmbedi cidi Nyuma Mwîmpè mwa kutuminamu mabenesha Ende adi ela nsèsà, ne tudi biikale mu cipidi cya Kilisto.

³⁴⁹ Yesu wakamba ne: “Kî mbifundiibwe anyi? Nwênù nudi nuMpiisha, pândi ngamba ne: ‘Ndi Mwânà wa Nzambi.’ Kî mbifundiibweku, ne: ‘Nudi banzambi.’ Mikenji yenu nwênù biine kayena yamba nanku anyi?” Bu Mòsà, bu Eliya, bu baprofeta baakadi ne nsòmbelu wa mutambe kuseemena pabwîpì ne Nzambi abu, mu mushindu wa ne Nzambi uvwa udisambuluja anu Yèyè mwine munda mwabo. Nenku bavwa baakula, kabayi bôbò biine to, kadi Nzambi. “Kanùdyèlèdi meeji bwa binudi ne cya kwamba nansha, bwalu kî nwnênù badi baakula to. N’Taatu udi musòmbèle munda mwenu; Yèyè ngudi wakula.” Mèyi Ende kî ngende yèyè mwine to, bwalu, mwoyi wende, yèyè mmufwe.

³⁵⁰ Wèwè mufwe, udi upatula mashi mu muntu, umwela bwanga bwa kayi ubola to. Lutatu ludi ne, bààbùngì baabo kabatuku babèlè bwanga bwa kabayi babola to. Wèwè mupatule mashi mu muntu awu, kwende’s kwajiki. Nenku cintu cimwepele cyùdi ne cya kwenza cidi anu kwaluja mashi makwabo munda mwende; yèyè neikale cyakabidi ne mwoyi. Bu mùdi mupatule mashi ende.

³⁵¹ Nenku mpindyewu tudi beele Mashi a Yesu Kilisto munda, nwamonu’s, nenku aci cidi citwala diitabuuja dya Yesu Kilisto, bukole bwa Yesu Kilisto, dimanya dya Yesu Kilisto, didikanda dya Yesu Kilisto, lutuulu lwa Yesu Kilisto, difwana dya Nzambi dya Yesu Kilisto, dinangana dya bwânà bwetu dya Yesu Kilisto, ne dinanga dya Nzambi, didi Yesu Kilisto. Yèyè udi Mutu ne udi ukukontonona wèwè. Ne makàsà ebe ke cishimikidi, diitabuuja. Amen! Mwikale mukontonona kudi Mutu, wangata . . . ? . . . Ke bwalu abu’s. Ke muntu mupwanganane wa Nzambi nyawu, padiye ne makole aa.

³⁵² Pashiishe, Nzambi, mwikale uleeja Ekeleeziya Wende bu Mukaji Musela, muntu mukaji. Nzambi udi uleeja Ekeleeziya Wende bu Mukaji Musela. Nenku mushindu udiYe ufikisha muntu ne muntu nkaaya ku diikala mwânà Wende mulume, bwa

kubwelaye mu Mukaji Musela awu, Yèyè mmupicishile kabidi Mukaji Musela mu bikondo ebi, [Mwaneetu Branham udi utapa mapi pa cibasa cyende aci misangu mwandamutekete—Muf.] too ne paabwejaYe Ekeleeziya ewu mujima mu *eci*.

³⁵³ Makàsà aanyi atu anyunga. Bwa cinyi? Bwalu mutu wanyi ngutu wamba nanku. Mpindyewu, kaena mwa kunyunga bu cyanza cyanyi to, bwalu ôwò mmakàsà aanyi. Luther kèna mwa kwenza bintu bitudi twètù benze to, anyi ba-Méthodistes kabeena mwa kwenza to, bwalu bôbò bavwa cintu cikwabo. Nwamonu anyi? Makàsà atu anyunga bwalu mutu ngutu wamba nanku. Ne mutu kawena wambaku ne: “Mpindyewu, nwènù makàsà, shaalaayi cyanza. Wèwè dici, shaala mèsù” to. Nudi numona anyi?

³⁵⁴ Kadi, mu cikondo cyônsò, Nzambi utu muteeke bintu ebi mu Ekeleeziya Wende, ne mmuteeke citembelu pa kuleeja ne muntu ne muntu nkaaya udi ne bintu ebi, udi ne ngiikadilu eyi bu yende yèyè. Nenku *ewu* Muntu, paakumbananganabi, ng'Ekeleeziya wa Nzambi uyaaya mu Dyambwibwa. Kadi *ewu* muntu, paakumbananganaye, mmusadidi wa Nzambi, mu Ekeleeziya wa Nzambi, wíkala mwa kuya mu Dyambwibwa. Butumbi's we! Nwamonu cîndi njinga kwamba anyi? Ke bwalu mbwabu. Ke cintu cyônsò mu kaabujima ncyaci.

³⁵⁵ Muntu nyêyè *ewu* ulwa, Pôlò, uteeka cishimikidi. Irénée kubangaye kupongolwelapu *eci*. Wâlondù pende kulwa kupongolwelapu *eci*. Wâlondù pende kupongolwelapu *eci*. Wâlondù pende *cyacya*, ne *cyacya*, ne *cyacya*, anu nanku too ne padibi bifika ku cikondo cya ndekeelu. Kadi ncinyi aci? N'Nyuma umweumwe awu.

³⁵⁶ Nyuma umweumwe udi musòmbèle munda mwanyi awu, udi wamba ne: “Nwènù byanza, ololokaayi nukwate kasheete kaka.” Nyuma umweumwe awu wamba ne: “Nwènù makàsà, elaayi cidya.” Nudi numona cîndi njinga kwamba anyi?

³⁵⁷ Pa dîbà adi, cipidi cijima cya buumuntu bwebe ncilombola ne cikontonona kudi bintu biine ebi, kadi kacyna mwa kukontononyiibwa mu kaabujima to padici kaciyi ne ngiikadilu eyi yônsò nkòòng.

³⁵⁸ Nukaadiku buumvwe bwalu ebu anyi? Mpindyewu anyishaayi nnwămbilè *eci*. Nenku shaalaayi menemene... Teekaayi bwalu ebu mu dici dyenu didi diteeleja adi. Nwamonu anyi? Ditamba kukola dya munyoololo mpa dinungu dyawu didi ditambe kuteketa. Nya bushuwa. Kawena ne bukole butambe dinungu dyawu didi ditambe kuteketa to.

³⁵⁹ Bintu *ebi* nansha byôbi biibaka bikole munyi, *eci* nansha ciibaka munyi; piikalaci ne dinungu ditekete, ke padici cikosekela apu. Ne kacyna ne bukole butambe dinungu didi ditambe kuteketa adi to. [Mwaneetu Branham udi wenza kutangija bantu ku dizola dyende didi ku cibasa adi—Muf.]

Mpindyewu pawikala naabi, wamba ne udi ne *eci, eci, eci*, kuyi ne *eci* to, mwaba awu ke udici cikosekela awu. Wêwè ne *eci*, kadi kuyi ne *cyacya* to, mwaba awu ke wakosekelaci. Wêwè ne *eci*, kadi kuyi ne *cyacya* to, necikoseke. *Eci*, kadi kuyi ne *eci* to, necikoseke. *Eci*, kadi kuyi ne *eci* to, necikoseke. Nwamonu anyi? Nenku wêwè kuyi. . . Kwèna mwa kwikala ne *eci* kuyi ne *eci* to.

³⁶⁰ Nenku paudi ulambula buumuntu bwebe bwônsò nkòòng, pa dîbà adi kaayi Nyuma Mwîmpè udi upongoloka munda mwebe, mu makole aa, ke paudi ushaala tabernacle udi ne mwoyi. Pa dîbà adi bantu badi batangila bamba ne: “Wawa mmuntu mùle tente ne bukole, dimanya (mwitabuuje Dîyì), didikanda, lutuulu, difwana dya Nzambi, dinangangana dya bwânà bwetu, mùle tente ne dinanga dya Nyuma Mwîmpè. Monaayi, nyèyè wawa, wenda wendakana.” Ncinyi aci? Cipidi cidì beena bupidya mwa kutangila kwamba ne: “Ke mwena Kilisto wawa. Ke mulume wawa, anyi mukaji, udi mumanye bidiye wamba. Kacya kanwenaku banji kumona muntu mutambe kwikala ne musangeelu, ne bupole, ne difwana dya Nzambi to.” Udi mutwibwe cintampi. Citampi cidì cidileeja nseke yônsò ibidi. Nansha uya nansha ulwa, udi umona citampi mushindu anu umweumwe awu. Ke bwalu abu’s. Nwamonu anyi? Padi mulume anyi mukaji mwikale ne *eci*, ke padi Dibwe dya muòsongà dipweka dimutwa citampi dimubweja mu Bukalenge bwa Nzambi, budi bwikale Nyuma Mwîmpè.

³⁶¹ Pashiishe Dîyì, dyumukila *Apa*, didi diDimweneshila mu umwe ne umwe wa kudi bantu aba, nwamonu’s, nenku diikale dyenza Muntu mukumbanangane ewu Tabernacle wa Nzambi udi ne mwoyi, cileejiyu cya bwena Kilisto, cyenda ne ciikale ne mwoyi. Cìvwà Kilisto aci, ke cidì bantu aba, bwalu Mwoyi Wende udi munda emu. Badi munda mwa Kilisto. Ne mwoyi wabo mmufwe ne musokoka mu Kilisto, kupicila kudi Nzambi, ne mutwa citampi mwômò amu kudi Nyuma Mwîmpè. Kolinto wa Kumpala 12. Ncya bushuwa. Nwamonu anyi? Udi udibala bu mufwe, pa dîbà adi mulediibwe ku diitabuuja. Pashiishe bukole ne bikwabo bintu ebi bidi bisakidiibwa kùdi too ne paudi ulwa cimfwanyi cipwangane, cidì ne mwoyi cya Nzambi. Mbilenga anyi? [Disangisha didi dyamba ne: “Amen.”—Muf.]

³⁶² Nenku pashiishe Nzambi, ku cyôci aci, mmutwale kabidi Bikondo Mwandamutekete bya Ekeleeziya, bwa kuleeja bibandilu mwandamutekete bidiYe mutwale, mwikale wibaka muntu nkaaya Wende umuvwija mu cimfwanyi Cyende, Yèyè wibàkì Ekeleeziya mukumbanangane mu cimfwanyi Cyende. Nenku ku dibiika dya ku lufu, Mubidi ewu mukumbanangane neujuudiibwe bwa kwikalawu ne mwoyi Nende kashidi, bwalu m’Mukaji Musela. Nwamonu anyi? Nanku aci cidì cibwelakanangana mu cikondo ne cikondo cyônsò, cikondo ne cikondo cyônsò cidì cilwa.

363 Nenku kudi byàbùngì bidi bilombiibwe, nwavulukaayi. Nudi bavuluke cyakamba Pòlò mwaba ewu mu Ebelu 11 emu anyi? Anyishaayi nnubadileku cintu kampanda kumpala kwa twètù kwoya mwab'ewu, kasunsa kamwe cyanaana. Nenku pashiishe nwènù . . . Cidi cyenza ne nùdyùmvwè mu mushindu wa dikema pândi . . . misangu yònsò, pândi mbala cyôci eci. Nèngàngatè Ebelu 11, ne nêmbangilè ku mvensa wa 32.

Ncinyi cikwabo, *ncinyi cikwabo cingàmà?* *Bwalu dîbà ndifwanyine kunkeepa bwa kunulondela nwènù bwa Gideona, . . . bwa Baalaka, ne . . . Shimishoona, ne . . . Yefete; . . . Davidi . . . ne Samwele, . . . bwa baprofeta,*

Bawa ku diitabuujà bacimune makalenge, benze bwakane, bapete mulayi, bakange mukana mwa nyama ya ntambwe,

Bajime lwonji lwa kapyà, bapanduke ku mwele wa nkànzà, ne bumushiibwe ku butekete e kuvwijiibwa baa bukole, balwe ne bukutu bubàndile mu dinyeema, banyeeshe . . . bilwilu bya bantu baa bende.

Bakaji baakapeta bafwe baabo babiishiibwe ku lufu: . . . bakwabo baakapicila mu dikengeshiibwa, bôbò kukengeshiibwa, kabayi biitaba disungidiibwa; bwa baamona mwa kupeta dibiishiibwa dya ku lufu ditambe bwîmpè.

364 Lwa kwinshi eku emu. Nwamonu anyi? [Mwaneetu Branham udi ubatangija ku dizola dyende dya ku cibasa adi—Muf.] Eyo.

Ne bakwabo baakapeta mateeta . . . baakasekiibwa ne lwonji lwònsò . . . batuuciibwe ne mfimbu, eyo, kabidi . . . nkanu . . . buloko.

Baakatuuciibwa mabwe, baakakoshiibwa bitupa ne ma-scies, bôbò kuteeciibwa, bôbò kushipiibwa ne . . . myele ya nkànzà: baakalalakana biikale bavvale biseba bya mikooko ne biseba bya mbuji; babanyenge bintu byabo byònsò, ne bababweje mu lutatu, ne babakengeshe;

(Bôbò bàvwà panwapa kapayi pabàkànyine:) . . .

365 Wamonu's, mu tuboko amu, wamonu mu Bible webe.

. . . baakalalakana mu bipeela, ne mu mikuna, ne mu meena a nyama ne mu nyongolo ya buloba,

. . . bônso aba, bamane kupeta bujaadiki bwîmpè ku diitabuujà, . . .

366 Apa! [Mwaneetu Branham udi ubatangija ku dizola dyende didi ku cibasa adi—Muf.]

. . . bujaadiki bwîmpè ku diitabuujà, kabaakapeta mulayi to: (Nwamonu anyi?)

*Nzambi mwikale mutulongolwele cintu kampanda
citambe bwimpè, bwa bôbò kabavwijiibu bapwangane
twètù katuyiku to.*

³⁶⁷ Nuumvu bwalu abu anyi? Bantu bafwile aba, emu *emu*, bwalu bwabo mbulaale kutudi ne bôbò biine mbatwîndîle twètù. Pa nanku, bidi bikengela Ekeleeziya *ewu* afike ku bupwangane, bwa kumona mwa kuvwija dibiika dya ku lufu. Ne bôbò badi mwinshi, misuuka idi mwinshi mwa cyoshelu, mindile bwa Ekeleeziya *ewu* afike ku bupwangane Bwende, ciine aci paalwa Kilisto cya bushuwa.

³⁶⁸ Nenu Ekeleeziya *ewu*, nudi numona, udi wenda ushaala mukese, mu bukepele. [Mwaneetu Branham udi ubatangja ku dizola dyende dya ku cibasa adi—Muf.] Mmutambe kusongoloka kupita aci, kadi anu bwa kufunda lwalwa luseke mwaba wawa, nwamonu's. Mbibande bikafike too ne ku lusongo lwa kashingi. Mu mushindu wa ne, Ekeleeziya, mu bukepele amu, bikengela abwele mu kaaba kampanda too ne paashaalaye mu mushindu umweumwe wa mudimu wa bwambi uvwa *eci* cishiye, bwalu, paapingana Dibwe dya Mûsongà edi. . .

³⁶⁹ Didi ne kantu bu kampaaya kakese *apa*, mwikalaci mwa kulwa kusòmbela anu mwômò amu menemene, pa cipaapu cya musaka cya ciibidilu. Kî mmûsongà menemene udi musòmbè eku ne eku kwa lusongo to. Nkaamubangubangu kakese, nenu bikengela disòmbè mwaba awu, bwalu didi dipongolola mâyì.

Ne paalwadi, bikengela Ekeleeziya *ewu* ikale musongoloja.

³⁷⁰ Byònsò ebi, mabwe makwabo a mu cipaapu cya musaka aa, mmateekiibwe mu mushindu mupwangane wa kuyi mwa kupicisha kapaaya munkaci mwawu to, a bujitu bwa binunu bya kilô, mateekiibwemu. Mushindu mwine wàkaabàndishàbo kwine kuulu kwaka, kî mbamanye to. Kadi's byakiibakiibwa.

³⁷¹ Nenu lwa kuulu *eku*, paalwa cya bushuwa Mûsongà wa cipaapu cya musaka, cipaapu cya musaka Cyôci ciine, Mubidi wa Kilisto newikale ne cya kwikala musongoloja. Kabiya anu twitabaayi anyi dilongesha kampanda, anyi cintu kampanda cikwabo citudi bapicile to. Nebikengele kwikalaci cifwangane anu menemene ne Kilisto, mu mushindu wa ne, paalwaYe, Yèyè ne mudimu wa bwambi awu nebiikale bakumbangane anu patapata. Nwamonu anyi? Pashiishe Dyambwibwa nedilwe, lwendu lwa kuya Kwetu.

³⁷² Tangilaayi mwaba utudi twètù tusanganyiibwa ne mwoyi mpindyewu, mu Laodikiya, muvwa ekeleeziya mwikale cikondo cya ekeleeziya citambe bubi citubo kacya baapeta. Mu Bible, tudi tujandula ne, ke cikondo cimwepele cya ekeleeziya ciwwa Nzambi usanganyiibwa pambelu paa ekeleeziya, ukookola, uteeta bwa kwalukila mu nzuu Wende mwine. Twitabaayi ne mangumba bikaavwa mene biMwipate mu ekeleeziya Wende mwine. “Monaayi, Ndi mwimane ku ciibi nkookola. Muntu yèyè

ne nyoota ne muunzulule ciibi, Mêmè nêmbwelè, ndye nende didya dya diloolo.” Nwamonu anyi? Ke cyôci eci, mu *eci* cikondo cya ekeleeziya. MbaMwipate pambelu ku kakese ku kakese, ne mwalubi kwenzeka ne *apa* baaMwedi pambelu kashidi. Kabeena kabidi bwalu ne Cyôci aci to.

³⁷³ Mpindyewu nudi numona leelu ewu kutuyaaya. Nansha mukaadi ndekeelu mwine wa Cikondo cya Ekeleeziya mushaale anu wa mmwenekelu wa kwîsûkwîsû, mu mushindu wa ne cyôci ne cyena Katolike, cidi cicikosolole lwa munda *emu*, mbibange kudisanga ne kudishiya cintu cimwe bilwe bu ekeleeziya umwepele munene. Ne nsangilu wa maekleeziya, cidi anu cintu cimwecimwe cidi cyena Katolike aci.

³⁷⁴ Kudi dishiilangana anu dimwepele, bu bôbò mwa kutamba ciine aci, ndyangata dya koomunyo. Ke cintu cimwepele mu dyôsêzè cidi—cidi—cidi cipangisha cyena Katolike ne cyena Mishònyì bwa kudisanga ncyaci, ndyumvwija dya cidi koomunyo. Ekeleeziya wa Katolike udi wamba ne: “Mmubidi.” Kadi ekeleeziya wa Mishònyì pende ne: “Ncimfwanyi cya mubidi awu.” Katolike udi ufûka misà mwimanyinepu. Misà yôyi, idi ne, badi bangata koomunyo, batekemene ne mbafwidiibwe luse. Mishònyì udi yèyè umwangata ku diitabuuja, beela twasakidila kudi Nzambi ne, mu koomunyo, mbafwidiibwe luse. Mishònyì udi wamba ne: “Tudi bafwidiibwe luse.” Katolike ne: “Tudi ne ditekemena ne tudi bafwidiibwe luse.” Misà ne koomunyo. Badi bacibiikila bôbò ne mmisà; twètù tudi tucibiikila ne nkoomunyo. Misà nkutekemena kwa ne bidi nanku. Koomunyo nkumanya kwa ne bidi nanku, kadi kuMwela twasakidila bwa ciine aci. Nwamonu anyi? Nenku ke cintu cimwe aci cidibo kabayiku mwa kupetelanganapu to. Nebapetangane.

³⁷⁵ Kaa, cimweka cilenga be. Necidisange, bwa kusaka... Neci—necisake bônsò... Èe, Bible’s mmwambe ne: “Ne nyama eyi yakapa ndumba awu bukookeshi bwayi,” nwamonu’s, midisange pamwe. Nwamonu anyi? Anu menemene cyakamba Bible ne nebënzè, ke kucyenzabo mpindyewu eku. Cidi munkaci mwa dyenda dyenzeka, mu lumingu lwine elu. Kî mbyenze bu ne ndi bwalu ne beena Katolike to, anyi mene ne beena Mishònyì to.

³⁷⁶ Nwênù ba-Méthodistes ne ba-Baptistes, ne bààbûngì beenu nwênù beena Mpenta, padi ekeleeziya yenu mikabwele mu nsangilu ewu wa maekleeziya, pîbàkîshîbu nzubu awu munene wa bitalu mu New York mwamwa apu, wa nsangilu wa maekleeziya awu, bidi anu mwomumwe ne mu O.N.U. ne bikwabo. Bateeta kusanga cyena Mishònyì cyônsò pamwe.

³⁷⁷ Mpindyewu, beena Katolike badi ne lungenyi mu cintu aci, nenku nebavwije Paapà Jean wa makumi abidi ne mwisâtù awu, anyi wa makumi abidi ne mwibidi, nansha ní ngwa inga. Udi

uteeta, mu mushindu wa panshi, wa mupwekele, bwa kufikisha diitabuuja dyònsò dya Mishònyì ne diitabuuja dya Katolike ku diitabuuja dimwepele, anu menemene cidi Bible mwambe ne nebènzè. Ke bwalu abu's. Ne beena Mishònyì bakapiika ku ciine aci, kumina ndobo, nshinga, too ne cidiidi.

³⁷⁸ Bwa cinyi? Bwa cinyi? Bwalu kabeena ne bintu *ebi* to. *Dimanya*: “Dîyì ndilelela.” *Lutuulu*: “Aba bàdì bindilà Mukalenge.” Nwamonu cìndi njinga kwamba anyi?

³⁷⁹ Bu civwa mwepiskopo wa ba-Méthodistes awu mwambe dituku dikwabo, pavwabo beele cyôci aci. Ne muntu yònsò ewu mmumanye aci, mushindu kaayi, civwa cicisonsole, bateeta bwa kupeta disambila kampanda dya kwikala kusambila mekeleziya, anyi mu tulaasa. Nenku biikale bakeba... Ngela meeji civwa mmukanda wa masambila wa ba-Presbytériens, anyi cintu cikwabo kampanda, nenku baledi kuya kafunda ci—ci—cilongelu aci ku tubadi bwalu kabavwa mwa kwitaba disambila adi bwa kudisambilabo mu tulaasa nansha. Nenku mwepiskopo wa ba-Méthodistes ewu uvwa mukulumpe wa lungenyi, yêyè kujuuka kwamba ne: “Mbibi.” Yêyè ne: “Aci cidi cibangana ne mukanda wa tunungu twa kulombola naatu ditunga.” Uvwa muumvwe minunganyi pa bwalu abu. Yêyè ne: “Bu mu ekeleziya wetu wa ba-Méthodistes,” yêyè ne, “mu ekeleziya wetu wa ba-Méthodistes,” yêyè ne, “bààbùngì beetu batu anu baakulaakula misangu yònsò bwa cilendwishi cya Hollywood, kadi nansha nanku bantu makumi citeema ne bataanu pa lukama batu bayamu bwa kubandila cyôci aci.”

³⁸⁰ Bwalu budi cinyi? Mbashiye *eci* ku luseke. Ncya bushuwa. Bashiye cyacya ku luseke.

³⁸¹ Mwva ngakula anu apa mu nzubu emu, dituku dikwabo, ngambila mwi—mwi—mwimikila majitu wa umwe wa ekeleziya mitambe bunene ya ba-Méthodistes idiku mu Falls City, umwe wa ku ekeleziya idi mitambe kwikala ya nyuma ya ba-Méthodistes idiku mu Falls City. Ndeja ne, cikondo cya ba-Méthodistes ncidi cilwa citwangane ne cyetu cikondo mwaba wawa, cya beena Mpenta. Ke yêyè ne: “Mu St. Louis, Missouri, mbenze ditaata, kukaadi ngondo isatu anyi inaayi, bôbò kujandula bwalu.” Muntu awu udi mwa kwikala musòmbè kaaba aka mu dinda emu. Ee, yêyè's mmwenji wa makumi a bya dyasa naabi udi wibaka nzubu ewu, utulongolwela nzubu ewu. M'Méthodiste wa mu Main Street, mutuye yêyè, muvwa Mwanetu Lum ne bakwabo mwikale mpaasata. Pa nanku tudi tujandula ne, mu cyôci aci, ngela meeji civwa mmakumi mwandamutekete ne bya mu njila pa lukama bya ba-Méthodistes mu ditaata kampanda, diikale ne, mmwenenu mucinka wa mu St. Louis, uvwa uleeja ne ba-Méthodistes makumi mwandamutekete ne bya mu njila pa lukama bavwa banwa mfwanka, ne makumi asambombo ne mwandamukulu baa kudibo bavwa banwa maala a kapyà. Méthodiste! Ne

cìvwà cikemesha cìvwa ne, paakenzabo ditaata adi, anyi dicinka pankaci paa balume ne bakaji; bakaji, bavwa makumi mwandamutekete, makumi mwandamutekete ne bya mu njila pa lukama, pavwaku makumi ataanu a balume pa lukama. Bakaji batu banwa mfwanka ne maala bavwa bapite balume ku bûngì. Makumi mwandamutekete pa lukama, makumi mwandamutekete ne bya mu njila pa lukama, bakaji bapite balume ku bûngì.

³⁸² Kadi mpindyewu bu twètù mwa kuya ku Dilongesha dya Bible dya pa divwàlà dya tuputulu, ne dibebula dya nsuki, ne bintu bya mushindu awu, nwamonu's, ku difwana dya Nzambi, bakaji balaka mukana bamba mudibo ne difwana dya Nzambi ne cijila? Manaya a twarta ne bikwabo, beena kabwabwa, beena làbàlàbà, kabayiku mwa kukumbana mwa kulama ludimi lwabo bôbô biine. Ludimi lwabo bôbô biine lulabakana lwikale ne kabwabwa, batwa eku batwa eku. Kadi citwamba ncinyi bwa balume? Manaya a twarta, manaya a golf, bapatuka kwine aku bavwale bu badi kabayi bavwale, bavwale tulàmbà twa mmwenekelu wa bukooya, ne bakaji abu kacya anu baalamakanangana naabo pambelu paapa. Kabyena bikemesha to!

³⁸³ Monaayi cilukabatà cidibo bakwatakajile muyiishi awu, muyiishi wa mu maloko, mu dinda emu? Eyowa's, mukalenge. Mémè ncyèna ngitabuuja ne muntu awu uvwa mupiile mu bwalu abu nansha. Nbyenze bishi? Mmwaneetu. . . Ncyèna mwa kuvuluka dyende. . . [Muntu mukwabo udi wamba ne: "Dan Gilbert."—Muf.] Eyo. Dan Gilbert, muyiishi wa mu maloko. Paabwedi muntu awu lubilu kushipa Dan, kwènji ndambu wa ngondo, ne mpindyewu mukajende nyawu ukaadi pa kulela. Mu bushuwa bwa bwalu, Dan mmufwe, kabeena mushindu wa kwela mpindyewu mwànà wa mu diboko awu mashi mu mijilu to. Mukaji awu udi wamba ne Dan uvwa mumukwate ku bukole mulaale nende, ne ngwende yèyè. . . "Mwànà awu ngwa Dan." Cintu cya mushindu wa. . . Mémè ncyèna nciitabuuja to anu bu mûndi nciyiku ngitabuuja ne ci—ne ci—cikololo citu ne masala a nkudimba. To, mukalenge. Ndi ngitabuuja ne mufi. Ndi ngitabuuja ne Dan Gilbert uvwa muntu wa Nzambi. Ne ndi ngitabuuja ne ncilukabatà cya dyabulu.

³⁸⁴ Bu cintu aci cìvwabo bateeta kuumvwija bantu pa bidi bitangila masambila awu. Mwepiskopo wa kale wa ba-Méthodistes—wa ba-Méthodistes awu uvwa ne lungenyi lukumbane bwa kuumvwa cyôci aci. Bu yèyè mwitabe, bu cyôci aci cididinge anu ciitabiibwe, cìvwa anu cintu cisonsola kudi cintu cikwabo. Ncyà bushuwa.

³⁸⁵ Anu bu bwalu ebu bwa disungulujangana dya mu Sud mwamwa edi, ncintu cimwecimwe aci. Mémè ndi ngitabuuja ne bivwa bikengela bantu biikale badishikamine. Ndi ngitabuuja ne ditunga edi ditu dilwangana bwa budishikaminyi. Ncyèna

ndyula Mukalenge Kennedy bwa pavwaye mutume basalaayi kwòkò aku to. Nansha nanku, mêmè ncyêna mu—mu “mwena new deal,” ne ncyêna Démocrate to. Mêmè ncyêna Républicain to. Ndi mwena Kilisto. Pa nanku ndi . . . Kadi ncyêna ngitabuuja cyôci aci to. Ncyêna ngitabuuja ne bantu bafiike bavwa ne cya kupaana bwanaabute bwabo ku cintu cya lukutukutu bu nanku to, nansha aci. Civwa—civwa nkasumbu kaa cidiidi kaa ba-Républicains. Mashi a Abraham Lincoln akapeesha bantu abu budishikaminyi bwalu yêyè uvwa muntu ne difwana dya Nzambi. Ngela meeji ne bivwa bikengela kushaalabo nansha bakwate ku kasumbu kaabo kaa cidiidi piikalabo bajinga kwenza masungula.

³⁸⁶ Kadi nyawu nzwambila cintu cimwepele, mwânà wa balume awu kavwa mwômò amu anu bwa cyôci aci to, bilongelu byabo. Mwânà wa balume awu’s mmwena mwabo. S’mmwena Amerike. Budishikaminyi ebu’s mbwa bônso. Dikoba dya muntu kadyena ne cya kushintulula dishiilangana dyende to. Twêtù bônso . . . “Nzambi,” mudibi byamba, “ku muntu umwe, wakenza mashi ônsò, matunga ônsò.” Twêtù bônso tudi umwe. Kadi, mwânà wa balume awu, s’uvwa musalaayi. Nnkolomu. Wakalwa mvita bwa cidi cijaalame. Uvwa ne bukenji bwa kuya mu kalaasa. Aci ncyà bushuwa. Kadi uvwa ne bilongelu byàbûngi bivwaye mwa kuya.

³⁸⁷ Ke cintu ncyôci aci. Wêwè muswe kulondesha bwalu abu, ncintu cya lukutukutu cya cyena mangumba cya matuku adi panshi apa aa, ke cidi cisonsola bwalu abu. Bwa cinyi? Badi bangata tukanda twa masungulangana twa bantu bafiike atu batuumusha kudi ba-Républicains batutuma kudi ba-Démocrates, biikale bapaana bwanaabute bwabo pa kwenza nanku. Mbulelela anu bwetu bwa menemene ebu. Nyuma Mwîmpè kêna mwab’ewu . . .

³⁸⁸ “Ewu udi ne lungenyi.” “Ewu udi ne dimanya.” Menemene. Anu mudi ekeleziya ewu, mu cikondo cya mpindyewu eci, mwikale udipaanyisha yêyè mwine. Kanwenaku mwa kumona ciikala mwa kwenzeka anyi?

³⁸⁹ Kî mbwalu to nansha babikwate pa mikaba ya mêyi. S’ke cyôci cilwalwa eci. Uh-huh. Eyowa. Bwalu budi cinyi? Maamu wanyi mukulakaji uvwa anu ne ciibidilu cya kwambamba ne: “Peesha dyabulu bidi bu byende.”

³⁹⁰ Kudi muntu umwepele udi mwenze cintu cimwepele cidi cya meeji, n’Castro wa kwînshi kwaka. Eyowa’s, mukalenge. Yêyè mmupweke kwînshi kwaka. Ne ba-capitalistes paabo bavwa ne myenge yônso ne byônso bivwa . . . mpa cipiminu kampanda cya ngôlò, bu mudi États-Unis. Civwaye mwa kwenza ncinyi? Yêyè kusumba mikanda ya mpetu yônso ayi. Yêyè kupeta mfranga mu mushindu wônso uvwaye mwa kupeta awu. Cyênjiye pathiishe ncinyi? Kutentulaye mfranga, kuyishintula. Kuyipingajaye mu bantu. Ke cintu cimwepele civwa ditunga edi mwa kwenza.

³⁹¹ Nuvwa bateeleje cisanji cya *Life Line* dinda dikwabo adi? Mona's, nudi bamanye, mbyenze anu bu wêwè mwikale usumbisha mikanda ya mpetu paa ngôlò. Mikanda ya mpetu mmimana kwangulula. Nenku ebu bukalenge budiku mpindyewu ebu budi butuula mfranga bwa cinyi? Bwa mfranga ya bitadi biikalabo mwa kufucisha paanyima paa bidimu makumi anaayi kubangila ku mpindyewu. Bwabo's mbutuuke. Aci ncisanji cya *Life Line* cyakwila mu Washington D.C., cyambila ditunga dijima. Mfranga ya bitadi idibo batuula, badyenzeja bwa kusumba mfranga ya matunga makwabo. Ee, s'badi anu bayaabanyinangana mushindu wônsò. Kanwenaku peenu numona anyi? Ke cye—cyenzabo menemene. Nwamonu anyi? Ncinyi ciine aci? Mpindyewu, ditunga edi dyôdi dikuluke, cintu cimwepele cîdidi mwa kwenza nkukuluka. Cintu cimwepele cîdidi mwa kwenza nkushaala dikuluke.

³⁹² Ke cintu cimwepele cya meeji cya dyenza, nkushintulula lupetu. Kadi bôbò kabaakucyenzaku to, mu bukalenge budiku mpindyewu ebu. Ekeleeziya wa Katolike wa cyena Loomo ngudi ne ngôlò yônsò wa pa buloba mu byanza. Nenku cyenzabo nkumusumbishaye yônsò: “Bantu babanji aba,” ne bakwabo, “baa pa buloba,” bu mudi Bible mwambe. Nebënzè cinyi, kumpala kwa kujimijabo? Cyapu cya Mfwanka cya Brown ne Williamson, pamwe ne bônsò mbeena Katolike, twamb'eku twamb'eku. Ne bikwabo bintu byônsò ebi, cyenzabo ncinyi? Nebiitabe cyôci aci, ne nebangate mfranga kudi Loomo, nenku dîbâ adi yêyè wamanyi kupaana bwanaabute bwende bwine. Loomo udi umutwa nyama ku mikolo. Eyowa's, mukalenge. Neacitwe nyama ku mikolo. Nenku badi munkaci mwa kupeta ndambu mukumbane wa mayele mpindyewu, biikale bapeta ndambu mukumbane mu nyungulukilu wabo, bamubweja mu nzubu wende wa mudimu. Tangilaayi cidi Mukalenge Kennedy ulomba.

³⁹³ Nenku panwâmònu cyôci eci, dituku adi, kabicyena bikengela kabidi kwela tukanda twa masungula to. Dyela dya tukanda twa masungula didi ne mushinga ku cinyi? Nyawu ne, baamanyi kucifunda mu cibejibeji, kucijaadika kumpala kwa bônsò, kadi kubenga bwa kwenza nî ncinyi nî ncinyi bwa bwalu abu. Nyawu ne, baajaadiki patooke ne mashinyi ônsò a mu ditunga dijima akaavwa mamana kulongolola, bwa ne mbasungule Mukalenge Kennedy ku disungula dya mafi. Bible kî mwambeku ne yêyè neapite ku diibila anyi? Ncya bushuwa, bintu bya mafi. Mpindyewu, ncyêna ndwisha kasumbu kaa cîdiidî kaa ba-Démocrates anyi kaa ba-Républicains to, kadi cîndî ndi anu nteela maalû a mu Bible. Disungulangana didi ne mushinga kaayi? Bôbò nyawu bamane kumanya ne wapita nkampanda.

³⁹⁴ Mbanganyi badi bavuluke bwalu bwa ku télévisiôn buvwa buleeja bakaji babidi biimane? Umwe kwamba ne: “Même

nêngèlèlè Mukalenge...” Anyi, mukaji mwena Mishònyì wamba ne: “Mèmè nêngèlèlè Mukalenge Kennedy.”

Bòbò ne: “Bwa cinyi?”

³⁹⁵ Yèyè ne: “Bwalu ndi ngela meeji ne yèyè mmuntu wa meeji matwe kupita Mukalenge Nixon. Yèyè neikale Mfumu wa ditunga mulenga.”

³⁹⁶ Ke awu ne: “Ewu mmukaji mwena Katolike. ‘Wèwè newelele nganyi kakanda?’”

³⁹⁷ Yèyè ne: “Mèmè ndi mwena Katolike, mwena Katolike wa cyena Loomo, mwena Katolike udi uneemeka bidiye wamba.” Yèyè ne: “Mèmè nêngèlèlè Mukalenge Nixon.”

“Bwa cinyi?”

³⁹⁸ Yèyè ne: “Bwalu, ndi ngela meeji ne Mukalenge Nixon neikale Mfumu wa ditunga mulenga bwalu mmwibidilangane bikole ne maalu aa. Mmutambe kumanya communisme.” Mukaji awu mwambe cya mafi.

³⁹⁹ Mèmè ndi ne *Bye*...cidibo babiikila ne: *Byenzedi Byà Diitabuujà Dyètù*, mukanda wa beena Katolike wa mutambe kwikala wa mushinga mukole bwa bòbò mwa kuwusumba. Mbambemu ne: “Kwòkò kwikale mwena Katolike pa dibeji dya badi bafile mpala bwa masungulangana, mwikale ufwilakana ne mwena Mishònyì; mwena Katolike yèyè mudidinge anu mwelele mwena Mishònyì awu kakanda, badi bamwipata mu bwobumwe bwa ekeleeziya wa Katolike.” Ncya bushuwa. “Kadi kwòkò kwikale beena Katolike babidi bafwilakana nkwasu umwe, nebasungule mwena Katolike udi mutambe kwikala ne lulamatu kudi ‘ekeleeziya maamu’ nenku bamwelele tukanda.”

⁴⁰⁰ Nudi numona mushindu kaayi, ku diibila adi, cidibo bateeta kwenza anyi? Baabanya mfranga, bwa kusumba. Bwa cinyi? Badi bateeta bwa kubinyanga. Ke cidibo benza, nenku ditunga’s ndinyanguke. Nenku ncinyi aci? Bidi pa cipiminu cya ngòlò. Nenku ekeleeziya wa Katolike, balombodi, mbadi ne ngòlò wa buloba bujima. [Muntu mukwabo udi wamba ne: “Ndola miliyò binunu lukama ne makumi asambombo ne mwandamukulu.”—Muf.] Miliyò binunu lukama ne makumi asambombo ne mwandamukulu. Ke bwalu mbwabu’s. Biikale bamupingaja anu pa cipimu cya ngòlò, nenku nwênù nulama anu nzubu yenu ne bintu bikwabo, kadi biikale anu bantu baa ekeleeziya wa Katolike. Ditunga dikaadi dya ekeleeziya wa Katolike. Cintu cyònsò mu kaabujima bakaadi bacibakule anu mwômò amu mu mushindu awu, ku lupetu lwabo bòbò. Bible kèna wambaku bwalu abu anyi? Ke cimfwanyi cidi Bible utuzolela ncyaci.

⁴⁰¹ Cìndì nteeta kwamba, mwaneetu wa balume, leelu ewu. Nebàmbè ne: “Ke ciikala mwa kumuvwija ekeleeziya mwìmpè. Neasangishe cyena Mishònyì.” Cidi cimweka cìmpè ku mèsù etu

a mubidi aa, kadi dimanya dya pa buloba ebun dukutukutu ku mèsù kwa Nzambi.

402 “Nenku byakasankisha Nzambi, ku—ku lukutukutu lwa diyiiisha, bwa kusungila badi bajimine,” ku mudimu wa Nzambi, uvwaYe muteeke mu Ekeleeziya Wende, bwa kwibakila Ekeleeziya pa ngiikadilu ya nyuma eyi kabiyi pa cintu kampanda cididitangila buloba ebunansha.

403 Peetelo mmwambe ne: “Nenku bwalu nudi bapanduke ku dinyanguka dya pa buloba didi difuma ku lukuka lwa mfranga, ne lukuka lwa bisankasanka, ne masanka, ne didya, ne dinwa, ne lukuka lutudi naalu. Nudi bapanduke ku byôbi abi. Nenku mpindyewu nudi biibakiibwe mu bintu bidi bitulamà ne mwoyi. Ekeleeziya ngûndi ngambila maalu aa,” mudiye mwambe. Ke bwalu abu’s. Nukaavwaku babibale anyi? Nukaavwaku babyûmvwè patwâbibadi kaaba aka mu Peetelo Mwibîdi apa anyi? Teelejaayi anu cidiyewamba apa, mushindu udibi bifundiibwe bilenga muntwemu, mushindu udiye—udiye ubyamba. Eyo. Muteelejaayi mpindyewu padiyewakula apa. Eyo.

Peetelo, Simona Peetelo, musadidi ne mupostolo wa Yesu Kilisto, kudi aba badi... baakapeta diitabuujadya mushinga mukole dya mwomumwe ne dyetu ku bwakane bwa Nzambi ne Musungidi wetu Yesu Kilisto:

...ditalala bi—binuvudijiibwe ku dimanya dya Nzambi, ne ku Yesu Kilisto Mukalenge wetu,

Bilondeshile mudi—mudi bukole bwende bwa bunzambi butupe bintu byônsò... .

404 Mbanganyi baapyana buloba ne bintu byônsò? [Muntu mukwabo udi wamba ne: “Baa cijila.”—Muf.] Cya bushuwa. “Bitangila... .” Eyo. Bîmpè.

...bidi bitangila mwoyi ne difwana dya Nzambi, ku dimanya dya yêyè udi mutubiikile kutuumusha ku butumbi kututuma ku butumbi:

Kutudi twètù bapeebwe ku mulayi mitambe bunene... .ne ya mushinga mukole: bwa ku yôyi eyi nwamona mwa kwikala baabanyanganyi baa ngiikadilu wa bunzambi, bamane kupanduka ku dinyanguka (Teelejaayi aci.) didi pa buloba ku lukuka.

405 Lukuka lwa mfranga, lukuka lwa bintu binene, lukuka lwa dimanyika, bintu ebi mbifwe bwa mwena kwitabuuja. Katwena tutacisha meeji to. Kwikala mu ntenta anyi mu kazubuzubu, bwa cinyi bûndi mwa kutacisha meeji; kwikala ne mwoyi anyi kufwa, kutûkina mu mâyi anyi kufwa mu mâyi? Cintu cididitangila anyi ntema ncyôci eci, Bukalenge bwa Nzambi. Nansha mêmè mushaale mulame dikû dyanyi, nansha mushaale mulame famiye

wanyi, nansha mushaale mulame nî ncinyi cyônsò, undekele nshaale mulame Kilisto, ditekemena dyetu dya Butumbi.

⁴⁰⁶ Ungibake too ne kuulu, Eyi Mukalenge, mu *Cyôci* eci. Enza bwa Kilisto ikale wanyi Mutu, mwikale wenzela mudimu mu mêmè. Pa cishimikidi cyanyi, diitabuuja dyanyi didi mu Yêyè adi, bukole, dimanya, didikanda, lutuulu, difwana dya Nzambi, ne dinangangana dya bwânà bwetu, bikwatè mudimu munda mwanyi, Eyi Mukalenge, ke dyanyi disambila adi. Ncyêna ntacisha meeji to; kwikala ne mwoyi anyi kufwa, kutukina mu mâyi anyi kufwa mu mâyi; dingumba, anyi kakuyi dingumba; ne mulunda, anyi kakuyi mulunda. Cyôci aci cikwate mudimu munda mwanyi, bukole bwa Kilisto, dimanya Dyende, bituute nkoka, bwa ngâpeta mushindu wa kulongesha byôbi ebi.

⁴⁰⁷ “Bwalu Nzambi mmuteeke mu Ekeleeziya, bapostolo, baprofeta, balongeshi, bampaasata, ne batangadiki, bônsò abu bwa kuvwija bupwangane ne kubwejamu makole ônsò aa, bwa bupwangane abu bwa Dilwa dya Mwânà wa Nzambi.” Dyônsò dya ku mabwe aa ncintu cyumusha ku Dyôdi adi. *Edi* ncintu cyumusha ku Edi. Bwônsò bwa ku makole awu mbwa munda Mwende Yêyè, ne adi apongoloka apatuka munda Mwende, apweka apicila mu byôbi abi. Amen.

⁴⁰⁸ Tukaadi dîbà nkânkâlâ. Byônsò ebi biyaaya penyi? Amen. Nudi baMunange anyi? [Disangisha didi dyamba ne: “Amen.”—Muf.] Nudi biitabuuje aci anyi? [“Amen.”] Teelejaa, mwânà wetu.

⁴⁰⁹ Mwaneetu wa bakaji Kidd uvwa wamba mu dinda emu ne: “Mwaneetu Bill, ncyêna mumanye ne ngâpeta mushindu wa kukumonaku kabidi.” Aci kadi kwambaci kunshipa. Nwamonu anyi? Yêyè udi wela meeji ne ukaadi ukulakaja, ne yêyè mwine’s wâkûlakaji. Ntu mulombe Nzambi bwa amulame yêyè ne Mwaneetu wa balume Kidd, kukaadi ntanta mule.

⁴¹⁰ Anyishaayi nnnwâmbilè, katwena bamanye ne netwikale tupetangana muntu ne muntu too ne ku dîbà kaayi to. Ncyêna mumanye ne mêmè ewu nêngikalè neenu too ne ku dîbà kaayi to. Bidi mwa kwenzeka ne Nzambi ambiikile bwa mêmè kuumuka pa buloba. Bidi mwa kwenzeka ne Yêyè ambiikile nye ku budimi bukwabo bwa bwambi. Bidi mwa kwenzeka ne Yêyè akubiikile mwaba kampanda. Katwena bamanye. Kadi, tu—tupetaayi eci. Katulekedi eci citupicila anu pamutu naka to. Twangataayi cyôci aci.

⁴¹¹ S’ncyôci aci, mu Bible. S’ncyôci eci, cikumbajangane ne bintu bikwabo byônsò. Bu nanshà ne mvwaku ne dîbà dya kucyenza’s we! Kamwena mushindu wa kucyenza mu dituku dimwepele to. Nudi bamanye nanku awu. Kadi, ndi mwa kuswikakaja cintu cyônsò mu kaabujima!

⁴¹² Tangilaayi, patwakajikija ne diyiisha adi, nwâkamòna cyakenza Nyuma Mwîmpè ku cimanu kwaka, kî mmwômò

anyi? Mbanganyi bavwapu mwine kusangu awu? [Disangisha didi dyamba ne: “Amen.”—Muf.] Nwamonu anyi? Cya bushuwa! Mmutuuluke anu naka, kuzola cintu anu cyôci cimwecimwe aci, Mwanjelo wa Mukalenge awu.

⁴¹³ Nwamonu’s, ncilelela. Kanulekedi cinubafuka to. Nwacikwataayi ne manza abidi, bânà wetu. Kwataayi cintu aci ne manza abidi. Vulukaayi ne, kwibakila pa diitabuujya dyenu, bukole, dimanya, lutuulu!

⁴¹⁴ Mpindyewu, apa, ngela meeji ne mvwa ne dibeji mwab’ewu, pângikalà nciyi mukamacishe nî mpenyi pâmvwâ nyiisha apa. Nkôkô aka mwab’ewu. Twasakidila, mwaneetu. Twasakidila, wa manza tente. Panwikala baswe ku—kutapapu dîsù, bwa kumona ne kudi cintu kampanda mwab’ewu cinudi mwa. . . Pâmwâpa ncitembelu cîmpè ndambu kupita cidî kwaka cyacya, kunudi bafwanyine kutentula bimwe bintu bya ku cyôci eci. Nêncîlamîkè anu kuulu eku ne tusonso, nenku bulelela nenwikale mwa kwenza kukutapa dîsù ne—ne kucituuta ku cyamu.

⁴¹⁵ Nenku ndi muswe bwa nûcyângàtè nucilonge, ne nucifwanyikije, ne pashiishe nwènzè maalu bilondeshile cyôci eci. Kî nkucilonga anu naka, kî nkucifwanyikija anu naka to, kadi kwenza maalu bilondeshile cyôci eci panwacilonga apu. Ûcyângàtè bu cyebe wêwè ne meeji matooke ônsò. Kwambi ne: “Ee, bivwa bingenza disanka be pâmvwâ nciteeleja apu” to. Bivwa bingenza disanka, nansha mêmè. Kadi kuciteeleja, ne pashiishe kucyakidila, mbishiilangane. Nwamonu anyi? Nwamonu anyi? Mbishiilangane. Nwamonu anyi?

⁴¹⁶ Kudi mikiiya mwandamutekete bwa kwenza cipidi cya Nzambi. Kudi Bikondo bya Ekeleeziya Mwandamutekete, mu byôbî abi mmudi Nzambi mufikishe Ekeleeziya ku mukiiya mwine ewu. Nenku Yéyè mmupete baamusanjeela mwandamutekete bwa kucyenza. Kudi mwandamutekete, mwandamutekete, mwandamutekete. Nwamonu anyi? Mwandamutekete udi—udi nomba wa Nzambi wa dyoya nende, ne isatu udi nomba mupwangane wa Nzambi. Pa nanku, kudi isatu, ne isatu mwandamutekete. Pa nanku, mu makumi, mu nyuma, ku Dîyî, ku bujaadiki bwa Nyuma Mwîmpè, byônsò abi mbijikije cintu mu kaabujima. Tucilongaayi.

⁴¹⁷ Tusakidilaayi bintu ebi ku diitabuujya dyetu, pa dîbà adi, bwa tupete mushindu wa kufika mu cipidi cijima cya Kilisto; biikale baswikakaja pamwe kudi dinanga dya Nzambi, diciina dya Nzambi, kaneemu kaa kuneemekangana muntu ne muntu mu myoyi yetu, kaneemu kaa mu ndondo kaa tuneemekangana muntu ne muntu, dinangangana dya bwânà bwetu bu balume ne bakaji, kakuyiku maalu a ciipanshi to, kakuyiku cîngà cintu to anu bukezuke bwa nsòmbelu wa Nyuma Mwîmpè. Nwamonu anyi? Kusòmba pamwe, kwikala mwena Kilisto.

Kwenda ne diitabuuja. Kwenza bwa bukole bwa Nzambi bwikale butuuta nkoka munda mwebe; kwenza bwa dimanya dya Nzambi, pakaadidi difika ku maalu mîmpè ne maalu mabi. Padi dyabulu ukuleeja cintu cidì kacyi cya mu Mifundu menemene, kusemena kule naaci. Ncya bushuwa.

418 Ndi mwa kudifwanyikijila ne bapostolo abu kabavwaku benza maalu bu twètù to. Bavwa baya eku ne eku, misangu mikwabo bantu baa dyakula dikese menemene, too ne pavwabo babanda mu cyambilu. Bavwa babwela ne benza civwabo ne cya kwenza aci, pashiishe bapatuka. Eyowa's, mukalenge. Bavwa ne ngulu. Bavwa ne bukole. Kabavwaku bôbô ne makokyanganyi ne bantu nansha. Bavwa bamanye pavwabo biimanyine. Kwajiki. Bavwa bamanye uvwabo biitabuuje. Bavwa anu batungunuke ne kwenda mu Nyuma. Benza anu . . .

419 Anu mûmvwà ngamba diloolo dikwabo. Dishikula anu dikese dya mutu, ke cyônsò civwa cikengela Nzambi kwenza, nenku cintu nansha cimwe kaciyiku mwa kubiimanyika to. Kabavwa beela mpata anyi balonga, anyi banungana anyi badyabakeena mutûtù twètù twenza amu to, bwa ne bidì bikengela kwenza *cikampanda* anyi *cikansanga*. Bavwa baya anu kumpala kadi kucyenza, nansha bishi. Dishikula anu dikese dimwepele dya mutu dya Nzambi, bwalu butuuke, anu piine apu. Mbwa cinyi? Mmunyi muvwabo bamanya ne ndishikula dya mutu dya Nzambi? Bavwa ne makole ônsò aa munda emu, mikiiya yônsò eyi. Nenku dishikula dikese dya mutu dya kumpala dya Nzambi diikale difwanyikija ne kantu ne kantu kaa *eci*, ne Diyì Dyende. Bavwa bamanya ne civwa n'Diyì dya Nzambi, nenku bavwa baasa lwendu baya. Kabivwa bikengela kuditacishabo mu meeji bwa cîngà cintu to. Pavwa Nzambi wakula, bavwa baya. Tudi twakula . . .

420 Nzambi udi wakula neetu, kadi twètù netwâmbè ne: "Ee, netubange's. Netumone ne tudi mwa kusômba Nsômbelu ewu." Cintu cya kumpala cyûdì ne cya kumanya, muntu ukubindulula. Ee, bushuwa, awu's n'dyabulu.

421 Bivwa bikengela nwênù kumona muvwaye uteeta bwa kundama kule ne disangisha edi mu dinda emu. Bivwa bikengela bwa wêwè kwikala ne cyôci aci musangu kampanda. Kaa, luse we! Bikengela mêmè kulwà mvita munsangu wônsò ûndì anu nteela ne kudi disangisha. Ne byôbi bikengela bwa mêmè kuya kasambidila mubeedi kampanda, ne muntu kampanda wa ûpûnga ne lufu ne kayi musungidiibwe to, nekwikale mabiikila a ku telefone makumi asatu mu tusunsa dikumi, piikalabo ne mushindu wa kubiikila lukasa lukasa mushindu awu, bwa kumpangisha. "Kaa, Mwaneetu Branham, bikengela wênzè *cikampanda*." Kadi's nkwaku kudi musuuka muteeka pa mudilu wa nkunyi. Cya bushuwa. Eyo.

422 Diloolo dikwabo, kumbiikilabo mu mwaba kampanda. Nsongalume kampanda, ntu muyiikile nende lwa kwinshi eku mu ní ncinyi apa, mu makajiinyi a byakudya, kukaadi ndambu wa bidimu. Ukaavwa mushaale kanwayi wa maala a kapyá. Mvwa mumanye mwânà wa balume awu, mwânà wa maalu mîmpè, kadi mwikale ngènzàmpèkààtù. Nenku ke mamwèndè kubiikilaye. Ngela meeji uvwa mubiikile Doc misangu ibidi. Mémè. . . Kubiikilabo, ke kubiikilabo Billy, ke—ke ndekeelu wa byònsò mukenji awu kumpetawu. Nenku mukenji awu mmwene anu umpeta, bwa kwamba menemene, kacya ncivwaku mwanji kupeta mvita búngì naka kacya bandela to, bwa kufika anu mwine mwaba uvwa mwânà wa balume awu.

423 Nenku pângàkafikàku, mwânà awu mukwate ne bya luse kacyiyiku mwa kumanya to. Ke yèyè awu, mulaadika mwaba awu, lungenyi lujimine, ne mwikale anu wenza bintu bikutakane. Tatwèndè uteeta kumutuuta cyanza, wamba ne: “Munanga wanyi.” Nenku muntu awu udi ne bidimu makumi ataanu, wipacila ku makumi ataanu ne cimwe. Wamba ne: “Munanga wanyi,” *cikampanda*, ne “shaala talala.” Nenku uvwa uteeta bwa kujuuka. Tuboko tukese tukulakaje tushaale bunene *ebu*. Nsongalume awu uvwa ne kansere búngì cyanaana mu mushindu wa ne yèyè mwine ukaavwa anu kansere pa kansere. Bya pambidi byende byònsò bikaavwa anu ne kansere. Nansha mashi ende ônsò a mu mijilu akaavwa anu kansere, byònsò. Nenku ke yèyè awu, uteeta bwa kujuuka, ne mwikale wenza bintu bikutakane mushindu awu.

424 Mémè kumukwata ku cyanza, kwamba ne: “Woodrow, Woodrow, s’*m*Mwaneetu Branham.”

425 Papa wende kwamba ne: “Kwèna mumanye anyi? Ewu’s m’*M*waneetu Bill. Woodrow, ewu’s m’*M*waneetu Branham.”

Uvwa wenza ne: “Uh. Huh. Uh-uh-uh.” *Nanku* awu.

426 Ke papa wende kutangila kadi kwamba ne: “Billy, udi mulwe dîbà dimane kupita ndambu.”

Mémè ne: “Kakutu kwanji kwikalaku pashiishe papite to. Yèyè awu udi mwab’*ewu*.” Mémè kupeta mvita.

427 Nenku pa dîbà adi nsongalume mikwabo, nsongalume mikwabo kabidi, bangènzàmpèkààtù, bavwa biimane mwaba awu, bamwe baa ku balelà baabo. Mémè ne: “Nudi numona’s, nwênù nsongalume, dilongololaayi, bwalu nenufike pa kaaba aka. Nenuwikale ne cya kupweka kufika too ne apa. Nwamonu anyi? Pàmwàpa kacyi bwa kansere aka—aka to. Nudi bafwanyine kupafika ku cîngà cintu, lwa pambelu paapa mu cibebeba mwamwa, utuuka mashi too ne paudi ufwa, anyi cintu kampanda. Nenuwikale ne cya kukufika.” Twètù kuyiikila naabo.

428 Mvwa mwindile bwa kumona civwa Nyuma wamba bwa kwenza. Kacya anu ngindila. Cyakumpala, mémè kuumvwa dishikula dikese dya mutu adi. “Mutentekete byanza.”

429 Mêmè kubanga kunyunguluka ntwà eku ntwà eku, mêmè ne: “Inyikaayi mitu yenu bônso.” Bônso kwinyikabo mitu, nsongalume ibidi anyi isatu ivwa munda amu.

430 Mêmè kumutentekela byanza. Mêmè ne: “Mukalenge Nzambi, enzaku bwa nsongalume ewu amanye ciikalaye mwa kwenza, kumpala kwa yêyè ne cya kusambakeena ne cintu eci. Nyêyè ewu ùpùnga ne lufu. Démon ewu nyewu mumushiye mu bwalu bukole, ne ke yêyè ukaadi uya ewu. Ne yêyè mwine nyewu munwe maala dinwa dya lufu, nenku nyewu mufike mu mushindu ewu. Ndi ndomba bwa Wêwè wikaleku nende luse.” Nenku pângâkamana kumusambidila, paakacyabu mu dinda ke yêyè kujúuka kusômba, kubanga kuyiikila ne papa wende.

431 Busty Rogers, wa bwena... Bavwa bambiikile lwa ku lupitaadi eku, kî nkwanji kwenza matuku to. Mvwa mupatuke muye kuntwaku dituku adi, paanyima paa mêmè mumane kuyiisha mu Milltown mwama muvwa Georgie Carter mwondopiibwe amu. Nwênù bônso nudi bavuluke bwalu abu. Nenku mwômò amu pavwa Mwaneetu Smith, muyiishi wa ba-Méthodistes, mwambe ne: “Kwôkò kwikale anu muntu mubatiijibwe, mu Dîna dya Yesu Kilisto, apatuke mu ntenta wanyi emu,” mushindu awu. Lwa ku Totten Ford kwaka, mwikale wenza disangisha adi kwine aku. Nenku, kaa, kumpiishaye mu byônso binudi mwa kwelela meeji abi. Ncyakaakulaku díyì nansha dimwe to; mêmè kutungunuka anu ne bîmvwà ngenza. Mvwa ne mudimu muntuma naawu. Mukalenge uvwa mundejeje cikeena-kumona. Kuvwa mwânà wa mukooko lwa kuntwaku, mukalamine mwaba kampanda mu cipeela. Nudi bavuluke cikeena-kumona aci bônso, nwênù bônso. Ngela meeji ne nudi bacivuluke. Nudi bacivuluke anyi? [Disangisha didi dyamba ne: “Amen.”—Muf.] Cya bushuwa. Mbîmpè. Nenku mvwa nya ngenda mpicila mwaba wa cipeela awu, ngenda mmukeba.

432 Mêmè kuya ku Totten Ford. Mwaneetu Wright wawa mmumanye. Twêtù kukuya, katumanyi cya dyanza to. Mvwa musumbe kasheete kakese kaa diteekela nsabanga, ku cicyele cimwe. Mvwa mwikale nya bwa kupatuka kuyaku, bwa kwimanaku ne kuyiisha mubande pa kabasa aku. Kwambaye ne uvwa ubanda, too ne ku mutu wa mukuna, bwa kuya kenza bungedaamushinga kampanda. Mêmè kamufilaku. Kuvwa ekeleeziya munene wa kale wa ba-Baptistes mwasa kwine aku, munda mutupu. Mukalenge kungambila ne: “Imanyina apu.”

433 Mêmè ne: “Nshiile mêmè lwa pambelu apa, Mwaneetu Wright.” Mêmè kwimana. Yêyè kutungunuka too ne kumutu aku kadi kwalukilaye.

434 Mêmè kuyaku, kadi nciyi mushindu wa kuunzulula ciibi to. Mêmè ne: “Mukalenge, Wêwè mwikale mu bwalu ebu, Wêwè mwikale muswe bwa mbwele mu ekeleeziya ewu,

nkangwilaaku ciibi.” Mémè kushaala musòmbe mwaba awu mwikale ngela meeji.

435 Mémè kuumvwa muntu wenda ulwa; kuseemenaye, kwambaye ne: “Wetwawu! Nênkwambilè,” ne, “udi muswe kubwela mu ekeleeziya anyi?”

Mémè ne: “Eyowa’s, mukalenge.”

Yèyè ne: “Mémè ngudi ne nsapi.”

436 Mémè kukutula disangisha. Lumingu lwa kumpala, anu cijengu cyetu eci. Diloolo dya kumpala, mémè kupeta kasumbu kaa bantu, Mwaneetu Wright ne dîkù dyende. Cyakumpala, kundekeelu kwa lumingu, kamuvwa nansha mushindu wa kwimanyika bantu mu lupangu to, bikole. Kadi mwânà wa mukooko awu kavwa anu mwanji kulwa to. Ke Mwaneetu Hall kusungidiibwaye mu ciine cikondo aci, mpaasata udimu mpindyewu awu, bôbò bônso abu. Nciyi anu mwa kupeta kuvwa mwânà wa mukooko awu to. Paanyima paa cikondo, paabelu paa église de Christ, mwamwa lwa kwinshi kwa kaamukuna, kânà kaa bakaji kaa bidimu citeema ne ngondo mwandamukulu aku kakayiku mwa kunyunga to, kaalaadika panshi kuntwaku. Ke kôkò aku. Nwênù bônso nudi bamanye bwalu abu. Eyowa’s, mukalenge.

437 Nenku mu mapingaja amu pavwa Busty Rogers, nkolomu munene wa kafyondo awu mwimane mwaba awu... Mémè kupatuka mwaba awu. Nenku mwaba awu disangisha dya Mwaneetu Smith diimane bwa kunsekabo, bwa kungelulwilabo, bu mûmvwà mbatiiza mu Dînà dya Yesu. Mémè kupatuka kubwela mu mâyi a bitoci a Totten Ford, muvwabo ne... [Katupa kaa mukaba wa mêyi munda mutupu—Muf.]... mbanda ne kasulu aku, kavwa kenza mutooyi mukole wa kacya. Balami babidi kupatukabo naanyi.

438 Mémè kwamba ne: “Ndi mwimane mwaba ewu mu mapingaja emu bwa kuleeja mpala wa Mufundu wa Cijila wa Nzambi.” Mémè ne: “Ndi mbala mu Bible emu mwaba wakamba Peetelo ne: ‘Nyingalalaayi, muntu ne muntu wa kunudi, nubatiijiibwe mu Dînà dya Yesu Kilisto bwa dilekelediibwa dya mpekaatu wenu.’” Mémè kukudimuka, kufila Mukanda kudi umwe wa ku balami abu.

439 Mémè kupatuka kwaka, kwamba ne: “Ewu yônso udi muswe, udi unyingalala ku mpekaatu wende awu, budiye naabu mbwa kulwa.” Mémè kubwela mu mâyi amu. Mémè kwamba ne: “Kûndi mémè mbimweke anu bu ne Banjelo mbasòmbe pa ditamba dyônso dya mucu patudi twakulangana apa, biikale babandila.” Kaa, ekelekele! Katanci kângâmbi kubatiiza anu bantu babidi anyi basatu aka anyi, disangisha dyende dyônso nkòong, bakaji bavwa bavwale nkanzu milenga ya swâ abu, babwela mu mâyi amu, benda beela mbila ya itaayisha ne mutu. Mémè kubatiiza disangisha dyende dyônso nkòong mu Dînà dya

Yesu Kilisto. Nudi bamanye bwalu abu. Ndi ne fôtô wa cyôci aci. Ke muvwa bwalu nanku.

⁴⁴⁰ Cívwa ncinyi? Kusakidila ku bukole bwebe. Nwamonu anyi? Lekela wêwè anu cyanaana. Nzambi ngudi mumanye mwa kubyenza. Nzambi ngudi mumanye mwa kufikisha maalu awu ku dyenzeka. Lekela bãmbè anu byônsò byaswabo kwamba abi. Kabyena ne cyenzabi to. Wêwè tungunuka nda anu kûyaaya.

⁴⁴¹ Busty Rogers mwimane mwaba awu, paakamonaye aci, yêyè ne: “Nenku ngitabùùjì bwalu ebu ne mwoyi wanyi wônsò.” Ke kubwelaye mu mâyì, ne bilàmbà bilenga bivwaye muvwale abi, kubatiijibwaye mu Dîna dya Yesu Kilisto.

⁴⁴² Kukaadi bidimu bu bisatu anyi binaayi, kumbiikilabo lwa kwinsi eku mu lupitaadi lwa mu New Albany. Ke yêyè awu, ùpunga ne lufu, ne kansere, kamudye ne penyi. Bangangabuka bavwa bamupe cikondo too ne pavwabu bucya ne dinda, bwa kwikalaye ne mwoyi. Kwambabo ne: “Udi ufwa mpindyewu.” Bòbò ne: “Anu wêwè mulwe dyakamwe.”

⁴⁴³ Mêmè kupweka ku cibambalu aci, pângàapwekìku, bwa kwimana mwab’awu ne kusambila. Yêyè ne: “Billy, nyawu kudi mwanzankongolo mwenze cijengu mu ditumba mwamwa.”

⁴⁴⁴ Nenku mêmè kukudimuka, bwa kutangila. Mêmè ne: “Busty, ncipungidi. Kwakufwa to. Cipungidi cya Mashi cidi cikusungila.”

⁴⁴⁵ Mêmè kumutentekela byanza, kwamba ne: “Mukalenge Nzambi, mushindu mwine udi cikeena-kumona cyacya ciikale cijaadika ne Wêwè udi mwab’ewu. Cipungidi Cyebe, ncyane: “Ku mibundabunda Yende tudi bondopiibwe.” Mêmè kumutentekela byanza, ke yêyè kusangala anu mwaba awu. Kumutumabo pambelu.

⁴⁴⁶ Nenku kukaadi bidimu bu binaayi anyi bitaanu, bidimu bu binaayi, bidiye uloba ubanda upweka ne musulu ne bikwabo, anu mwende ne kale. Ne mwaba uvwa kansere kasanganyiibwa nseke yônsò pa muminu too ne mu cifu awu, kakaavwa kawuwije cikudi, dipondo dishile mona bunene. Bangangabuka, bankolomu baa lupitaadi, bavwa bamwambile ne bavwa ne dyondopa dya ne cobalt bwa kukoka cyôci aci, bwa kumona mwa kupwekesha byakudya byâbûngì musangu umwe. Uvwa ne lutatu lukole bwa kumina byakudya byâbûngì, bivwa bikengela kwikalaye anu udyâ bitekete bitekete. Ke kuyaye bwa kwenzabo ciine aci. Mêmè ncivwa mumanye ne uvwaku to.

⁴⁴⁷ Nenku paakamupandabo, kujandulabo ne byakamufikisha ku dipaluka, ke kubwelaye mu kômâ. Byôbì kumutekesha luseke lumwe mushindu awu. Nenku cintu cimwepele civwaye pende mwa kwenza civwa anu kudila ne kaadiyì kapate. Ke yêyè kwangata crayon, *nunku* ewu, mwikale wenza, “eyi, eyi, eyi.” Ke uteeta bwa kufunda, uzakalala nunku ewu, ne cyanza ciine cya bwalu bulengaci. Luseke lwende lwa dyabakaji, lwikale litalale.

Ke kufundaye, ne cyanza cyende aci ne: “Yesu udi usungila, 1900 ne bikampanda.” Kabavwa mwa kucyumvwa to.

448 Pa nanku mpindyewu pãmbi mukajende ne: “Mwaneetu Branham, ncyêna mumanye cidiye uswa kwamba apu to.”

449 Mêmè ne: “Mandamu Rogers, cidiye uswa kwamba, civwa 1900 ne bikampanda, bwa ne yêyê wakasungidiibwa ne wakabatijiibwa mu Dîna dya Yesu lwa kwinshi kwaka. Aci ke cidi ne mushinga bwa mpindyewu. Kêna uciina kufwa to.”

450 Mêmè kwamba ne: “Mukalenge Nzambi, lamaku mwoyi wende. Ndi ndomba nanku, mu Dîna dya Yesu, bwa Wêwè kulama mwoyi wende.” Mêmè kumutentekela byanza. Kômâ kuumukaye. Dipaluka kwimanadi. Nenku kujuukaye mu bulaalu amu. Patudi twakulangana apa udi wendela kuulu, wenda ufila bujaadiki.

451 Sakidila ku diitabuuja dyebe, bukole; sakidila ku bukole bwebe, dimanya; ku dimanya dyebe, didikanda; ku didikanda dyebe, lutuulu; ku lutuulu lwebe, difwana dya Nzambi; ku difwana dyebe dya Nzambi, dinangangana dya bwânà bwetu; ku dinangangana dyebe dya bwânà bwetu, Nyuma Mwîmpè, nenku Kilisto nealwe. Bwalu, anu lwa mwinshi Mwendè menemene. . . Nyuma Mwîmpè n’Nyuma wa Yesu Kilisto udi ubwela mu Ekeleeziya, bwa kumwenesha makole awu. Kaa, ekelekele!

Monaayaaku pakaadi dîbà, dîbà dikumi ne ibidi ne tusunsa dikumi ne tutaanu.

Ndi . . .munange, ndi muMunange
Bwalu Yêyê wakannanga kumpala,

Lwa kwinshi *eku*, kumpala kwa wêwè kwikala cintu kampanda.

Ne wakampete- . . .(Wakenza cinyi?) . . .
lupandu
Pa mucu wa Kalvariyo.

Mmunyi mûndi *eci*? Bwalu Yêyê wakannanga, kumpala.

Ndi muMunange, ndi muMunange
Bwalu Yêyê wakannanga . . .(Ke kablingila
aku.)

Ne wakampetela lupandu
Pa mucu wa Kalvariyo.

452 Ndi ndaya, mu dinda emu, kudiYe, ne mwoyi wanyi wônsò, ne, ku dikwacisha Dyende ne ku ngàsà Wende, ndi ndomba bwa ngikale nkeba ku dituku ne ku dituku, nciyi ndekelaku to, too ne pângààfikà ku dyumvwa umwe ne umwe wa ku mikiiya eyi ipongoloka mu kaacipidi kaanyi kakese kaa kale aka, too ne pângikalà mushaale dimweneshiibwa dya Kilisto udi ne mwoyi. Bwalu, Yêyê wakashaala mpekaatu mufwanangane naanyi, bwa mêmè nshaale . . .nshaale bwakane bwa Nzambi, mufwanangane Nende. “Yêyê wakangata kaaba

kaanyi; Mukalenge, enzaku ngangate Kende mpindyewu.” Bwalu, ke kiipacila kaakafwidilaYe aku. Mbanganyi badi baswe kulaya cintu cimwecimwe aci, ku ngâsà wa Nzambi? [Disangisha didi dyamba ne: “Amen.”—Muf.] Ne mitu yetu miinyika mpindyewu, ne byanza byetu byela muulu. “Ndi . . .”

⁴⁵³ Ndi ncilaya, Mukalenge, ekeleeziya ewu udi ucilaya: “Cipidi cijima cya Yesu Kilisto!”

Bwalu Yêyè wakannanga kumpala
Ne wakampetela lupandu
Pa mucu wa Kalvariyo.



CIPIDI CYÀ MUNTU MUPWÀNGÀNE LUA62-1014M

(The Stature Of A Perfect Man)

Diyiisha edi dya Mwaneetu William Marrion Branham, dyakayiishabo musangu wa kumpala mu Anglais mu dyalumingu mu dinda, dya 14 ngondo wa dikumi, 1962, mu Branham Tabernacle mu Jeffersonville, Indiana, U.S.A., ndyumusha pa mukaba wa mêtù ne dittuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.


www.branham.org

CIPIDI CYA MUNTU MUPWANGANE

BIKONDO BYA EKELEEZIYA

YESU

BAAMUSANJEELA



PEETELO MWIBÎDÌ 1.1-8

BYENZEDI 7.44-49, EBELU 10.5, MAATAAYI 5.48

EFESO 4:11-15, EBELU 11.32-40

Edi nditentula dya dizola divwa Mwaneetu Branham muzole ku cibasa cyende kudiye wenza kutangila mu Diiyisha dijima edi.

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org